

Velona ao amin'i KRISTY



Miaina ao amin'ny Fahazavan'ny Mandrakizay

VELONA AO AMIN'I KRISTY

Miaina ao amin'ny Fahazavan'ny Mandrakizay

Nahary antsika araka ny endriny Andriamanitra, mba hahafantarantsika Azy. Nofofoin'Andriamanitra tao amin'ny olombelona voalohany ny ainy, ka tonga fanahy velona izy. Nohariana hanana fiainana ao Aminy isika—fiainana be dia be, mandrakizay, fa ny ota no nampisaraka antsika tamin'Andriamanitsika, ilay hany loharanon'aina marina.

Ny fanirian'Andriamanitra dia ny hampisy aina vaovao ao anatintsika sy hamerina ny fifandraisantsika Aminy izay namoronana antsika mba hananana fiainana. Manasa antsika hiverina ho amin'ny fiainana vaovao izy, hiverina ho amin'ny fiainana mendrika hiainana, ary hiverina ho amin'ny fiainana mandrakizay. Ary izany fiainana izany dia ao amin'i Jesosy Kristy Zanany.

Tia antsika Andriamanitra ary nasehony antsika ny lalan'ny fiainana. Rehefa manaiky io fiainam-baovao io isika, dia ny Fiainany ao anatintsika; mameno antsika Izy Tenany amin'ny alalan'ny Fanahiny ary manome hery antsika hahalala Azy sy hiara-mandeha Aminy.

Ny vavakay dia ny hoe, rehefa mamaky sy mandalina ity bokikely ity ianao, dia ho fantatrao hoe noforonina ho iza ianao ary handray ny toerana nomen'Andriamanitra anao ao amin'ny drafitra lehibe ho amin'ny fiainanao.

Ary izao no fiainana mandrakizay, dia ny mahafantatra Anao, Izay Andriamanitra tokana sady marina, sy Jesosy Kristy, Izay efa nirahinao.

—Jaona 17:3

[Hoy i Jesosy] Izaho no fahazavan'izao tontolo izao; izay manaraka Ahy tsy mba handeha amin'ny maizina, fa hanana ny fahazavan'aina.

—Jaona 8:12b

NY BAIBOLY © Fikambanana Mampielany Baiboly Malagasy 1965, 2019. Tsy azo adika na alain-tahaka. Nahazoan-dalana. The Bible © Malagasy Bible Society 1965, 2019. Cannot be copied or duplicated, used with permission.

"Velona ao amin'i Kristy" bokikely Copyright © 2025 izay natontan'ny World Missionary Press, Inc.

FIZAHAN-TAKELAKA

1. Iza Ilay Andriamanintsika?	2
2. Maniry Fifandraisana Amintsika Andriamanitra	5
3. Nampisaraka Antsika Tamin'Andriamanitra Ny Fahotana	6
4. Namerina Ny Fifandraisantsika Aminy Andriamanitra Amin'ny Alalan'i Jesosy Kristy Ilay Taranakin'ny Vehivavy.	9
5. Afaka Mandray Fiainana Vaovao Ao Amin'i Kristy Isika. .	17
6. Velona Ao Amin'i Kristy Isika	20
7. Mandeha Amin'ny Fiainana Vaovao Amin'ny Finoana Ny Zanak'Andriamanitra	29
8. Mitondra Fiainana Sy Manova Antsika Ny Tenin'Andriamanitra	34
9. Maty Hoan'ny Tena Sy Velona Hoan'ny Fahamarinana	38
10. Mahatsapa Ny Fanatrehan'Andriamanitra Sy Ny Heriny Amin'ny Alalan'ny Vavaka.	42
11. Miaina Ao Amin'ny Fifandraisana Miaraka Amin'ny Ray Sy Jesosy Kristy Ary Ny Fiangonany	52
12. Raha Mitoetra Ao Amin'i Kristy Isika Dia Hamo Betsaka	59
13. Miaina Fiainana Arakan'Andriamanitra Amin'ny Alalan'ny Herin'ny Fahy Masina.	65
14. Omen'ny Fahy Masina Hery Isika Mba Ho Vavolombelony.	72
15. Mandresy Ny Fahavalo Amin'ny Alalan'i Jesosy Kristy Tompontosika.	76
16. Raha Miara-Mijaly Aminy Isika Dia Hira-Hanam- Boninahitra Aminy	84
17. Miaina Ao Amin'ny Fahazavan'ny Mandrakizay.	89

1. IZA ILAY ANDRIAMANINTSIKA?

Iray ihany no Andriamanitra marina

Fa izao no lazain'i Jehovah, Izay nahary ny lanitra (Izy no Andriamanitra) sady namorona ny tany sy nahavita azy (Izy no nandamina azy; tsy ho tany tsy misy endrika tsy akory no namoronany azy, fa nataony honenana): Izaho no Jehovah, ary tsy misy hafa. —Isaia 45:18

Ary hoy Andriamanitra tamin'i Mosesy: IZAHO, IZAY IZY HATRIZAY HATRIZAY KA HO MANDRAKIZAY. —Eksodosy 3:14a

Andriamanitra no mpanapaka mandrakizay any an-danitra sy ety an-tany

¹Jehovah no Mpanjaka, mitafy voninahitra Izy; Jehovah mitafy, —eny, misikina hery Izy; Ary izao rehetra izao nampitoerina ka tsy hihetsika. ²Ny seza fiandriananao nampitoerina hatramin'ny fahagola; Hatrizay hatrizay Hianao. —Salamo 93:1-2

Jehovah efa nampitoetra ny seza fiandrianany any an-danitra; ary ny fanjakany manapaka izao tontolo izao. —Salamo 103:19

¹¹Anao, Jehovah ô, ny fahalehibiazana sy ny hery sy ny voninahitra sy ny famirapiratana ary ny fiandrianana, dia izay rehetra any an-danitra sy ety an-tany; Anao ny fanjakana, Jehovah ô, ary Anao ny fisandratana ho Lohany ambonin'izy rehetra. ¹²Avy aminao ny harena sy ny voninahitra, ary Hianao no manjaka amin'izao rehetra izao; eo an-tànanao ny hery sy ny tanjaka, ka eo an-tànanao koa ny mampahalehibe sy ny mampahatanjaka izao rehetra izao. —1 Tantara 29:11-12

Mahay ny zavatra rehetra sy manana ny hery rehetra Andriamanitra

⁹Tsarovy ny zavatra taloha izay efa lasa ela; Fa Izaho no Andriamanitra, ka tsy misy hafa; Izaho no Andriamanitra, ka tsy misy tahaka Ahy, ¹⁰Izay manambara ny farany hatramin'ny voalohany, ary nanambara hatramin'ny ela izay tsy mbola natao akory,— Dia Ilay manao hoe: Ho to ny fikasako, ary hefaiko ny sitrapoko rehetra. —Isaia 46:9-10

Andriamanitra no Mpamorona ny lanitra sy ny tany

Tamin'ny voalohany Andriamanitra nahary sy ny lanitra sy ny tany. —Genesisy 1:1

²⁵Koa ampitovinareo amin'iza moa Aho, hitahako aminy? Hoy ny Iray Masina. ²⁶Asandrato ny masonareo, ka mijere; Iza no nahary ireny? Izy no mamoka ny antokony araka ny isany sy miantso azy rehetra amin'ny anarany avy noho ny haben'ny fahatanjahany sy ny heriny tsy toha, ka tsy misy diso ireny na dia iray akory aza. —Isaia 40:25-26

Tsy fantatrao va? Tsy efa renao va fa Andriamanitra mandrakizay Jehovah, izay namorona ny faran'ny tany? Tsy mba mety ho reraka na sasatra Izy; Tsy takatry ny saina ny fahalalany.

—Isaia 40:28

Andriamanitra dia marina, mamindra fo sy mahitsy

Ny amin'ny Vatolampy, tanteraka ny asany; fa ny làlany rehetra dia amin'ny rariny avokoa. Andriamanitra mahatoky Izy, ka tsy misy ratsy ao aminy; Marina sy mahitsy Izy. —Deuteronomia 32:4

Rariny sy fitsarana no fanorenan'ny seza fiandriananao; Famindrampo sy fahamarinana no mialoha ny tavanao.

—Salamo 89:14

Fa marina Jehovah, ka fahamarinana no tiany; ny mahitsy no hahita ny tavany.

—Salamo 11:7

Andriamanitra dia Fanahy

Andriamanitra dia Fanahy; ary izay mivavaka aminy tsy maintsy mivavaka amin'ny fanahy sy ny fahamarinana. —Jaona 4:24

Ampianaro hanao ny sitraponao aho; fa Hianao no Andriamanitra; Aoka ny Fanahinao tsara no hitarihanao ahy amin'izay tany marina. —Salamo 143:10

Mendrika ny fiderantsika sy ny fivavahantsika

Andriamanitra

¹Mihirà fihiram-baovao ho an'i Jehovah; Mihirà ho an'i Jehovah, ry tany rehetra. ⁴Fa lehibe Jehovah ka mendrika hoderaina

indrindra, sady mahatahotra, fa ambonin'ny andriamanitra rehetra. ⁵Fa ny andriamanitra ny firenena dia tsinontsinona; fa Jehovah no nanao ny lanitra. ⁶Famirapiratana sy voninahitra no eo anatrehany; Hery sy fahatsaran-tarehy no ao amin'ny fitoerany masina. ⁷Ry firenena, manomeza an'i Jehovah, eny, manomeza voninahitra sy hery ho an'i Jehovah. ⁸Manomeza an'i Jehovah ny voninahitra ny anarany; Mitondrà fanatitra, ka mankanesa eo an-kianjany. ⁹Miankohofa eo anatrehan'i Jehovah amin'ny fihaingoana masina; Mangovita eo anatrehany, ry tany rehetra. ¹⁰Lazao any amin'ny jentilisa fa Jehovah no Mpanjaka; ary izao rehetra izao voaorina ka tsy hihetsika; ¹³Hitsara izao tontolo izao araka ny rariny lzy ary ny firenena amin'ny fahamarinany.

—Salamo 96:1, 4-10a, 13b

Hianao, Tomponay sy Andriamanitra, no mendrika handray ny voninahitra sy ny hafa ary ny hery; fa Hianao no nahary ny zavatra rehetra, ary noho ny sitraponao no nahanisy sy nahary azy.

—Apokalypsy 4:11

Mpanavotra antsika Andriamanitra

Izao no lazain'i Jehovah, Mpanjakan'ny Isiraely, dia Jehovah, Tompon'ny maro, Mpanavotra azy: Izaho no voalohany, ary Izaho no farany: Ka tsy misy Andriamanitra afa-tsy Izaho. —Isaia 44:6

Mijere Ahy, dia ho voavonjy hianareo, ry vazan-tany rehetra! Fa Izaho no Andriamanitra, ka tsy misy hafa. —Isaia 45:22

Fa Hianao, Tompo ô, no tsara sady mamela heloka ary be famindrampo amin'izay rehetra miantso Anao. —Salamo 86:5

Akaikin'izay manana fo mangorakoraka Jehovah ary mamonjy izay torotoro fanahy. —Salamo 34:18

Izao no lazain'i Jehovah, Mpanavotra anao, dia ny Iray Masin'ny Isiraely: Izaho, Jehovah Andriamanitrao, no nampianatra anao hahita soa sady mitarika anao amin'ny lalana tokony halehanao. —Isaia 48:17

¹Misaora an'i Jehovah, ry fanahiko; ary izay rehetra ato anatiko, misaora ny anarany masina. ²Misaora an'i Jehovah,

ry fanahiko; ary aza misy hadinoinao ny fitahiany rehetra, ³Izay mamela ny helokao rehetra, Izay manasitrana ny aretinao rehetra, ⁴Izay manavotra ny ainao tsy hidina any an-davaka, Izay manarona famindrampo sy fiantrana anao, ⁵Izay mahavoky soa ny vavanao; ny fahatanoranao mody indray toy ny an'ny voromahery. ⁶Jehovah manao fahamarinana sy fitsarana amin'izay rehetra ampahorina. ⁸Mamindra fo sy miantra Jehovah, Mahari-po sady be famindrampo. ⁹Tsy mandaha-teny mandrakariva lzy, na mitahiry fahatezerana mandrakizay. ¹⁰Tsy mba manao amintsika araka ny fahotantsika lzy, na mamaly antsika araka ny helotsika. ¹¹Fa tahaka ny hahavon'ny lanitra ambonin'ny tany no haben'ny famindrampony amin'izay matahotra Azy. ¹²Tahaka ny halavitry ny atsinanana amin'ny andrefana no halavitry ny anesorany ny fahotantsika amintsika. ¹³Tahaka ny fiantran'ny ray ny zanany no fiantran'i Jehovah izay matahotra Azy; ¹⁴Fa lzy mahalala ny toetsika ka mahatsiaro fa vovoka isika. —Salamo 103:1-6, 8-14

⁶Mitadiava an'i Jehovah, dieny mbola hita lzy, Miantsoa Azy, dieny mbola akaiky lzy. ⁷Aoka ny ratsy fanahy hahafoy ny lalany, ary ny tsy marina hahafoy ny heviny; ary aoka hiverina ho amin'i Jehovah ireny, fa hamindra fo aminy lzy, Eny, ho amin'Andriamanitsika, fa hamela heloka dia hamela heloka tokoa lzy.

—Isaia 55:6-7

⁹Ka dia Jehovah no ho fiarovana avo ho an'ny mahantra, ho fiarovana avo amin'ny andro fahoriana lzy. ¹⁰Ary hatoky Anao izay mahalala ny anaranao; fa tsy foinao izay mitady Anao, Jehovah ô.

—Salamo 9:9-10

2. MANIRY FIFANDRAISANA AMINTSIKA ANDRIAMANITRA

***Namorona ny olona araka ny endriny Andriamanitra
mba hiaina ao amin'ny fanatrehany***

²⁶Ary Andriamanitra nanao hoe: Andeha Isika hamorona olona tahaka ny endritsika, araka ny tarehintsika; ary aoka izy hanjaka amin'ny hazandrano ao amin'ny ranomasina sy ny voro-manidina

sy ny biby fiompy sy ny tany rehetra ary ny biby rehetra izay mandady na mikisaka amin'ny tany. ²⁷Ary Andriamanitra nahary ny olona tahaka ny endriny; tahaka ny endrik'Andriamanitra no namoronany azy; lahy sy vavy no namoronany azy. ²⁸Ary Andriamanitra nitso-drano azy hoe: Maroa fara sy mihabetsaha ary mamenoa ny tany, ka mampanompoa azy; ary manjakà amin'ny hazandrano ao amin'ny ranomasina sy ny voro-manidina ary ny biby rehetra izay mihetsiketsika ambonin'ny tany.

—Genesisy 1:26-28

Ary vovo-tany no namoronan'i Jehovah Andriamanitra ny olona, ary nofofoniny fofonaina mahavelona ny vavorony; dia tonga olombelona izy.

—Genesisy 2:7

Jehovah dia eo akaikin'izay rehetra miantso Azy, dia izay rehetra miantso Azy marina tokoa.

—Salamo 145:18

²³Dia izany no toriko aminareo, ²⁴dia Andriamanitra izay nanao izao tontolo izao sy ny eo aminy rehetra, izy no Tompon'ny lanitra sy ny tany ka tsy mba mitoetra ao anaty tempoly nataon-tànana, ²⁵sady tsy mba tompoin'ny tñan'olona toa mila zavatra, fa izy ihany no manome izao rehetra izao aina sy fofon-aina ary ny zavatra rehetra; ²⁶ary ny firenena rehetra avy amin'ny iray ihany dia namponeniny ambonin'ny tany rehetra, ary efa notendreny ny fotoan'andro sy ny faritry ny fonenany, ²⁷mba hitady an'Andriamanitra izy, raha tñhiny hahatsapa ka hahita Azy, kanefa tsy mba lavitra antsika rehetra izy; ²⁸fa izy no ivelomantsika sy ihetsehantsika ary iainantsika.

—Asan'ny Apostoly 17:23b-28a

3. NAMPISARAKA ANTSIKA TAMIN'ANDRIAMANITRA NY FAHOTANA

Ny fampitandreman'Andriamanitra an'i Adama

⁸Ary Jehovah Andriamanitra nanao saha tao Edena tany atsinanana, ka napetrany tao ralehilahy izay noforoniny. ⁹Ary nampanirin'i Jehovah Andriamanitra teo amin'ny tany ny hazo rehetra izay maha-te-hizaha sady tsara ho fihinana, ary ny

hazon'aina teo afovoan'ny saha sy ny hazo fahalalana ny tsara sy ny ratsy. —Genesisy 2:8-9

¹⁵Ary Jehovah Andriamanitra nitondra an-dralehilahy ka namponina azy tao amin'ny saha Edena hiasa sy hitandrina azy.

¹⁶Ary Jehovah Andriamanitra nandidy an-dralehilahy ka nanao hoe: Ny hazo rehetra eo amin'ny saha dia azonao ihinanana ihany; ¹⁷fa ny hazo fahalalana ny tsara sy ny ratsy dia aza ihinanana; fa amin'ny andro izay ihinananao azy dia ho faty tokoa hianao. —Genesisy 2:15-17

Voafitakin'ny menarana

¹Ary ny menarana dia fetsy noho ny bibi-dia rehetra izay nataon'i Jehovah Andriamanitra. Ary hoy izy tamin-dravehivavy: Hanky! efa nataon'Andriamanitra hoe: Aza ihinananao ny hazo rehetra eo amin'ny saha? ²Fa hoy ravehivavy tamin'ny menarana: Ny voan'ny hazo eo amin'ny saha dia azonay ihinanana ihany; ³fa ny voan'ny hazo eo afovoan'ny saha kosa no efa nataon'Andriamanitra hoe: Aza ihinananao na tendrenareo izany, fandrao maty hianareo. ⁴Ary hoy ny menarana tamin-dravehivavy: Tsy ho faty tsy akory hianareo; ⁵fa fantatr'Andriamanitra fa amin'izay andro hihinananareo azy dia hahiratra ny masonareo, ka ho tahaka an'Andriamanitra hianareo, hahalala ny tsara sy ny ratsy. ⁶Ary hitan-dravehivavy fa tsara ho fihinana ny hazo sady mahafinaritra ny maso ary hazo mahatsiriritra hampahahendry, dia nanotazany ny voany ka nihinanany; ary nomeny koa ny vadiny, ka dia nihinana izy. ⁷Dia nahiratra ny mason'izy mivady, ka fantany fa mitanjaka izy; ary nanjaitra ravin'aviavy izy, ka nataony sikina ho azy.

⁸Ary nandre an'i Jehovah Andriamanitra nitsangantsangana teo amin'ny saha izy, rehefa ho hariva ny andro; ary ralehilahy sy ny vadiny niery ny tavan'i Jehovah Andriamanitra tao anaty hazo tao amin'ny saha. ⁹Ary Jehovah Andriamanitra dia niantso an-dralehilahy ka nanao taminy hoe: Aiza moa hianao? ¹⁰Dia hoy izy: Nandre Anao tao amin'ny saha aho; dia natahotra aho, satria mitanjaka, ka dia niery. ¹¹Ary hoy izy: Iza moa no nanambara taminao fa mitanjaka hianao? Efa nihinananao va ny hazo izay

nandrarako anao tsy hihinananao? ¹²Dia hoy ralehilahy: Ny vehivavy izay nomenao ho namako, izy no nanome ahy ny voankazo, ka dia nihinana aho. ¹³Ary hoy Jehovah Andriamanitra tamin-dravehivavy: Inona izao nataonao izao? Dia hoy ravehivavy: Ny menarana no namitaka ahy, ka dia nihinana aho. —Genesisy 3:1-13

Izy [ny devoly] dia mpamono olona hatramin'ny taloha, ary tsy nitoetra tamin' ny marina, satria tsy misy marina aminy. Raha mandainga izy, dia ny azy no lazainy, satria mpandainga izy sady rain'ny lainga. —Jaona 8:44b

...Dia ilay menarana ela, izay atao hoe devoly sy Satana, izay mamitaka izao tontolo izao.... —Apokalypsy 12:9

Mahonona tena, miambena: fa ny devoly fahavalonareo mandehandeha tahaka ny liona mieronana mitady izay harapany.

—1 Petera 5:8

Nitondra fahoriana sy fahafatesana ny fahotana

¹⁶Ary hoy koa Izy tamin-dravehivavy: Hahabe dia hahabe ny fahoriana Aho, indrindra fa raha manan-anaka hianao; ary fahoriana no hiterahanao zanaka; ary ny vadinao no hianteheran'ny fanirianao, ka izy no hanapaka anao. ¹⁷Ary hoy koa Izy tamin'i Adama: Satria efa nihaino ny feon'ny vadinao hianao, ka hihinananao ny hazo izay nandrarako anao hoe: Aza ihinananao izany, dia voaozona ny tany noho izay nataonao; fahoriana no hihinananao ny vokany amin'ny andro rehetra hiaiananao. ¹⁸Ary haniry tsilo sy hery ho anao izy; ary hohaninao ny anana fam-boly. ¹⁹Ny fahatsembohan'ny tavanao no hahazoanao hanina mandra-piverinao any amin'ny tany; fa ny tany no nanalana anao; fa vovoka hianao, ary hiverina ho amin'ny vovoka indray hianao.

—Genesisy 3:16-19

Koa izany dia tahaka ny nidiran'ny ota avy tamin'ny olona iray ho amin'izao tontolo izao, ary ny ota no nidiran'ny fahafatesana, ka nahatratra ny olona rehetra ny fahafatesana, satria samy efa nanota izy rehetra.

—Romana 5:12

Fa samy efa nanota izy rehetra ka tsy manana ny voninahitra avy amin'Andriamanitra.

—Romana 3:23

Mitondra fisarahana mandrakizay amin'Andriamanitra ny fahotana

²²Ary hoy Jehovah Andriamanitra: Indro, ny olona efa tonga tahaka ny anankiray amintsika ka hahalala ny tsara sy ny ratsy; ary ankehitriny, andrao haninjitra ny tãnany izy, ka hakany koa ny hazon'aina, ary hohaniny, ka ho velona mandrakizay izy; ²³ka dia nesorin'i Jehovah Andriamanitra tamin'ny saha Edena izy hiasa ny tany izay nanalana azy. ²⁴Eny, noroahiny ny olona; ary nampitoeriny tany atsinanan'ny saha Edena ny kerobima sy ny lelafon'ny sabatra mihebiheby hiambina ny lalana mankany amin'ny hazon'aina. —Genesisy 3:22-24

Fa tsy Andriamanitra mankasitraka izay ratsy Hianao; Tsy hitoetra aminao ny ratsy. —Salamo 5:4

¹Indro, ny tãnan'i Jehovah tsy fohy, fa mahavonjy, ary ny sofiny tsy lalodalovana, fa mahare; ²Fa ny helokareo no efitra mampisaraka anareo amin'Andriamanitrareo, ary ny fahotanareo no mampiafina ny tavany aminareo, ka dia tsy mihaino lzy. —Isaia 59:1-2

⁶Ny masoko hijery izay olo-mahatoky amin'ny tany mba hitoerany ato amiko; Izay mandeha amin'ny lalana marina no hanompo ahy. ⁷Tsy mba hitoetra ao anatin'ny tranoko izay manao fitaka; Tsy mba hijanona eo anoloan'ny masoko izay milaza lainga. —Salamo 101:6-7

Eny tokoa, ny marina hisaotra ny anaranao; Hitoetra eo anatrehanao ny mahitsy. —Salamo 140:13

4. NAMERINA NY FIFANDRAISANTSIKA AMINY ANDRIAMANITRA AMIN'NY ALALAN'I JESOSY KRISTY ILAY TARANAKIN'NY VEHIVAVY

[Tao amin'ny saha taorian'ny nanotan'i Adama] ¹⁴Ary hoy Jehovah Andriamanitra tamin'ny menarana: Satria nanao izany hianao, koa amin'ny biby fiompy rehetra sy ny bibi-dia rehetra dia hianao no voaozona: ny kibonao no handehananao, ary

vovo-tany no hohaninao amin'ny andro rehetra hiainanao. ¹⁵Dia hampifandrafesiko hianao sy ny vehivavy ary ny taranakao sy ny taranany: izy hanorotoro ny lohanao, ary hianao kosa hanorotoro ny ombelahin-tongony. —Genesisy 3:14-15

Jesosy, ilay Adama faharoa, taranaka nampanantenaina

Fa rehefa tonga ny fotoan'andro, dia nirahin'Andriamanitra ny Zanany, nateraky ny vehivavy. —Galatiana 4:4a

¹⁸Ary ny nahaterahan'i Jesosy Kristy dia toy izao: Rehefa nanaiky Maria, renin'i Jesosy, ho fofombadin'i Josefa, raha tsy mbola nivady izy, dia hita fa nitoe-jaza avy tamin'ny Fanahy Masina izy. ¹⁹Ary Josefa vadiny, izay lehilahy marina sady tsy tahaanala baraka azy, dia nikasa hametraka azy mangingina. ²⁰Fa raha mbola nisaina izany izy, indro, nisy anjelin'ny Tompo niseho taminy tamin'ny nofy ka nanao hoe: Ry Josefa, zanak'i Davida, aza matahotra hampakatra an'i Maria vadinao; fa ny Zaza ao ankibony dia avy amin'ny Fanahy Masina, ²¹ka hiteraka Zazalahy izy, ary ny anarany hataonao hoe Jesosy; fa Izy no hamonjy ny olony ho afaka amin'ny fahotany. ²²Ary izany rehetra izany dia tonga mba hahatanteraka izay nampilazain'ny Tompo ny mpaminany hoe: ²³“Indro, ny virijina hitoe-jaza ka hiteraka zazalahy; Ary ny anarany hataon'ny olona hoe Imanoela”, izany hoe, raha adika: “Amintsika Andriamanitra”. —Matio 1:18-23

²Ary ny Fanahin'i Jehovah hitoetra ao aminy, dia ny Fanahin'ny fahendrena sy ny fahazavan-tsaina; ny Fanahin'ny fanoloran-tsaina sy ny faherezana; ny Fanahin'ny fahalalana sy ny fahatahorana an'i Jehovah; ³Ary ho hanitra ankasitrahana aminy ny fahatahorana an'i Jehovah, ka tsy hitsara araka ny hitan'ny masony Izy, na hampiaiky araka ny ren'ny sofiny; ⁴Fa hotsarainy amin'ny fahamarinana ny malahelo; ary homeny rariny ny mpandefitra amin'ny tany. —Isaia 11:2-4a

⁴⁵Ary araka izany koa no voasoratra hoe: “Adama voalohandahy natao manan-aina”; Adama farany natao fanahy mahave-

lona. ⁴⁷Ny olona voalohany avy amin'ny tany, dia tany; ny olona faharoa dia avy any an-danitra. —1 Korintiana 15:45, 47

Tsy tian'Andriamanitra hisy ho very fa hanana fiainana

Ny Tompo tsy mahela ny teny fikasany, araka izay ataon'ny sasany ho fahelany; fa mahari-po aminareo lzy, ka tsy tiany hisy ho very, fa mba ho tonga amin'ny fibebahana izy rehetra.

—2 Petera 3:9

Fa toy izao no nitiavan'Andriamanitra izao tontolo izao: nomeny ny Zanani-lahy Tokana, mba tsy ho very izay rehetra mino Azy, fa hanana fiainana mandrakizay.

—Jaona 3:16

Hamonjy antsika Andriamanitra tenany amin'ny alalan'ny Zanany Jesosy Kristy

⁹Izao no nanehoana ny fitiavan'Andriamanitra antsika: Andriamanitra naniraka ny Zanani-lahy Tokana tamin'izao tontolo izao, mba hahavelona antsika amin'ny alalany. ¹⁰Izao no fitiavana: tsy ny nitiavantsika an'Andriamanitra, fa ny nitiavany antsika, ka nira-hiny ny Zanany ho avotra noho ny fahotantsika. —1 Jaona 4:9-10

⁵Fa Zaza no teraka ho antsika, Zazalahy no omena antsika; ary ny fanapahana dia eo an-tsorony, ary ny anarany atao hoe Mahagaga, Mpanolo-tsaina, Andriamanitra Mahery, Rain'ny mandrakizay, Andrian'ny fiadanana. ⁶Ny handrosoan'ny fanapahana sy ny fiadanana dia tsy hanam-pahataperana eo amin'ny seza fiandrianan'i Davida sy ny fanjakany, mba hampioerenana sy hampitoerana azy amin'ny rariny sy ny hitsiny hatramin'izao ka ho mandrakizay; ny fahasaro-piaron'i Jehovah, Tompon'ny maro, no hahatanteraka izany.

—Isaia 9:5-6

¹⁵Izy no endrik'Andriamanitra tsy hita, ny Lahimatoa talohan'izao zavatra ary rehetra izao; ¹⁶fa tao aminy no nahariana ny zavatra rehetra any an-danitra sy ety ambonin'ny tany, dia ny hita sy ny tsy hita, na fiandrianana, na fanjakana, na fanapahana, na fahefana, lzy no nahariana ny zavatra rehetra, sady ho Azy izany; ¹⁷ary lzy no talohan'ny zavatra rehetra, sady ao aminy no

aharetan'ny zavatra rehetra. ¹⁹Fa sitraky ny Ray ho ao aminy no hitoeran'ny fahafenoana rehetra, ²⁰sady Izy no hampihavanany ny zavatra rehetra aminy, ka dia ny rany teo amin'ny hazo fijaliana no nanaovany fampihavanana—eny, Izy, hoy izaho, no fampihavanana izany, na ny etỳ ambonin'ny tany, na ny any an-danitra.

—Kolosiana 1:15-17, 19-20

⁵⁶Ravoravo Abrahama rainareo hahita ny androko; ary nahita izy ka faly. ⁵⁷Dia hoy ny Jiosy taminy: Tsy mbola dimam-polo taona akory Hianao, ka dia efa nahita an'i Abrahama va? ⁵⁸Hoy Jesosy taminy: Lazaiko aminareo marina tokoa: Fony tsy mbola ary Abrahama, dia Izy Aho.

—Jaona 8:56-58

Maty Jesosy mba hanaisotra ny fahotantsika

Nony ampitso dia nahita an'i Jesosy avy manatona azy Jaona, ka dia hoy izy: Indro ny Zanak'ondrin'Andriamanitra, Izay manaisotra ny fahotan'izao tontolo izao!

—Jaona 1:29

²³Fa samy efa nanota izy rehetra ka tsy manana ny voninahitra avy amin'Andriamanitra, ²⁴nefa hamarinina maimaimpoana amin'ny fahasoavany izy noho ny fanavotana izay ao amin'i Kristy Jesosy.

—Romana 3:23-24

⁶Fa fony mbola tsy nanan-kery isika, dia maty Kristy tamin'ny fotoan'andro hamonjy ny ratsy fanahy. ⁷Fa saiky tsy misy olona manaiky ho faty hamonjy ny marina; fa angamba hisy ihany ny sasany sahy maty aza hamonjy ny manao soa. ⁸Fa Andriamanitra mampiseho ny fitiavany antsika, fa fony mbola mpanota isika, dia maty hamonjy antsika Kristy. ⁹Koa mainka aza ny hamonjeny antsika ho afaka amin'ny fahatezerana ankehitriny, rehefa nohamarinina tamin'ny rany isika.

—Romana 5:6-9

Izay tsy nahalala ota dia efa nataony ota hamonjy antsika, mba ho tonga fahamarinan'Andriamanitra ao aminy kosa isika.

—2 Korintiana 5:21

²²“Izay tsy nanota akory, sady tsy nisy fitaka teo am-bavany”; ²⁴ary Izy nitondra ny fahotantsika tamin'ny tenany teo ambonin'ny hazo, mba ho faty ny amin'ny ota isika, fa ho velona ny amin'ny

fahamarinana; ary “ny dian-kapoka taminy no nahasitrana anareo.” —1 Petera 2:22, 24

⁴Izay rehetra manota no mandika ny lalàna; fa ny ota no fandikana ny lalàna. ⁵Ary fantatrareo fa lzy no naseho hanaisotra ny ota; ary tsy mba misy ota ao aminy. —1 Jaona 3:4-5

Isika rehetra dia samy efa nania tahaka ny ondry, samy efa nivily ho amin’ny lalantsika avy isika rehetra; ary nataon’i Jehovah nihatra taminy avokoa ny helotsika rehetra. —Isaia 53:6

Maty Jesosy mba hamerina ny fifandraisantsika amin’Andriamanitra

Fa Kristy koa aza efa nijaly indray mandeha noho ny ota, ny Marina hamonjy ny tsy marina, mba hitondra antsika ho amin’Andriamanitra, ka novonoina tamin’ny nofo, fa novelomina tamin’ny fanahy. —1 Petera 3:18

Fa raha fony mbola fahavalo aza isika no nampihavanina tamin’Andriamanitra tamin’ny nahafatesan’ny Zanany, mainka ny hamonjena antsika amin’ny fahavelomany ankehitriny, rehefa nampihavanina. —Romana 5:10

Fa izany rehetra izany dia avy amin’Andriamanitra, Izay nampihavana antsika taminy amin’ny alalan’i Kristy. —2 Korintiana 5:18a

Maty Jesosy mba hanome antsika ny fahamarinana

¹²Koa izany dia tahaka ny nidiran’ny ota avy tamin’ny olona iray ho amin’izao tontolo izao, ary ny ota no nidiran’ny fahafatesana, ka nahatratra ny olona rehetra ny fahafatesana, satria samy efa nanota izy rehetra. ¹⁵Nefa tsy tahaka ny fahadisoana ny fanomezam-pahasoavana. Fa raha ny fahadisoan’ny anankiray no nahatonga fahafatesana ho an’ny maro, mainka ny fahasoavan’Andriamanitra sy ny fanomezana amin’ny fahasoavan’ny Olona iray, dia Jesosy Kristy, no tonga be ho an’ny maro kosa. ¹⁷Fa raha ny fahadisoan’ny olona anankiray no nanjakan’ny fahafatesana noho ny nataon’ny anankiray, mainka izay maha-zo ny haben’ny fahasoavana sy ny fanomezan’ny fahamarinana

no hanjaka amin'ny fiainana noho ny nataon'ny Anankiray, dia Jesosy Kristy. ¹⁸Koa tahaka ny nahatongavan'ny fanamelohana ho an'ny olona rehetra noho ny fahadisoana iray no nahatongavan'ny fanamarinana ho amin'ny fiainana kosa ho an'ny olona rehetra noho ny fahamarinana iray. —Romana 5:12, 15, 17-18

Maty Jesosy mba hanome antsika fiainana

⁴Fa Andriamanitra, izay manan-karena amin'ny famindrampo, noho ny halehiben'ny fitiavany izay nitiavany antsika, ⁵na dia fony mbola matin'ny fahadisoana aza isika, dia nahavelona antsika niaraka tamin'i Kristy (fahasoavana no namonjena anareo); ⁶ary niara-natsangany isika ka niara-napetrany any an-danitra ao amin'i Kristy Jesosy, ⁷mba hasehony amin'ny andro ho avy ny haben'ny haren'ny fahasoavany amin'ny fahamorampanahiny amintsika ao amin'i Kristy Jesosy. ⁸Fa fahasoavana no namonjena anareo amin'ny finoana; ary tsy avy aminareo izany, fa fanomezana avy amin'Andriamanitra; ⁹tsy avy amin'ny asa, fandrao hisy hirehareha. —Efesiana 2:4-9

Koa raha misy olona ao amin'i Kristy, dia olom-baovao izy; efa lasa ny zavatra taloha, indreo, efa tonga vaovao ireo.

—2 Korintiana 5:17

Ny mpangalatra tsy avy raha tsy hangalatra sy hamono ary handringana; izaho avy mba hananany fiainana, sady hananany be dia be.

—Jaona 10:10

Nitsangana tamin'ny maty Jesosy mba handresy ny fahafatesana

¹Fa nony maraina koa tamin'ny andro voalohany amin'ny herinandro, dia nankany amin'ny fasana izy nitondra ny zavamanitra izay efa namboariny. ²Ary hitany fa, indro, ny vato efa voakodia niala tamin'ny fasana. ³Dia niditra izy, nefa tsy nahita ny fatin'i Jesosy Tompo. ⁴Ary raha mbola very hevitra tamin'izany izy, indreo, nisy roa lahy niseho taminy nitafy fitafiana manelatretra. ⁵Ary nony natahotra izy ka niankohoka, dia hoy izy roa lahy taminy: Nahoana no ato amin'ny maty no itadiavanareo

ny velona? ⁶Tsy ato lzy, fa efa nitsangana; tsarovy ny teny izay nataony taminareo, fony lzy mbola tany Galilia, hoe: ⁷Ny Zanak'olona tsy maintsy hatolotra eo an-tànan'ny mpanota ka hohomboana amin'ny hazofijaliana ary hitsangana amin'ny andro fahatelo. ⁸Dia nahatsiaro ny teniny izy. —Lioka 24:1-8

Tonga ankehitriny ny fitsarana izao tontolo izao; ankehitriny ny andrianan'izao tontolo izao no horoahina. —Jaona 12:31

⁵⁴“Ny fahafatesana noresena ka levona. ⁵⁵Ry fahafatesana ô, aiza ny fandresenao? Ry fahafatesana ô, aiza ny fanindronanao?”. ⁵⁶Fa ny ota no fanindronan'ny fahafatesana; ary ny lalàna no herin'ny ota. ⁵⁷Fa isaorana anie Andriamanitra, izay manome antsika ny fandresena amin'ny alalan'i Jesosy Kristy Tompontsika. —1 Korintiana 15:54b-57

²⁰Nefa tsy izany, fa efa natsangana tamin'ny maty tokoa Kristy ho santatr'izay efa nodi-mandry. ²¹Ary satria ny olona iray no nisehoan'ny fahafatesana, dia ny Olona iray kosa no nisehoan'ny fitsanganan'ny maty. ²²Fa tahaka ny ahafatesan'ny olona rehetra ao amin'i Adama no ahaveloman'ny olona rehetra kosa ao amin'i Kristy. —1 Korintiana 15:20-22

¹⁸Ary lzy...no voalohany, dia ny Lahimatoa tamin'ny maty, mba ho Lohany amin'ny zavatra rehetra lzy. ¹⁹Fa sitraky ny Ray ho ao aminy no hitoeran'ny fahafenoana rehetra, ²⁰sady lzy no hampihavanany ny zavatra rehetra aminy, ka dia ny rany teo amin'ny hazo fijaliana no nanaovany fampihavanana—eny, lzy, hoy izaho, no fampihavanana izany, na ny etỳ ambonin'ny tany, na ny any an-danitra. ²¹Ary hianareo, izay olon-ko azy fahiny sy fahavalo tamin'ny sainareo noho ny fanaovan-dratsy, no efa nampihavaniny ankehitriny ²²tao amin'ny tenan'ny nofony, tamin'ny fahafatesana, mba hatolony ho masina sady tsy hanantsiny amam-pondro eo anatrehany. —Kolosiana 1:18-22

Hoy Jesosy taminy: Izaho no fananganana ny maty sy fiainana; izay mino Ahy, na dia maty aza, dia ho velona indray. Ary izay

rehetra velona ka mino Ahy dia tsy ho faty mandrakizay.

—Jaona 11:25-26a

³Isaorana anie Andriamanitra, Rain'i Jesosy Kristy Tompontsi-ka, Izay niteraka antsika indray araka ny haben'ny famindrampony ho amin'ny fanantenana velona tamin'ny nitsanganan'i Jesosy Kristy tamin'ny maty, ⁴ho amin'ny lova tsy mety simba, tsy misy loto, tsy mety levona, voatahiry any an-danitra ho anareo, ⁵izay arovan'ny herin'Andriamanitra amin'ny finoana ho amin'ny famonjena efa vonona haseho any am-parany. —1 Petera 1:3-5

Niakatra any an-danitra Jesosy ary mipetraka eo an-kavanan'ny Ray

²⁰Nananganany Azy tamin'ny maty sy ny nampitoerany Azy eo amin'ny tãnany ankavanana any an-danitra, ²¹ambony lavitra noho ny fanapahana rehetra sy ny fahefana sy ny hery sy ny fanjakana ary ny anarana rehetra izay tononina, tsy amin'izao fiainana izao ihany, fa amin'ny ho avy koa. —Efesiana 1:20b-21

⁵Kristy Jesosy koa, ⁶Izay, na dia nanana ny endrik' Andriamanitra aza, dia tsy nataony ho zavatra hofikiriny mafy ny fitoviana amin'Andriamanitra, ⁷fa nofoanany ny tenany tamin'ny nakany ny endriky ny mpanompo sy ny nahatongavany ho manam-pitoviana amin'ny olona; ⁸ary rehefa hita fa nanantarehy ho olona Izy, dia nanetry tena ka nanaiky hatramin'ny fahafatesana, dia ilay fahafatesana tamin'ny hazo fijaliana. ⁹Koa izany no nanandratan'Andriamanitra Azy indrindra sy nanomezany Azy ny anarana izay ambony noho ny anarana rehetra, ¹⁰mba ho amin'ny anaran'i Jesosy no handohalehan'ny lohalika rehetra, na ny any an-danitra, na ny etỳ an-tany, na ny any ambanin'ny tany, ¹¹sy haneken'ny lela rehetra fa Jesosy Kristy no Tompo ho voninahitr'Andriamanitra Ray. —Filipiana 2:5b-11

Iza no manameloka? Kristy Jesosy no efa maty, eny, sady nitsangana tamin'ny maty koa ka mitoetra eo amin'ny tãnana ankavanan'Andriamanitra ary mifona ho antsika. —Romana 8:34

²⁴Fa lzy kosa dia manana fisoronana tsy dimbasana, satria maharitra mandrakizay lzy; ²⁵koa amin'izany dia mahavonjy tokoa izay manatona an'Andriamanitra amin'ny alalany lzy, satria velona mandrakizay hanao fifonana ho azy. —Hebreo 7:24-25

5. AFAKA MANDRAY FIAINANA VAOVAO AO AMIN'I KRISTY ISIKA

Manasa antsika hanatona azy Jesosy

¹He! hianareo rehetra izay mangetaheta, mankanesa amin'ny rano! Ary hianareo izay tsy manam-bola, avia, mividia, ka homana! ²Nahoana hianareo no mandany vola amin'izay tsy hanina, ary ny vokatry ny fisasaranareo amin'izay tsy mahavoky? Mihainoa dia mihainoa Ahy, ka hano izay tsara, dia aoka hiravoravo amin'ny matavy ny fanahinareo. ³Atongilano ny sofinareo, ka mankanesa atỳ amiko, mihainoa, dia ho velombelona ny fanahinareo.

—Isaia 55:1a, 2-3a

³⁵Hoy Jesosy taminy: Izaho no mofon'aina; izay manatona Ahy tsy mba ho noana, ary izay mino Ahy tsy mba hangetaheta intsony. ³⁷Izay rehetra omen'ny Raiko Ahy no hanatona Ahy; ary izay manatona Ahy dia tsy mba holaviko mihitsy. —Jaona 6:35, 37

²⁸Mankanesa atỳ amiko, hianareo rehetra izay miasa fatratra sy mavesatra entana, fa Izaho no hanome anareo fitsaharana. ²⁹Ento ny ziogako, ka mianara amiko; fa malemy fanahy sady tsy miavona am-po Aho; dia hahita fitsaharana ho an'ny fanahinareo hianareo. —Matio 11:28-29

Jesosy no hany làlana ahazoana fiainana mandrakizay

¹¹Ary izao no fanambarany: Fiainana mandrakizay no omen' Andriamanitra antsika, ary ao amin'ny Zanany izany fiainana izany. ¹²Izay manana ny Zanaka no manana ny fiainana; izay tsy manana ny Zanak'Andriamanitra no tsy manana ny fiainana. ¹³Izany no nosoratako aminareo, izay mino ny anaran'ny Zanak'Andriamanitra, mba ho fantatrareo fa manana fiainana mandrakizay hianareo. —1 Jaona 5:11-13

Hoy Jesosy taminy: Izaho no lâlana sy fahamarinana ary fiainana; tsy misy olona mankany amin'ny Ray, afa-tsy amin'ny alalako. —Jaona 14:6

Ary tsy misy famonjena amin'ny hafa; fa tsy misy anarana hafa ambanin'ny lanitra nomena ny olona izay hahazoantsika famonjena. —Asan'ny Apostoly 4:12

⁵Fa iray no Andriamanitra, ary iray no Mpanalalana amin'Andriamanitra sy ny olona, dia Kristy Jesosy, izay olona, ⁶sady nanolotra ny tenany ho avotra hisolo ny olona rehetra.

—1 Timoty 2:5-6a

Tsy maintsy ateraka indray isika

³Jesosy namaly ka nanao taminy hoe: Lazaiko aminao marina dia marina tokoa: Raha tsy ateraka indray ny olona, dia tsy mahazo mahita ny fanjakan'Andriamanitra. ⁴Hoy Nikodemosy taminy: Hataon'ny olona ahoana no hateraka rehefa lehibe; moa mahazo miditra any an-kibon-dreniny indray va izy ka hateraka? ⁵Jesosy namaly hoe: Lazaiko aminao marina dia marina tokoa: Raha misy olona tsy ateraky ny rano sy ny Fanahy, dia tsy mahazo miditra amin'ny fanjakan'Andriamanitra izy. ⁶Izay ateraky ny nofo dia nofo; ary izay ateraky ny Fanahy dia fanahy. ⁷Aza gaga noho ny nilazako taminao hoe: Tsy maintsy hateraka indray hianareo. ⁸Ny rivotra mitsoka amin'izay tiany, ary renao ny feony, nefa tsy fantatrao izay ihaviany na izay alehany, dia tahaka izany izay rehetra ateraky ny Fanahy. —Jaona 3:3-8

Dia ireo izay tsy nateraky ny ra, na ny sitrapon'ny nofo, na ny sitrapon'ny olona, fa naterak'Andriamanitra. —Jaona 1:13

⁴Fa rehefa niseho ny fahamoram-panahin'Andriamanitra, Mpamonjy antsika, sy ny fitiavany ny olona, ⁵dia tsy avy tamin'ny asa amin'ny fahamarinana izay nataontsika, fa araka ny famin-drampo kosa no namonjeny antsika, tamin'ny fanasan'ny fiterahana indray sy ny fanavaozan'ny Fanahy Masina, ⁶izay naidiny betsaka tamintsika tamin'ny alalan'i Jesosy Kristy, Mpamonjy

antsika, ⁷mba hohamarinina amin'ny fahasoavany isika ka ho tonga mpandova araka ny fanantenana ny fiainana mandrakizay. —Titosy 3:4-7

***Raha mibebaka amin'ny fahotantsika isika
dia hahazo famelan-keloka***

⁴Izay rehetra manota no mandika ny lalàna; fa ny ota no fandikana ny lalàna. ⁵Ary fantatrareo fa lzy no naseho hanaisotra ny ota; ary tsy mba misy ota ao aminy. —1 Jaona 3:4-5

⁴⁶Ary hoy [Jesosy] lzy taminy: Izany no voasoratra, fa Kristy hiaritra ka hitsangana amin'ny maty amin'ny andro fahatelo; ⁴⁷ary mba hotorina amin'ny anarany ny fibebahana sy ny famelan-keloka amin'ny firenena rehetra, manomboka eto Jerosalema.

—Lioka 24:46-47

Ary ny ran'i Jesosy Zanany no manadio antsika ho afaka amin'ny ota rehetra. —1 Jaona 1:7b

Raha miaiky ny fahotantsika isika, dia mahatoky sy marina lzy ka mamela ny fahotantsika sy manadio antsika ho afaka amin'ny tsi-fahamarinana rehetra. —1 Jaona 1:9

¹¹Fa tahaka ny hahavon'ny lanitra ambonin'ny tany no haben'ny famindrampony amin'izay matahotra Azy. ¹²Tahaka ny halavitry ny atsinanana amin'ny andrefana no halavitry ny anesorany ny fahotantsika amintsika. ¹³Tahaka ny fiantràn'ny ray ny zanany no fiantràn'i Jehovah izay matahotra Azy. —Salamo 103:11-13

***Raha mino isika dia hahazo ny fiainana
mandrakizay ao amin'i Kristy***

⁹Satria raha manaiky an'i Jesosy ho Tompo amin'ny vavanao hianao ary mino amin'ny fonao fa Andriamanitra efa nanangana Azy tamin'ny maty, dia hovanjena hianao. ¹⁰Fa amin'ny fo no inoana hahazoana fahamarinana, ary amin'ny vava no anekena hahazoana famonjena. —Romana 10:9-10

Fa izay rehetra nandray Azy dia nomeny hery ho tonga zanak'Andriamanitra, dia izay mino ny anarany. —Jaona 1:12

Fa izao no sitrapon'ny Raiko, dia ny hahazoan'izay rehetra mijery ny Zanaka ka mino Azy fiainana mandrakizay; ary Izaho hanangana azy amin'ny andro farany. —Jaona 6:40

6. VELONA AO AMIN'I KRISTY ISIKA

Ny dikan'ny batisa: Azy aho ary Ahy izy

A. *Tamin'ny alalan'ny batisa no nanondroan'i Jesosy ny tenany niaraka tamintsika sy nanatanterahiny ny fahamarinana rehetra*

Ary tamin'izany andro izany dia tonga avy tany Nazareta any Galilia Jesosy ka nataon'i Jaona batisa tao Jordana. —Marka 1:9

¹⁴Fa Jaona nandà Azy ka nanao hoe: Izaho no tokony hataonao batisa, ka Hianao indray va no mankaty amiko? ¹⁵Fa namaly Jesosy ka niteny taminy hoe: Ekeo ihany ankehitriny, fa izao no mety amintsika hahatanteraka ny fahamarinana rehetra. Ka dia nekeny Izy. ¹⁶Ary raha vao natao batisa Jesosy, dia niakatra avy teo amin'ny rano niaraka tamin'izay Izy; ary, indro, nisokatra taminy ny lanitra, ary hitany ny Fanahin'Andriamanitra nidina tahaka ny voromailala ka nankeo amboniny. ¹⁷Ary, injao! nisy feo avy tany an-danitra nanao hoe: Ity no Zanako malalako Izay sitrako. —Matio 3:14-17

³²Ary Jaona nanambara ka nanao hoe: Izaho nahita ny Fanahy midina avy any an-danitra tahaka ny voromailala ka nitoetra teo amboniny. ³³Ary izaho tsy nahalala Azy; fa Izay naniraka ahy hanao batisa amin'ny rano no nilaza tamiko hoe: Izay ho hitanao idinan'ny Fanahy sy itoerany, dia Izy no Mpanao batisa amin'ny Fanahy Masina. ³⁴Ary nahita aho, ka dia nanambara fa Izy no Zanak'Andriamanitra. —Jaona 1:32-34

B. *Amin'ny alalan'ny batisa, ny mpino dia mahafantatra an'i Kristy*

¹⁵Ary hoy Izy taminy: Mandehana any amin'izao tontolo izao

hianareo, ka mitoria ny filazantsara amin'ny olombelona rehetra.
¹⁶Izay mino sy atao batisa no hovanjena; fa izay tsy mety mino no hohelohina.
—Marka 16:15-16

¹⁸Ary Jesosy nanatona dia niteny taminy ka nanao hoe: Efa nomena Ahy ny fahefana rehetra any an-danitra sy etỳ an-tany;
¹⁹koa mandehana hianareo, dia ataovy mpianatra ny firenena rehetra, manao batisa azy ho amin'ny anaran'ny Ray sy ny Zanakaka ary ny Fanahy Masina ²⁰sady mampianatra azy hitandrina izay rehetra nandidikao anareo; ary, indro, Izaho momba anareo mandrakariva ambara-pahatongan'ny fahataperan'izao tontolo izao.
—Matio 28:18-20

³⁸Ary hoy Petera taminy: Mibebaha, ary aoka samy hatao batisa amin'ny anaran'i Jesosy Kristy hianareo rehetra mba hahazo famelana ny helokareo; ary hianareo handray ny fanomezana, dia ny Fanahy Masina; ³⁹fa ny teny fikasana dia ho anareo sy ny zanakareo ary ho an'izay rehetra lavitra, na iza na iza hantsoin'i Jehovah Andriamanitsika hanatona Azy.
—Asan'ny Apostoly 2:38-39

C. Nofantsihana tamin'ny hazo fijaliana, nalevina ary nitsangana tamin'ny maty niaraka tamin'i Kristy isika ho amin'ny fiainam-baovao

⁴Koa niara-nalevina taminy tamin'ny batisa ho amin'ny fahafatesana isika, mba ho tahaka ny nananganana an'i Kristy tamin'ny maty tamin'ny voninahitry ny Ray no handehanantsika kosa amin'ny fiainam-baovao. ⁵Fa raha nampiraisina taminy tamin'ny endriky ny fahafatesany isika, dia ho tahaka izany koa amin'ny fitsanganany; ⁶fa fantatsika fa ny toetsika taloha dia niaraka nohomboana taminy hanimbana ny tenan'ny ota, mba tsy hanompoantsika ny ota intsony. ⁷Fa izay efa maty dia afaka amin'ny ota. ⁸Ary raha niara-maty tamin'i Kristy isika, dia mino fa hiara-belona aminy koa isika; ⁹ary fantatsika fa rehefa nitsangana tamin'ny maty Kristy, dia tsy maty intsony lzy; tsy manan-kery aminy intso-

ny ny fahafatesana. ¹⁰Fa ny amin'ny nahafatesany, dia maty ny amin'ny ota indray mandeha izy; fa ny amin'ny ahavelomany kosa, dia velona ho an'Andriamanitra izy. ¹¹Ary aoka ho tahaka izany koa hianareo, ka ny tenanareo dia ataovy ho efa maty ny amin'ny ota, fa velona ho an'Andriamanitra ao amin'i Kristy Jesosy. ¹²Koa aza avela ny ota hanjaka amin'ny tenanareo mety maty hanarahana ny filany; ¹³ary aza manolotra ny momba ny tenanareo ho amin'ny ota ho fiadian' ny tsi-fahamarinana; fa atolory ny tenanareo ho an'Andriamanitra, toy ny efa maty nefa velona, ary ny momba ny tenanareo ho fiadian' ny fahamarinana ho an'Andriamanitra. —Romana 6:4-13

Voahombo miaraka amin'i Kristy amin'ny hazo fijaliana aho, ary tsy izaho intsony no velona, fa Kristy no velona ato anatiko; fa izay ivelomako ankehitriny eo amin' ny nofo dia ivelomako amin'ny finoana ny Zanak'Andriamanitra, Izay efa tia ahy ka nanolotra ny tenany hamonjy ahy. —Galatiana 2:20

Voahary vaovao ao amin'i Kristy Jesosy isika

¹⁶Koa dia tsy mahalala olona intsony araka ny nofo isika; eny, na dia nahafantatra an'i Kristy araka ny nofo aza isika, ankehitriny dia tsy fantatsika araka izany intsony izy. ¹⁷Koa raha misy olona ao amin'i Kristy, dia olom-baovao izy; efa lasa ny zavatra taloha, indreo, efa tonga vaovao ireo. ¹⁸Fa izany rehetra izany dia avy amin'Andriamanitra, Izay nampihavana antsika taminy amin'ny alalan'i Kristy. —2 Korintiana 5:16-18a

¹Ary hianareo dia efa novelominy, fony mbola matin'ny fahadi-soanareo sy ny fahotanareo, ²izay nalehanareo fahiny, araka ny fomban'izao tontolo izao, araka ny mpanapaka ny fanjakana eny amin'ny rivotra, dia ny fanahy izay miasa ankehitriny ao anatin'ny zanaky ny tsi-fanarahana; ³teo amin'ireo no nitondrantsika rehetra tena koa fahiny tamin'ny filan'ny nofonsika, ka nanaovantsika ny danin'ny nofo sy ny saina; ary araka ny toetsika dia zanaky ny fahatezerana toy ny sasany koa isika. ⁴Fa Andriamanitra, Izay manan-karena amin'ny famindrampo, noho ny halehiben'ny

fitiavany izay nitiavany antsika, ⁵na dia fony mbola matin'ny fahadisohana aza isika, dia nahavelona antsika niaraka tamin'i Kristy (fahasoavana no namonjena anareo); ⁶ary niara-natsangany isika ka niara-napetrany any an-danitra ao amin'i Kristy Jesosy, ⁷mba hasehony amin'ny andro ho avy ny haben'ny haren'ny fahasoavany amin'ny fahamoram-panahiny amintsika ao amin'i Kristy Jesosy. —Efesiana 2:1-7

***Ny fahasoavan'Andriamanitra no namonjena
antsika amin'ny alalan'ny finoana, fa tsy
amin'ny alalan'ny asantsika***

⁸Fa fahasoavana no namonjena anareo amin'ny finoana; ary tsy avy aminareo izany, fa fanomezana avy amin'Andriamanitra; ⁹tsy avy amin'ny asa, fandrao hisy hirehareha. —Efesiana 2:8-9

Nefa nony fantatsika fa tsy hamarinina amin'ny asan'ny lalàna ny olona, fa amin'ny finoana an'i Jesosy Kristy, dia nino an'i Kristy Jesosy koa isika mba hohamarinina amin'ny finoana an'i Kristy, fa tsy amin'ny asan'ny lalàna, satria tsy misy nofo hohamarinina amin'ny asan'ny lalàna. —Galatiana 2:16

Tsy mahafoana ny fahasoavan'Andriamanitra aho; fa raha avy amin'ny lalàna ny fahamarinana, dia maty foana Kristy.

—Galatiana 2:21

Ary hita marimarina fa amin'ny lalàna dia tsy misy olona hamarinina eo anatrehan'Andriamanitra; fa “ny marina amin'ny finoana no ho velona.” —Galatiana 3:11

¹Inona ary no holazaintsika ho efa azon'i Abrahama, razantsika araka ny nofo? ²Fa raha asa no nanamarinana an'i Abrahama, dia misy hireharehany ihany, nefa tsy amin'Andriamanitra. ³Fa ahoana hoy ny Soratra Masina? “Ary Abrahama nino an'Andriamanitra, ka dia nisaina ho fahamarinany izany.” —Romana 4:1-3

An'ny fianakavian'Andriamanitra isika

²⁶Fa hianareo rehetra dia zanak'Andriamanitra amin'ny finoana an'i Kristy Jesosy. ²⁷Fa na iza na iza hianareo no natao batisa ho

an'i Kristy dia nitafy an'i Kristy. ²⁸Tsy misy intsony na Jiosy na Grika, na andevo na tsy andevo, na lahy sy vavy; fa iray ihany hianareo rehetra ao amin'i Kristy Jesosy. —Galatiana 3:26-28

⁶Ary satria zanaka hianareo, dia nirahin'Andriamanitra ho ato am-pontsika ny Fanahin'ny Zanany, miantso hoe: Aba, Ray ô. ⁷Ka dia tsy mpanompo intsony hianao, fa zanaka: ary raha zanaka, dia mpandova koa noho ny ataon'Andriamanitra. —Galatiana 4:6-7

¹⁶Ny Fanahy dia miara-milaza amin'ny fanahintsika fa zanak'Andriamanitra isika. ¹⁷Ary raha zanaka, dia mpandova; eny, sady mpandova an'Andriamanitra no mpiray lova amin'i Kristy koa.

—Romana 8:16-17a

⁴⁸Iza moa no reniko, ary iza no rahalahiko? ⁴⁹Ary naninjitra ny tànany nanondro ny mpianany lzy ka nanao hoe: Indreo ny reniko sy ny rahalahiko; ⁵⁰Fa na iza na iza no hanao ny sitrapon'ny Raiko Izay any an-danitra, dia izy no rahalahiko sy anabaviko ary reniko.

—Matio 12:48b-50

¹⁰Fa miendrika Izay anton'ny nanaovana ny zavatra rehetra sady nahariana ny zavatra rehetra, raha mitondra zanaka maro ho any amin'ny voninahitra, ny hahatanteraka ny Tompon'ny famonjena ireo amin'ny fahoriana. ¹¹Fa iray no nihavian'izy roroa, na Izay manamasina, na izay hamasinina; koa izany no tsy mahamenatra Azy hanao ireo hoe: 'rahalahy.' —Hebreo 2:10-11

Koa dia tsy mba vahiny sy mpivahiny intsony hianareo, fa tompon-tany, mpiray fanjakana amin'ny olona masina sady anko-honan'Andriamanitra.

—Efesiana 2:19

²⁸Ary Izaho manome azy fiainana mandrakizay, ka tsy ho very izy mandrakizay, ary tsy hisy handrombaka azy amin'ny tànako. ²⁹Ny Raiko Izay nanome Ahy dia lehibe noho izy rehetra; ary tsy misy mahay mandrombaka amin'ny tànany Ray. ³⁰Izaho sy ny Ray dia iray ihany.

—Jaona 10:28-30

Fa tsy nandray ny fanahim-pahandevozana ho amin'ny tahotra indray hianareo, fa nandray ny fanahin'ny zanaka natsangana, izay iantsoantsika hoe: Aba, Ray ô.

—Romana 8:15

***Manana fiainam-baovao isika amin'ny alalan'ny
Fanahy Masina mitoetra ao anaty***

⁵Jesosy namaly hoe: Lazaiko aminao marina dia marina tokoa: Raha misy olona tsy ateraky ny rano sy ny Fanahy, dia tsy mahazo miditra amin'ny fanjakan'Andriamanitra izy. ⁶Izay ateraky ny nofo dia nofo; ary izay ateraky ny Fanahy dia fanahy. —Jaona 3:5-6

¹⁶Ary Izaho hangataka amin'ny Ray, ary Izy hanome anareo Mpananatra hafa mba ho eo aminareo mandrakizay, ¹⁷dia ny Fanahin'ny fahamarinana, Izay tsy azon'izao tontolo izao ho-raisina, satria tsy hitany na fantany; fa hianareo no mahafantatra Azy, satria mitoetra eo aminareo Izy, ary ho ao anatinareo. ¹⁸Tsy hamela anareo ho kamboty Aho; hankaty aminareo Aho. ¹⁹Satria velona Aho dia ho velona koa hianareo. ²⁰Amin'izany andro izany dia ho fantatrareo fa Izaho ao amin'ny Raiko, ary hianareo ato amiko, ary Izaho ao aminareo. ²¹Izay manana ny didiko ka mitandrana izany, dia izy no tia Ahy; ary izay tia Ahy no ho tian'ny Raiko, ary Izaho ho tia azy ka hiseho aminy. ²³Raha misy tia Ahy, dia hitandrana ny teniko izy; ary ny Raiko ho tia azy, ary hankao aminy Izahay ka honina ao aminy. —Jaona 14:16-18, 19b-21, 23b

⁹Fa hianareo tsy ao amin'ny nofo, fa ao amin'ny Fanahy, raha ny Fanahin'Andriamanitra no mitoetra ao anatinareo. Fa raha misy kosa tsy manana ny Fanahin'i Kristy dia tsy Azy izy. ¹⁰Fa raha Kristy no mitoetra ao anatinareo, na dia maty ihany aza ny tena noho ny ota, dia fiainana kosa ny fanahy noho ny fahamarinana. ¹¹Ary raha ny Fanahin'Izay nanangana an'i Jesosy tamin'ny maty no mitoetra ao anatinareo, dia Izay nanangana an'i Kristy Jesosy tamin'ny maty no hamelona ny tenanareo mety maty amin'ny Fanahiny, Izay mitoetra ao anatinareo.

—Romana 8:9-11

Ary Izy nitondra ny fahotantsika tamin'ny tenany teo ambonin'ny hazo, mba ho faty ny amin'ny ota isika, fa ho velona ny amin'ny fahamarinana; ary “ny dian-kapoka taminy no nahasitrana anareo.”

—1 Petera 2:24

Manahaka ny endrik'i Kristy isika amin'ny alalan'ny Fanahy Masina mitoetra ao anaty

²⁸Ary fantatsika fa ny zavatra rehetra dia miara-miasa hahasoana izay tia an'Andriamanitra, dia izay voantso araka ny fikasany rahateo, ²⁹satria izay fantany rahateo no notendreny koa hitovy endrika amin'ny Zanany, mba ho Lahimatoa amin'ny rahalahy maro lzy. ³⁰Ary izay notendreny no nantsoiny koa; ary izay nantsoiny no nohamarininy koa; ary izay nohamarininy no nomeny voninahitra koa. ³¹Inona ary no holazaintsika ny amin'izany zavatra izany? Raha Andriamanitra no momba antsika, iza no hahatohitra antsika? ³²Izay tsy niaro ny Zanani-lahy, fa natolony hamonjy antsika rehetra lzy, tsy homeny antsika miaraka aminy maimaimpoana koa va ny zavatra rehetra? —Romana 8:28-32

¹⁷Ary ny Tompo izany Fanahy izany; ary izay itoeran'ny Fana-hin'ny Tompo no itoeran'ny fahafahana. ¹⁸Fa isika rehetra kosa amin'ny tava tsy misarona dia mijery ny voninahitry ny Tompo toy ny amin'ny fitaratra, ka ovana hahazo izany endrika izany indrindra avy amin'ny voninahitra ka ho amin'ny voninahitra, toy ny avy amin'ny Tompo, dia ny Fanahy. —2 Korintiana 3:17-18

³Isaorana anie Andriamanitra, Rain'i Jesosy Kristy Tomponti-sika, Izay nitahy antsika tao amin'i Kristy amin'ny fitahiam-panahy rehetra any an-danitra, ⁴araka ny nifidianany antsika tao aminy, fony tsy mbola ary ny fanorenan'izao tontolo izao, mba ho masina sady tsy misy tsiny eo anatrehan'ny isika, ⁵rehefa notendreny rahateo amin'ny fitiavana isika mba ho Azy amin'ny fananganan-ana amin'ny alalan'i Jesosy Kristy, araka izay ankasitranan'ny fony, ⁶ho fiderana ny voninahitry ny fahasoavany, izay nanasoavany antsika maimaimpoana ao amin'ny Malala. —Efesiana 1:3-6

Ny Fanahy Masina no mitarika antsika ho amin'ny fahamarinana rehetra

²⁵Izany teny izany dia efa voalazako taminareo raha mbola mitoetra eto aminareo Aho; ²⁶fa ny Mpananatra, dia ny Fanahy Masina, Izay hirahin'ny Ray amin'ny anarako. Izy no hampianatra

anareo ny zavatra rehetra sy hampahatsiaro anareo ny zavatra rehetra izay nolazaiko taminareo. —Jaona 14:25-26

⁹Fa araka ny voasoratra hoe: “Izay tsy mbola hitan’ny maso ary tsy mbola ren’ny sofina, na niditra tao am-pon’ny olona, na inona na inona no efa namboarin’Andriamanitra ho an’izay tia Azy”,¹⁰dia isika no nanambaran’Andriamanitra izany tamin’ny Fanahy; fa ny Fanahy mamantatra ny zavatra rehetra, na dia ny saina lalina izay an’Andriamanitra aza. ¹¹Fa iza no olona mahalala ny ao am-pon’olona, afa-tsy ny fanahin’ny olona izay ao anatin’ny ihany? Ary toy izany koa, tsy misy mahalala ny ao am-pon’Andriamanitra afa-tsy ny Fanahin’Andriamanitra ihany. ¹²Fa isika tsy nandray ny fanahin’izao tontolo izao, fa ny Fanahy Izay avy amin’Andriamanitra, mba ho fantatsika izay zavatra nomen’Andriamanitra antsika. ¹³Izany koa no lazainay, tsy amin’ny teny ampiararin’ny fahendren’olona, fa amin’ny teny ampiararin’ny Fanahy, raha milaza zava-panahy amin’izay olona araka ny Fanahy izahay. ¹⁴Fa ny olona izay araka ny nofo ihany dia tsy mba mandray izay an’ny Fanahin’Andriamanitra; fa fahadalana aminy izany sady tsy azony, satria araka ny Fanahy no amantarana izany. ¹⁵Fa ny olona araka ny Fanahy kosa dia mahafantatra ny zavatra rehetra, kanefa izy tsy fantarin’olona. ¹⁶Fa “iza no nahafantatra ny sain’ny Tompo mba hampianatra Azy?” Fa izahay manana ny sain’i Kristy. —1 Korintiana 2:9-16

Anisan’ny Fanjakan’Andriamanitra Imandrakizay isika

¹²Ka misaotra ny Ray, Izay nampahamendrika antsika hanana anjara amin’ny lovan’ny olona masina eo amin’ny mazava, ¹³sady nahafaka antsika tamin’ny fahefan’ny maizina ka namindra antsika ho amin’ny fanjakan’ny Zanany malalany, ¹⁴Izay ananantsika fanavotana, dia ny famelana ny helotsika. —Kolosiana 1:12-14

Jesosy namaly hoe: Lazaiko aminao marina dia marina tokoa: Raha misy olona tsy ateraky ny rano sy ny Fanahy, dia tsy mahazo miditra amin’ny fanjakan’Andriamanitra izy. —Jaona 3:5

²⁰Tsy misehoseho no fihavin’ny fanjakan’Andriamanitra. ²¹Ary

ny olona tsy hanao hoe: Indro, etỳ! na erỳ! fa, indro, ny fanjakan' Andriamanitra dia ao anatinareo. —Lioka 17:20b-21

A. Tokony handray ny fahamarinana momba ny fanjakan'Andriamanitra toy ny zanaka mahatoky isika

¹⁵Ary nisy nitondra zazakely koa ho eo amin'i Jesosy mba ho-tendreny; fa raha vao nahita izany ny mpianatra, dia nandrara azy. ¹⁶Fa Jesosy niantso ireo hankeo aminy ka nanao hoe: Ave-lao ny zaza hanatona Ahy, ary aza rarana; fa an'ny toa azy ny fanjakan'Andriamanitra. ¹⁷Lazaiko aminareo marina tokoa: Na zovy na zovy no tsy handray ny fanjakan'Andriamanitra tahaka ny zaza, dia tsy ho tafiditra aminy akory. —Lioka 18:15-17

B. Tokony hikatsaka ny Fanjakan'Andriamanitra aloha isika alohan'ny zavatra hafa rehetra

⁴⁴Ary ny fanjakan'ny lanitra dia tahaka ny harena nafenina tany an-tsaha, izay hitan'olona, ka dia nafeniny; ary noho ny hafaliany dia lasa nandeha izy ka nivarotra ny fananany rehetra, dia nividy izany saha izany. ⁴⁵Ary koa, ny fanjakan'ny lanitra dia tahaka ny mpandranto anankiray izay nikatsaka vato soa; ⁴⁶ary rehefa nahita vato soa iray saro-bidy izy, dia lasa nivarotra ny fananany rehetra ka nividy azy. —Matio 13:44-46

³¹Dia aza manahy hianareo ka manao hoe: Inona no hohaninay? na: Inona no hosotroinay? na: Inona no hotafinay? ³²Fa izany rehetra izany dia katsahin'ny jentilisa fatratra; fa fantatry ny Rainareo Izay any an-danitra fa tokony ho anareo izany rehetra izany. ³³Fa katsaho aloha ny fanjakany sy ny fahamarinany, dia hanampy ho anareo izany rehetra izany. —Matio 6:31-33

³²Aza matahotra, ry ondry vitsy, fa efa sitraky ny Rainareo ny hanome anareo ny fanjakana. ³³Amidio ny fanananareo, ka manaova fiantrana; manaova kitapom-bola tsy mety ho tonta ho anareo, dia harena any an-danitra tsy mety ho lany, izay tsy azon'ny mpangalatra, sady tsy misy kalalao manimba. ³⁴Fa izay itoeran'ny harenareo, dia ho any koa ny fonareo. —Lioka 12:32-34

Tsy misy olona mahay manompo tompo roa; fa ny anankiray ho halany, ary ny anankiray ho tiany; na ny anankiray hombany, ary ny anankiray hohamavoiny. Tsy mahay manompo an'Andriamanitra sy Mamôna hianareo [vola]. —Matio 6:24

Fa ny fanjakan'Andriamanitra dia tsy amin'ny fihinanana sy ny fisotroana, fa fahamarinana sy fiadanana ary fifaliana ao amin'ny Fanahy Masina. —Romana 14:17

7. MANDEHA AMIN'NY FIAINANA VAOVAO AMIN'NY FINOANA NY ZANAK'ANDRIAMANITRA

Tahaka ny nandraisantsika Azy tamin'ny finoana no tokony andehanantsika amin'ny finoana

⁶Koa tahaka ny nandraisanareo an'i Kristy Jesosy Tompo, dia mandehana ao aminy araka izany koa, ⁷ka mamaka tsara sy miorina mafy ao aminy ary tafatoetra amin'ny finoana, toy ny efa nampianarana anareo, ka mazoto amin'ny fisaorana.

—Kolosiana 2:6-7

Mila mandeha amin'ny finoana isika, matoky an'Andriamanitra isan'andro

Ary Jesosy namaly ka nanao taminy hoe: Manàna finoana an'Andriamanitra. —Marka 11:22

²⁷Hevero ny fanirin'ny vonin-kazo; tsy mba miasa na mamoly ireny; nefa lazaiko aminareo: Na dia Solomona teo amin'ny voninahiny rehetra aza tsy mba nitafy tahaka ny anankiray amin'ireny. ²⁸Ary raha ny ahitra izay any an-tsaha anio, nefa hatao ao am-patana rahampitso, no ampitafin'Andriamanitra toy izany, tsy mainka va hianareo ry kely finoana? —Lioka 12:27-28

¹Ary ny finoana no fahatokiana ny amin'ny zavatra antenaina, fanehoana ny zavatra tsy hita. ⁶Fa raha tsy amin'ny finoana, dia tsy misy azo atao hahazoana sitraka aminy; fa izay manatona an'Andriamanitra dia tsy maintsy mino fa misy lzy sady Mpamaly soa izay mazoto mitady Azy. —Hebreo 11:1, 6

¹⁶Fa tsy menatra ny filazantsara aho; fa herin'Andriamani-
tra ho famonjena izay rehetra mino izany, amin'ny Jiosy aloha,
dia vao amin'ny jentilisa koa. ¹⁷Fa amin'izany no anehoana
fahamarinana avy amin'Andriamanitra avy amin'ny finoana sy ho
amin'ny finoana, araka ny voasoratra hoe: "Ny marina amin'ny
finoana no ho velona."
—Romana 1:16-17

⁵Matokia an'i Jehovah amin'ny fonao rehetra, fa aza miankina
amin'ny fahalalanao; ⁶Maneke Azy amin'ny alehanao rehetra, fa
lzy handamina ny lalanao.
—Ohabolana 3:5-6

Tokony hiorina mafy amin'ny finoantsika isika ka tsy hihozongozona

Fa hoy Jesosy taminy: Hainao hoe? Ny zavatra rehetra dia
hain'ny mino.
—Marka 9:23

²²Dia aoka isika hanatona amin'ny fo marina sy amin'ny
fahatokiana be avy amin'ny finoana, manana fo voadio ho afaka
amin'ny fieritreretana ratsy sy tena voasasa tamin'ny rano madio;
²³aoka hohazonintsika mafy ny fanekena ny fanantenana mba
tsy hihozongozonany (fa mahatoky llay efa nanao ny teny fika-
sana).
—Hebreo 10:22-23

⁸Tandrema fandrao misy mahalasa anareo ho babony
amin'ny filosofia sy ny famitahana foana, araka ny fampianarana
voatolotry ny razana, araka ny abidim-pianaran'izao tontolo izao,
fa tsy araka an'i Kristy. ⁹Fa ao amin'ny tenany no itoeran'ny
fahafenoan'ny fomban'Andriamanitra rehetra; ¹⁰ary hianareo
dia tanteraka ao aminy, sady lzy no Lohan'ny fanapahana sy ny
fahefana rehetra.
—Kolosiana 2:8-10

¹⁴Ary noho izany no andohalehako amin'ny Ray, ¹⁵izay aha-
zoan'ny fianakaviana rehetra any an-danitra sy etỳ an-tany ana-
rana, ¹⁶mba homeny anareo, araka ny haren'ny voninahiny, ny
mba hohatanjahina fatratra amin'ny Fanahiny ny toe-panahi-
nareo; ¹⁷mba hitoeran'i Kristy ao am-ponareo amin'ny finoana,
ka hamaka sy hiorina mafy amin'ny fitiavana hianareo, ¹⁸mba
hahaizanareo mbamin'ny olona masina rehetra ny hahafantatra

tsara izay sakany sy lavany ary hahavony sy halaliny. ¹⁹Ary hahalala ny fitiavan'i Kristy, izay mihoatra noho ny fahalalana, mba hamenoana anareo ho amin'ny fahafenoan'Andriamanitra rehetra. ²⁰Ary ho an'izay mahay manao mihoatra noho ny zavatra rehetra, eny, mihoatra lavitra noho izay rehetra angatahintsika na heverintsika aza, araka ny hery izay miasa ato amintsika, ²¹ho Azy anie ny voninahitra ao amin'ny fiangonana sy ao amin'i Kristy Jesosy hatramin'ny taranaka farany indrindra mandrakizay mandrakizay. Amena. —Efesiana 3:14-21

¹Koa amin'izany, satria efa nohamarinina tamin'ny finoana isika, dia aoka isika hanana fihavanana amin'Andriamanitra amin'ny alalan'i Jesosy Kristy Tompontosika. ²Tamin'ny alalany koa no efa nahazoantsika fanatonana amin'ny finoana ho amin'izao fahasoavana itoerantsika izao, ka dia aoka isika hifaly amin'ny fanantenana ny voninahitr'Andriamanitra. —Romana 5:1-2

¹³Miambena hianareo, tomoera tsara amin'ny finoana, aoka hitomba-ndahy, mahereza. ¹⁴Izay rehetra ataonareo dia ataovy amin'ny fitiavana. —1 Korintiana 16:13-14

³⁷Fa “Rehefa afaka kelikely, dia ho tonga llay ho avy, fa tsy hitaredretra”. ³⁸Ary “ny oloko marina, dia ho velon'ny finoana; fa raha mihemotra izy, dia tsy sitraky ny fanahiko”. ³⁹Fa isika tsy mba naman'izay mihemotra ho amin'ny fahaverezana, fa naman'izay mino ho amin'ny famonjena ny fanahy. —Hebreo 10:37-39

Fa Kristy kosa dia Zanaka manapaka ny tranon'Andriamanitra; ary isika no tranony, raha hazonintsika mafy hatramin'ny farany ny fahasahiana sy ny firavoravoana momba ny fanantenana.

—Hebreo 3:6

Mijery an'i Jesosy, Tompon'ny finoantsika sy Mpanefa azy, izay naharitra ny hazo fijaliana, fa tsy nitandro henatra, mba hahazoany ny fifaliana napetraka teo anoloany, ka dia efa mipetraka eo amin'ny ankavanana'ny seza fiandrianan'Andriamanitra Izy.

—Hebreo 12:2

Tsy maintsy mitoetra amin'ny finoana izay ninoantsika voalohany isika

²¹Ary hianareo, izay olon-ko azy fahiny sy fahavalo tamin'ny sainareo noho ny fanaovan-dratsy, no efa nampihavaniny ankehitriny ²²tao amin'ny tenan'ny nofony, tamin'ny fahafatesana, mba hatolony ho masina sady tsy hanan-tsiny amam-pondro eo anatrehany, ²³raha maharitra amin'ny finoana hianareo ka mafy orina sady tafatoetra ary tsy mety hafindra hiala amin'ny fanantenana avy amin'ny filazantsara, izay efa renareo. —Kolosiana 1:21-23a

Diniho ny tenanareo, na mitoetra amin'ny finoana hianareo, na tsia; izahao toetra ny tenanareo. Moa tsy fantatrareo va ny amin'ny tenanareo, fa ao anatinareo Jesosy Kristy, raha tsy olona nolavina hianareo? —2 Korintiana 13:5

⁹Ary izay ta-hanan-karena dia latsaka amin ny fakam-panahy sy ny fandrika ary ny filana maro tsy misy antony sady mandratra, izay mandentika ny olona ao amin'ny fandranganana sy ny fahaverezana. ¹⁰Fa ny fitiavam-bola no fototry ny ratsy rehetra, koa ny sasany izay fatra-pitady izany dia efa voavily niala tamin'ny finoana ka nanindrona ny tenany tamin'ny alahelo be. ¹¹Fa hianao kosa, ry lehilahin'Andriamanitra, mandosira izany zavatra izany, ka miezaha mitady fahamarinana, toe-panahy araka an'Andriamanitra, finoana, fitiavana, faharetana, fahalemam-panahy. ¹²Miadia ny ady tsaran'ny finoana, hazòny ny fiainana mandrakizay; fa ho amin'izany no niantsoana anao koa sy nanaovanao ilay fanekena tsara teo imason'ny vavolombelona maro.

—1 Timoty 6:9-12

Mandova ny teny fikasan'Andriamanitra isika amin'ny alalan'ny finoana

Fa raha an'i Kristy hianareo, dia taranak'i Abrahama sy mpan-dova araka ny teny fikasana. —Galatiana 3:29

¹¹Ary mbola irinay hianareo rehetra samy haneho izany fahazotoana izany mba hahazo ny fahatokiana be ny amin'ny fanantenana hatramin'ny farany; ¹²mba tsy hiketraka hianareo, fa

hanahaka ireo mandova araka ny teny fikasana amin'ny finoana sy ny faharetana. —Hebreo 6:11-12

²³Ary Andriamanitry ny fiadanana anie hahamasina anareo samy ho tanteraka, ka aoka harovana avokoa ny fanahinareo sy ny ainareo ary ny tenanareo ho tanteraka ka tsy hanan-tsiny amin'ny fihavian'i Jesosy Kristy Tompontosika. ²⁴Mahatoky Izay miantso anareo, sady Izy ihany no hanefa izany.

—1 Tesaloniana 5:23-24

Fa izay rehetra naterak'Andriamanitra dia maharesy izao tontolo izao; ary ny fandresena izay enti-maharesy izao tontolo izao dia ny finoantsika. —1 Jaona 5:4

Mihainoa, ry rahalahy malalako: Tsy efa nofidin'Andriamanitra va ny malahelo amin'izao fiainana izao ho mpanan-karena amin'ny finoana sy ho mpandova ny fanjakana nolazainy homena izay tia Azy? —Jakoba 2:5

Ny fankatoavana an'Andriamanitra sy ny Teniny dia porofon'ny finoantsika mahavonjy

Koa ny finoana dia avy amin'ny tori-teny, ary ny tori-teny kosa avy amin'ny tenin'i Kristy. —Romana 10:17

²¹Tsy izay rehetra manao amiko hoe: Tompoko, Tompoko, no hiditra amin'ny fanjakan'ny lanitra, fa izay manao ny sitrapon'ny Raiko Izay any an-danitra. ²²Maro no hanao amiko amin'izany andro izany hoe: Tompoko, Tompoko, tsy efa naminany tamin'ny anaranao va izahay? ary tsy efa namoaka demonia tamin'ny anaranao va izahay? ary tsy efa nanao asa lehibe maro tamin'ny anaranao va izahay? ²³Ary dia hambarako aminy marimarina hoe: Tsy mba fantatro akory hianareo hatrizay hatrizay; mialà amiko, hianareo mpanao meloka. ²⁴Koa amin'izany na zovy na zovy no mandre izany teniko izany ka mankatò azy, dia hoharina amin'ny lehilahy manan-tsaina izy, izay nanorina ny tranony teo ambonin'ny vatolampy. ²⁵Ary latsaka ny ranonorana, ka nisy riaka be, sady nifofofoko ny rivotra ka namely izany trano izany; nefa tsy nianjera izy, satria efa naorina teo ambonin'ny vatolampy.

²⁶Fa izay rehetra mandre izany teniko izany, nefa tsy mankatò azy, dia hoharina amin'ny lehilahy adala, izay nanorina ny tranony teo ambonin'ny fasika. ²⁷Ary latsaka ny ranonorana, ka nisy riaka be, sady nifofofono ny rivotra ka namely izany trano izany; dia nianjera izy, ka loza ny fianjerany. —Matio 7:21-27

Fa asany isika, voaforona tao amin'i Kristy Jesosy mba hanao asa tsara, izay namboarin'Andriamanitra rahateo mba handehanantsika eo aminy. —Efesiana 2:10

¹²Koa amin'izany, ry malalako, tahaka ny nanekenareo mandrakariva, tsy fony teo aminareo ihany aho, fa ankehitriny dia bebe kokoa aza raha tsy eo aho, miasà amin'ny tahotra sy ny hovitra hahatanteraka ny famonjena anareo. ¹³Fa Andriamanitra no miasa ao anatinareo na ny fikasana na ny fanaovana hahatanteraka ny sitrapony. —Filipiana 2:12-13

8. MITONDRA FIAINANA SY MANOVA ANTSIKA NY TENIN'ANDRIAMANITRA

Jesosy no Tenin'Andriamanitra tonga nofo

¹Tamin'ny voalohany ny Teny, ary ny Teny tao amin'Andriamanitra, ary ny Teny dia Andriamanitra. ²Izy dia tao amin'Andriamanitra tamin'ny voalohany. ³Izy no nahariana ny zavatra rehetra; ary raha tsy Izy dia tsy nisy nahariana izao zavatra ary izao, na dia iray aza. ⁴Izy no nisiam-piainana; ary ny fiainana no fanazavana ny olona. —Jaona 1:1-4

¹⁴Ary ny Teny dia tonga nofo ka nonina tamintsika; ary hitanay ny voninahiny, dia voninahitra mendrika ho an'ny Lahitokana avy tamin'ny Ray, sady feno fahasoavana sy fahamarinana. ¹⁸Tsy nisy nahita an'Andriamanitra na oviana na oviana; fa ny Zanakalahy Tokana, Izay ao an-tratran'ny Ray, Izy no nanambara Azy.

—Jaona 1:14, 18

Jesosy namaly ka nanao taminy hoe: Raha misy tia Ahy, dia hitandrina ny teniko izy; ary ny Raiko ho tia azy, ary hankao aminy Izahay ka honina ao aminy. —Jaona 14:23

Ny lanitra sy ny tany ho levona, fa ny teniko tsy mba ho levona. —Matio 24:35

³⁴Fa Izay nirahin'Andriamanitra dia milaza ny teniny; fa tsy misy fetra ny fanomezan'Andriamanitra ny Fanahy. ³⁵Ny Ray tia ny Zanaka ka efa nanolotra ny zavatra rehetra ho eo an-tànany. —Jaona 3:34-35

Ny Fanahin'Andriamanitra no manome fiainana ho antsika amin'ny alalan'ny Teniny

Ny fanahy no mahavelona; ny nofo tsy mahasoana na inona na inona; ny teny izay nolazaiko taminareo dia fanahy sy fiainana. —Jaona 6:63

¹²Fa velona sy mahery ny tenin'Andriamanitra ka maranitra noho ny sabatra roa lela, ka manindrona hatramin'ny fampisarahana ny aina sy ny fanahy ary ny tonona sy ny tsoka, ka mahay mamantatra ny eritreritra sy ny fisainan'ny fo. ¹³Ary tsy misy zavatra ary na inona na inona izay tsy miseho eo anatrehan'ny; fa ny zavatra rehetra dia mihanjahanja sy aharihary eo imason'izay iafaran'ny ataontsika. —Hebreo 4:12-13

²³Fa efa teraka indray hianareo, tsy tamin'ny voa mety ho lo, fa tamin'ny tsy mety ho lo, dia ny tenin'Andriamanitra, izay velona sady maharitra. ²⁴Fa “ny nofo rehetra dia tahaka ny ahitra, ary izay mety ho voninahiny dia tahaka ny vonin'ny ahitra. Malazo ny ahitra, ka mihintsana ny voniny; ²⁵Fa ny tenin'ny Tompo maharitra mandrakizay.” —1 Petera 1:23-25a

¹⁹Ary manana ny teny faminaniana atao mafy orina kokoa isika; koa raha mandinika izany hianareo, dia manao tsara, fa toy ny jiro mahazava ao amin'ny fitoerana maizimaizina izany, mandra-pahazavan'ny andro, ka miposaka ao am-ponareo ny fitarik'andro; ²⁰fa fantatrarao voalohany indrindra fa ny famoahankevitra ny faminaniana ao amin'ny Soratra Masina dia tsy efan'ny fisainan'ny olona fotsiny ihany; ²¹fa tsy nisy faminaniana avy tamin'ny sitrapon'ny olona tany aloha rehetra; fa avy tamin'

Andriamanitra no nitenenan'ny olona araka izay nitondran'ny Fanahy Masina azy. —2 Petera 1:19-21

¹⁰Fa toy ny ranonorana sy ny orampanala milatsaka avy any an-danitra ka tsy miverina any, raha tsy efa nahavonto ny tany ka nampaniry sy nampahavokatra azy, mba hahatonga voa ho an'ny mpamafy sy hanina ho an'ny mpihinana,— ¹¹Dia ho tahaka izany ny teniko izay aloaky ny vavako: Tsy hiverina amiko foana izy, raha tsy efa mahatanteraka izay sitrako ary ambinina amin'izay ampandehanako azy. —Isaia 55:10-11

¹⁹Dia nitaraina tamin'i Jehovah ireo, raha ory, ka novonjeny tamin'ny fahatereny. ²⁰Nandefa ny teniny Izy mba hahasitrana azy ary nanafaka azy tamin'ny longoa nianjerany.

—Salamo 107:19-20

Manana hery hanova antsika ny Tenin'Andriamanitra

¹⁵Ny Soratra Masina, izay mampahahendry anao ho amin'ny famonjena amin'ny finoana izay ao amin'i Kristy Jesosy. ¹⁶Izay soratra rehetra nomen'ny tsindrimandrin'Andriamanitra dia mahaso koa ho fampianarana, ho fandresen-dahatra, ho fanitsiana izay diso, ho fitaizana amin'ny fahamarinana, ¹⁷mba ho tanteraka ny olon'Andriamanitra, ho vonona tsara ho amin'ny asa tsara rehetra. —2 Timoty 3:15b-17

Fa isika rehetra kosa amin'ny tava tsy misarona dia mijery ny voninahitry ny Tompo toy ny amin'ny fitaratra, ka ovana hahazo izany endrika izany indrindra avy amin'ny voninahitra ka ho amin'ny voninahitra, toy ny avy amin'ny Tompo, dia ny Fanahy.

—2 Korintiana 3:18

²²Fa aoka ho mpankatò ny teny hianareo, fa aza mpihaino fotsiny ihany ka mamitaka ny tenanareo. ²³Fa raha misy mpihaino ny teny, nefa tsy mpankatò, dia toy ny olona mizaha ny tarehiny eo amin'ny fitaratra izy; ²⁴fa mijery ny tenany izy, dia lasa, ary miaraka amin'izay dia hadinony ny tarehiny. ²⁵Fa izay mandinika ny lalàna tanteraka, dia ny lalàn'ny fahafahana, ka maharitra amin'izany, raha tsy mpihaino manadino, fa mpanao ny

asa, dia ho sambatra amin'ny asany izany olona izany.

—Jakoba 1:22-25

¹Koa amin'izany mangataka aminareo aho, ry rahalahy, noho ny famindrampon'Andriamanitra, mba hatolotrareo ny tenanareo ho fanatitra velona, masina, sitrak'Andriamanitra, dia fanompoam-panahy mety hataonareo izany. ²Ary aza manaraka ny fanaon'izao tontolo izao; fa miova amin'ny fanavaozana ny saina, hamantaranareo ny sitrapon'Andriamanitra, dia izay tsara sady ankasitrahana no marina.

—Romana 12:1-2

¹⁵Mazotoa manolotra ny tenanao amin'Andriamanitra ho olona voazaha toetra, dia mpiasa tsy mahazo henatra, mizara tsara ny teny fahamarinana.

—2 Timoty 2:15

...Mitombo amin'ny fahasoavana sy ny fahalalana an'i Jesosy Kristy, Tompontsika sy Mpamonjy....

—2 Petera 3:18

¹Koa esory ny lolompo rehetra sy ny fitaka rehetra sy ny fi-hatsarambelatsihy sy ny fialonana ary ny fanaratsiana rehetra, ²fa tahaka ny zaza vao teraka dia maniria ny rononom-panahy tsy misy fitaka, mba hitomboanareo amin'izany ho amin'ny famonjena, ³raha tahirany “nanandrana hianareo fa tsara ny Tompo.”

—1 Petera 2:1-3

⁹Inona no hiarovan'ny zatovo ny lalan-kalehany tsy ho voaloto? Ny fitandremana araka ny teninao. ¹⁰Tamin'ny foko rehetra no nitadiavako Anao; Aza avela hivily hiala amin'ny didinao aho. ¹¹Ato am-poko no iraketako ny teninao, mba tsy hanotako aminao. ¹⁵Ny didinao no hosaintsainiko, ary hodinihiko ny lalanao. ¹⁶Ny didinao no hiravoravoako; Tsy hohadinoiko ny teninao.

—Salamo 119:9-11, 15-16

⁴⁴Dia hitandrina ny lalanao mandrakariva aho, dia mandrakizay doria. ⁴⁵Ary handeha amin'ny malalaka aho; fa ny didinao no tadiaviko.

—Salamo 119:44-45

⁸⁹Ho mandrakizay, Jehovah ô, no nanorenanao any an-danitra ny teninao. ⁹³Tsy hohadinoiko mandrakizay ny didinao; fa ireny no amelomanao ahy.

—Salamo 119:89, 93

¹⁰⁴Ny didinao no nahazoako fahalalana; Izany no ankahalako ny làlam-pitaka rehetra. ¹⁰⁵Fanilon'ny tongotro sy fanazavana ny làlako ny teninao. —Salamo 119:104-105

²⁵Dia tahaka ny nitiavan'i Kristy ny fiangonana ka nanolorany ny tenany hamonjy azy, ²⁶mba hahamasina azy amin'ny anadio-vany azy amin'ny rano fanasana amin'ny teny; ²⁷mba horaisiny ho an'ny tenany izany ho fiangonana malaza tsy misy pentimpentina, na fiketronana, na izay toy izany, fa mba ho masina sady tsy misy tsiny izy. —Efesiana 5:25b-27

⁷Raha miray amiko hianareo, ka mitoetra ao anatinareo ny teniko, dia angataho izay tianareo na inona na inona, fa ho tonga aminareo izany. ⁸Izany no ankalazana ny Raiko, mba hamoazanareo be ka ho tonga mpianatro hianareo. —Jaona 15:7-8

¹Sambatra ny olona izay tsy mandeha eo amin'ny fisainan'ny ratsy fanahy, ary tsy mijanona eo amin'ny làlana falehan'ny mpanota, ary tsy mipetraka eo amin'ny fipetrahan'ny mpaniratsira; ²Fa ny lalàn'i Jehovah no sitrany; Eny, ny lalàny no saintsaininy andro aman-alina. ³Dia tahaka ny hazo ambolena eo amoron'ny rano velona izy, Izay mamoa amin'ny fotoany, ny raviny koa tsy mba malazo; ary ny asany rehetra dia ataony lavorary avokoa.

—Salamo 1:1-3

9. MATY HOAN'NY TENA SY VELONA HOAN'NY FAHAMARINANA

Esory ny olona taloha ary itafio ny vaovao

¹⁷Koa izao no lazaiko sady ambarako ao amin'ny Tompo: ny tsy mba handehananareo intsony tahaka ny fandehan'ny jentilisa amin'ny fahafoanan'ny sainy; ¹⁸fa efa tonga maizin-tsaina sy olon-ko azy amin'ny fiainan'Andriamanitra ireny noho ny tsifahahalana ny anatiny, noho ny hamafin'ny fony, ¹⁹dia olona tsy mahalala henatra intsony ka nanolo-tena ho amin'ny fijejojejoana hanao izay fahalotoana rehetra amin'ny fieremana. ²⁰Fa hianareo kosa, dia tsy mba toy izany no nianaranareo an'i Kristy, ²¹raha

Izy tokoa no renareo ka tao aminy no nampianarana anareo, araka ny fahamarinana izay ao amin'i Jesosy, ²²mba hialanareo ny toetrareo taloha araka ny fitondrantenanareo fahiny, izay mihasiimba araka ny filan'ny fitaka; ²³fa mba hohavaozina kosa hianareo amin'ny fanahin'ny sainareo, ²⁴ary mba hotafinareo ny toetra vaovao, izay noforonina araka an'Andriamanitra amin'ny fahitsiana sy ny fahamasinana momba ny fahamarinana.

—Efesiana 4:17-24

¹⁴Fa ny fitiavan'i Kristy no manery anay, satria izao no hevitrany: maty ny Anankiray hamonjy ny olona rehetra, ka dia maty koa izy rehetra; ¹⁵ary maty hamonjy ny olona rehetra Izy, mba tsy ho velona ho an'ny tenany intsony izay velona, fa ho an'izay efa maty sy nitsangana hamonjy azy.

—2 Korintiana 5:14-15

¹Koa raha niara-natsangana tamin'i Kristy hianareo, dia katsaho ny zavatra any ambony, any amin'ny itoeran'i Kristy, izay mipetraka eo an-tànana ankavanana Andriamanitra. ²Saino ny zavatra any ambony, fa tsy ny zavatra etỳ an-tany. ³Fa efa maty hianareo, ary ny fiainanareo miara-miafina amin'i Kristy ao amin'Andriamanitra. ⁴Raha hiseho Kristy fiainantsika, dia hiara-miseho aminy koa amin'ny voninahitra hianareo.

—Kolosiana 3:1-4

¹⁹Aza mihary harena ho anareo etỳ an-tany, izay misy kalalao sy harafesina manimba, sady misy mpangalatra manamitrano sy mangalatra. ²⁰Fa miharia harena ho anareo any an-danitra, izay tsy misy kalalao na harafesina manimba, sady tsy misy mpangalatra manamitrano na mangalatra. ²¹Fa izay itoeran'ny harenao, dia ho any koa ny fonao.

—Matio 6:19-21

Hevero ho maty ny amin'ny ota ianao fa velona hoan'i Kristy

⁹Ary fantatsika fa rehefa nitsangana tamin'ny maty Kristy, dia tsy maty intsony Izy; tsy manan-kery aminy intsony ny fahafatesana. ¹⁰Fa ny amin'ny nahafatesany, dia maty ny amin'ny ota indray mandeha Izy; fa ny amin'ny ahavelomany kosa, dia velona ho

an'Andriamanitra Izy. ¹¹Ary aoka ho tahaka izany koa hianareo, ka ny tenanareo dia ataovy ho efa maty ny amin'ny ota, fa velona ho an'Andriamanitra ao amin'i Kristy Jesosy. ¹²Koa aza avela ny ota hanjaka amin'ny tenanareo mety maty hanarahanareo ny filany; ¹³ary aza manolotra ny momba ny tenanareo ho amin'ny ota ho fiadian' ny tsi-fahamarinana; fa atolory ny tenanareo ho an'Andriamanitra, toy ny efa maty nefa velona, ary ny momba ny tenanareo ho fiadian'ny fahamarinana ho an'Andriamanitra. ¹⁴Fa ny ota tsy hanan-kery aminareo; fa tsy mba ambanin'ny lalàna hianareo, fa ambanin'ny fahasoavana. —Romana 6:9-14

¹⁰Fa raha Kristy no mitoetra ao anatinareo, na dia maty ihany aza ny tena noho ny ota, dia fiainana kosa ny fanahy noho ny fahamarinana. ¹¹Ary raha ny Fanahin'Izay nanangana an'i Jesosy tamin'ny maty no mitoetra ao anatinareo, dia Izay nanangana an'i Kristy Jesosy tamin'ny maty no hamelona ny tenanareo mety maty amin'ny Fanahiny, Izay mitoetra ao anatinareo. ¹²Ary amin'izany, ry rahalahy, dia mpitrosa isika—tsy amin'ny nofo anefa, ka ho velona araka ny nofo. ¹³Fa raha velona araka ny nofo hianareo, dia tsy maintsy maty; fa raha ny Fanahy no amonoanareo ny asan'ny tena, dia ho velona hianareo. —Romana 8:10-13

¹⁰Hianareo izay tia an'i Jehovah, mankahalà ny ratsy; Miaro ny fanahin'ny olony masina Izy ary mamonjy azy amin'ny tànan'ny ratsy fanahy. ¹¹Ny fahazavana no voafafy ho an'ny marina, ary ny fifaliana ho an'ny mahitsy fo. ¹²Mifalia amin'i Jehovah, ry olomarina, ary miderà ny anarany masina. —Salamo 97:10-12

Esory ny asan'ny maizina tsy mahavokatra

⁸Fa maizina hianareo fahiny, fa efa mazava ao amin'ny Tompo kosa ankehitriny; mandehana tahaka ny zanaky ny mazava (⁹fa ny vokatry ny mazava dia ao amin'ny fahatsarana rehetra sy ny fahamarinana ary ny fahitsiana), ¹⁰mamantatra izay ankasitrahany ny Tompo. ¹¹Ary aza miray amin'ny asan'ny maizina tsy mahavoka-tsoa, fa aleo mananatra izany. ¹²Fa izay ataony ao amin'ny miafina, dia mahamenatra na dia ny milaza izany aza.

¹³Fa ny zavatra rehetra, raha anarina, dia asehon'ny mazava; fa na inona na inona aseho dia mazava. ¹⁵Koa tandremo tsara izay fandehanareo, mba tsy hitondranareo tena tahaka ny adala, fa tahaka ny hendry, ¹⁶ka hararaoty ny andro azo anaovan-tsoa, fa ratsy izao fiainana izao. ¹⁷Ary noho izany dia aza manao adaladala, fa aoka ho fantatrareo izay sitrapon'ny Tompo. ¹⁸Ary aza ho mamon-divay hianareo, fa amin'izany dia misy fanaranam-po amin'ny ratsy, fa aoka hofenoina ny Fanahy, ¹⁹ka mifampilazà amin'ny salamo sy ny fihirana ary ny tonon-kiram-panahy, dia mihira sy mikalo ao am-ponareo ho an'ny Tompo, ²⁰misaotra an'Andriamanitra Ray mandrakariva noho ny zavatra rehetra, amin'ny anaran'i Jesosy Kristy Tompontsika, ²¹sady mifanaiky amin'ny fahatahorana an'i Kristy. —Efesiana 5:8-13, 15-21

¹⁵Aza tia izao tontolo izao, na izay zavatra eo amin'izao tontolo izao. Raha misy olona tia izao tontolo izao dia tsy ao anatin'ny fityavana ny Ray. ¹⁶Fa ny zavatra rehetra eo amin'izao tontolo izao, dia ny filan'ny nofo sy ny filan'ny maso ary ny rehaka momba izao fiainana izao, dia tsy avy amin'ny Ray, fa avy amin'izao tontolo izao ihany. ¹⁷Ary mandalo izao fiainana izao sy ny filany; fa izay manao ny sitrapon'Andriamanitra no maharitra mandrakizay.

—1 Jaona 2:15-17

⁹Moa tsy fantatrareo va fa ny olona tsy marina tsy mba handova ny fanjakan'Andriamanitra? Aza mety hofitahina hianareo: fa ny mpijangajanga sy ny mpanompo sampy sy ny mpaka vadin'olona sy ny sodomita ¹⁰sy ny mpangalatra sy ny mpierina sy ny mpimamo sy ny mpanaratsy ary ny mpanao an-keriny dia tsy mba handova ny fanjakan'Andriamanitra. ¹¹Ary efa mba toy izany ihany ny sasany aminareo, saingy efa voasasa hianareo, efa nohamasinina hianareo, efa nohamarinina hianareo, tamin'ny anaran'i Jesosy Kristy Tompo sy tamin'ny Fanahin'Andriamantsika.

—1 Korintiana 6:9-11

⁷Aza mety hofitahina hianareo; Andriamanitra tsy azo vazivazina, fa izay afafin'ny olona no hojinjany. ⁸Fa izay mamafy ho an'ny nofony dia hijinja fahasimbana avy amin'ny nofo; ary izay mamafy

ho an'ny Fanahy dia hijinja fiainana mandrakizay avy amin'ny Fanahy. ⁹Ary aza mba ketraka amin'ny fanaovan-tsoa isika; fa amin'ny fotoan'andro no hijinjantsika, raha tsy reraka isika.

—Galatiana 6:7-9

10. MAHATSAPA NY FANATREHAN'ANDRIAMANITRA SY NY HERINY AMIN'NY ALALAN'NY VAVAKA

Manasa antsika ho eo amin'ny fanatrehany Andriamanitra

²Aoka hankeo anatrehany amin'ny fiderana isika; aoka hanao feo fifaliana ho Azy amin'ny fihirana isika. ³Fa Andriamanitra lehibe Jehovah, ary Mpanjaka lehibe ambonin'ny andriamanitra rehetra Izy. ⁶Avia, ka aoka hiondrika sy hiankohoka isika; aoka isika handohalika eo anatrehan'i Jehovah, Mpanao antsika; ⁷Fa Izy no Andriamanitsika; ary olona fiandriny sy ondry tandremany isika.

—Salamo 95:2-3, 6-7a

⁴Midira eo amin'ny vavahadiny amin'ny fisaorana, ary eo ankianjany amin'ny fiderana; Misaora Azy, mankalazà ny anarany, ⁵Fa tsara Jehovah; Mandrakizay ny famindrampony, ary mihatra amin'ny taranaka fara mandimby ny fahamarinany.

—Salamo 100:4-5

¹Miderà an'i Jehovah, miantsoa ny anarany; Ataovy fantatra any amin'ny firenena ny asany. ²Mihirà ho Azy, mankalazà Azy; Saintsaino ny fahagagana rehetra ataony. ³Ataovy ho reharenareo ny anarany masina; Aoka hifaly ny fon'izay mitady an'i Jehovah. ⁴Mitadiava an'i Jehovah sy ny heriny; Katsaho mandrakariva ny tavany.

—Salamo 105:1-4

¹Ny mitoetra ao amin'ny fierena izay an'ny Avo Indrindra dia monina eo ambanin'ny aloky ny Tsitoha. ²Izaho hilaza an'i Jehovah hoe: Fialofako sy batery fiarovana ho ahy Izy ary Andriamanitra, Izay hitokiako.

—Salamo 91:1-2

Eny tokoa, ny marina hisaotra ny anaranao; Hitoetra eo anatrehanao ny mahitsy.

—Salamo 140:13

Afaka manatona amin-pahasahiana eo amin'ny seza fiandrianan'ny fahasoavan'Andriamanitra isika amin'ny alalan'i Jesosy Kristy, Mpisoronantsika avo sy Lehibe

³¹Inona ary no holazaintsika ny amin'izany zavatra izany? Raha Andriamanitra no momba antsika, iza no hahatohitra antsika? ³²Izay tsy niaro ny Zanani-lahy, fa natolony hamonjy antsika rehetra lzy, tsy homeny antsika miaraka aminy maimaimpoana koa va ny zavatra rehetra? ³³Iza no hiampanga ny olomboafidin'Andriamanitra? Andriamanitra no manamarina azy. ³⁴Iza no manameloka? Kristy Jesosy no efa maty, eny, sady nitsangana tamin'ny maty koa ka mitoetra eo amin'ny tànana ankavanan'Andriamanitra ary mifona ho antsika. —Romana 8:31-34

¹⁴Koa satria isika manana Mpisoronabe lehibe, Izay lasa namaky ny lanitra, dia Jesosy, Zanak'Andriamanitra, aoka isika hihazona ilay efa nekentsika. ¹⁵Fa isika tsy manana mpisoronabe izay tsy mahay miara-mitondra ny fahalementsika, fa Izay efa nalaim-panahy tamin'ny zavatra rehetra tahaka antsika, kanefa tsy nanana ota. ¹⁶Koa aoka isika hanatona ny seza fiandrianan'ny fahasoavana amin'ny fahasahiana, mba hahazoantsika famindrampo sy hahitantsika fahasoavana ho famonjena amin'izay andro mahory. —Hebreo 4:14-16

²⁴Fa lzy kosa dia manana fisoronana tsy dimbasana, satria maharitra mandrakizay lzy; ²⁵koa amin'izany dia mahavonjy tokoa izay manatona an'Andriamanitra amin'ny alalany lzy, satria velona mandrakizay hanao fifonana ho azy. —Hebreo 7:24-25

¹⁹Koa amin'izany, ry rahalahy, satria manana fahatokiana hiditra ao amin'ny fitoerana masina isika noho ny ran'i Jesosy, ²⁰amin'izay làlana natokany ho antsika, dia làlana vaovao sady velona, namaky teo amin'ny efitra lamba, dia ny nofony, sady manana Mpisorona lehibe mitandrina ny tranon'Andriamanitra, ²²dia aoka isika hanatona amin'ny fo marina sy amin'ny fahatokiana be avy amin'ny finoana, manana fo voadio ho afaka amin'ny fieritretana ratsy sy tena voasasa tamin'ny rano madio; ²³aoka hoha-

zonintsika mafy ny fanekena ny fanantenana mba tsy hihozongonany (fa mahatoky llay efa nanao ny teny fikasana).

—Hebreo 10:19-23

Mifona ho antsika koa ny Fanahy Masina

²⁶Ary toy izany koa, ny Fanahy no mamonjy ny fahalementsika: fa tsy fantatsika izay vavaka tokony hataontsika; fa ny Fanahy no mifona amin'ny fitarainana tsy azo tononina. ²⁷Ary izay mandinika ny fo no mahalala, izay hevitra ny Fanahy, satria araka an'Andriamanitra ny fifonany ho an'ny olona masina. —Romana 8:26-27

Ny ran'i Jesosy Kristy no manadio antsika ho afaka amin'ny ota rehetra

⁶Raha hoy isika: Manana firaisana aminy isika, kanefa mandeha amin'ny maizina, dia mandainga isika ka tsy manao ny marina. ⁷Fa raha mandeha eo amin'ny mazava isika, tahaka Azy eo amin'ny mazava, dia manana firaisana isika, ary ny ran'i Jesosy Zanany no manadio antsika ho afaka amin'ny ota rehetra. ⁸Raha hoy isika: Tsy manana ota isika, dia mamita-tena, ary ny marina tsy ato anatintsika. ⁹Raha miaiky ny fahotantsika isika, dia mahatoky sy marina lzy ka mamela ny fahotantsika sy manadio antsika ho afaka amin'ny tsi-fahamarinana rehetra. —1 Jaona 1:6-9

⁶Mitadiava an'i Jehovah, dieny mbola hita lzy, Miantsoa Azy, dieny mbola akaiky lzy. ⁷Aoka ny ratsy fanahy hahafoy ny lalany, ary ny tsy marina hahafoy ny heviny; ary aoka hiverina ho amin'i Jehovah ireny, fa hamindra fo aminy lzy, Eny, ho amin'Andriamanitsika, fa hamela heloka dia hamela heloka tokoa lzy.

—Isaia 55:6-7

²³Diniho aho, Andriamanitra ô, ary fantaro ny foko; Izahao toetra aho, ary fantaro ny eritreritra; ²⁴Ary izahao na misy lalana mampahory ato anatiko, dia tariho amin'ny lalana mandrakizay aho. —Salamo 139:23-24

¹⁰Amoròny fo madio aho, Andriamanitra ô; ary havaozy hiorina

marina ny fanahiko ato anatiko. ¹²Ampodio amiko ny fifaliana amin'ny famonjenao; ary tohàny fanahy mazoto aho.

—Salamo 51:10, 12

¹¹Fa tahaka ny hahavon'ny lanitra ambonin'ny tany no haben'ny famindrampony amin'izay matahotra Azy. ¹²Tahaka ny halavitry ny atsinanana amin'ny andrefana no halavitry ny anesorany ny fahotantsika amintsika.

—Salamo 103:11-12

Mampianatra antsika ny fomba fivavaka Jesosy

⁵Ary raha mivavaka hianareo, aza mba ho tahaka ny mpihatsaravelatsihy; fa izy tia ny mivavaka mitsangana eo amin'ny synagoga sy eo an-joron-dàlana hahitan'ny olona azy. Lazaiko aminareo marina tokoa fa efa azony ny valim-pitiany. ⁶Fa hianao kosa, raha mivavaka, dia midira ao amin'ny efi-tranonao, ka rehefa voarindrinao ny varavaranao, dia mivavaha amin'ny Rainao, Izay ao amin'ny mangingina; ary ny Rainao, Izay mahita ao amin'ny mangingina, no hamaly anao. ⁷Ary raha mivavaka hianareo, dia aza mba manao teny maro foana tahaka ny jentilisa; fa ataony ho ny hamaroan'ny teniny no hihainoana azy. ⁸Koa aza manahaka azy hianareo; fa fantatry ny Rainareo izay tokony ho anareo, raha tsy mbola mangataka aminy aza hianareo.

⁹Koa amin'izany mivavaha toy izao hianareo: Rainay Izay any an-danitra, hohamasinina anie ny anaranao. ¹⁰Ho tonga anie ny fanjakanao. Hatao anie ny sitraponao etỳ an-tany tahaka ny any an-danitra. ¹¹Omeo anay anio izay hanina sahaza ho anay. ¹²Ary mamelà ny helokay tahaka ny namelanay izay meloka taminay. ¹³Ary aza mitondra anay ho amin'ny fakam-panahy, fa manafaha anay amin'ny ratsy. ¹⁴Fa raha mamela ny fahadisoan'ny olona hianareo, dia mba hamela ny anareo kosa ny Rainareo Izay any an-danitra. ¹⁵Fa raha tsy mamela ny fahadisoan'ny olona hianareo, dia tsy hamela ny fahadisoanareo ny Rainareo. —Matio 6:5-15

²¹Dia nanatona Petera ka nanao taminy hoe: Tompoko, impiry moa no hanotan'ny rahalahiko amiko, ka havelako izy?

Hatramin'ny impito va? ²²Fa hoy Jesosy taminy: Tsy lazaiko aminao hoe: Hatramin'ny impito, fa hatramin'ny impito amby fito-polo. —Matio 18:21-22

⁹Ary Jesosy nanao ity fanoharana ity tamin'ny sasany izay natoky tena ho marina ka namingavinga ny hafa; ¹⁰Nisy roa lahy niakatra teo an-kianjan'ny tempoly hivavaka; ny anankiray Fariseo, ary ny anankiray mpamory hetra. ¹¹Ilay Fariseo nitsangana ka nivavaka nitokana hoe: Andriamanitra ô, misaotra Anao aho fa tsy mba tahaka ny olona sasany, izay mpanao an-keriny, tsy marina, mpijangajanga, na tahaka io mpamory hetra io aza. ¹²Mifady indroa isan-kerinandro aho; mandoa ny fahafolon-karena amin'izay azoko rehetra aho. ¹³Fa ilay mpamory hetra kosa nijanona teny lavitra eny, sady tsy nety niandrindra ny lanitra akory, fa niteha-tratra ka nanao hoe: Andriamanitra ô, mamindrà fo amiko mpanota. ¹⁴Lazaiko aminareo: Izany lehilahy izany nidina tany an-tranony efa nohamarinina noho ny anankiray; fa izay rehetra manandra-tena no haetry, ary izay rehetra manetry tena no hasandratra. —Lioka 18:9-14

Mivavaha amin'ny toe-javatra rehetra

¹³Misy azom-pahoriana va eo aminareo? Aoka izy hivavaka. Misy faly va? Aoka izy hihira fiderana. ¹⁴Misy marary va eo aminareo? Aoka izy hampaka ny loholon' ny fiangonana; ary aoka hanosotra diloilo azy amin'ny anaran'ny Tompo ireo sady hivavaka eo aminy; ¹⁵ary ny fivavaky ny finoana dia hamonjy ilay marary, fa ny Tompo hanangana azy; ary raha nanota izy, dia havela ny helony. ¹⁶Koa mifaneke heloka hianareo, ary mifampivavaha, mba ho sitrana hianareo. Ny fiàsan'ny fivavaky ny marina dia mahery indrindra. ¹⁷Elia dia olona tahaka antsika ihany, ary izy nahery nivavaka mba tsy hilatsahan'ny ranonorana; dia tsy nilatsaka tamin'ny tany ny ranonorana telo taona sy enimbolana. ¹⁸Ary nivavaka indray izy, dia nandatsaka ranonorana ny lanitra, ka nahavokatra ny tany. —Jakoba 5:13-18

Miareta tory sy mivavaha hianareo, mba tsy hidiranareo

amin'ny fakam-panahy; mety ihany ny fanahy, fa ny nofo no tsy manan-kery. —Matio 26:41

⁷Mangataha, dia homena hianareo; mitadiava, dia hahita hianareo; dōndōny, dia hovohana hianareo. ⁸Fa izay rehetra mangataka no mahazo; ary izay mitady no mahita; ary izay mandōndōna no hovohana. ⁹Ary iza moa aminareo, raha angatahan'ny zanany mofo, no hanome azy vato? ¹⁰ary raha angatahany hazandrano, no hanome azy menarana? ¹¹Koa raha hianareo, na dia ratsy aza, mahalala hanome zava-tsoa ho an'ny zanakareo, tsy mainka va ny Rainareo izay any an-danitra no hanome zava-tsoa ho an'izay mangataka aminy? —Matio 7:7-11

⁶Aza manahy na inona na inona; fa aoka ny fivavahana sy ny fifonana mbamin'ny fisaorana no ho entinareo manambara ny fangatahanareo amin'Andriamanitra amin'ny zavatra rehetra. ⁷Ary ny fiadanan'Andriamanitra, izay mihoatra noho ny fahalalana rehetra, hiaro ny fonareo sy ny hevitrareo ao amin'i Kristy Jesosy. —Filipiana 4:6-7

⁵“Andriamanitra manohitra ny miavonavona, fa manome fahasovavana ho an'ny manetry tena.” ⁶Koa amin'izany manetre tena ambanin'ny tàna-maherin'Andriamanitra, mba hanandratany anareo amin'ny fotoan'andro; ⁷ary apetraho aminy ny fanahianareo rehetra; fa lzy no miahly anareo. —1 Petera 5:5b-7

Apetraho amin'i Jehovah ny entanao, ary lzy no hanohana anao; Tsy havelany hangozohozo mandrakizay ny marina.

—Salamo 55:22

¹⁶Mifalia mandrakariva. ¹⁷Mivavaha, ka aza mitsahatra. ¹⁸Misaora amin'ny zavatra rehetra; fa izany no sitrapon'Andriamanitra ao amin'i Kristy Jesosy ho anareo. —1 Tesaloniana 5:16-18

Mivavaha amin'ny finoana mino

¹⁴Ary izao no fahasahiana ananantsika eo anatrehany: Raha mangataka zavatra araka ny sitrapony isika, dia mihaino antsika lzy; ¹⁵ary raha fantatsika fa mihaino antsika lzy, na inona na

inona no angatahintsika, dia fantatsika fa azontsika izay angatahintsika aminy. —1 Jaona 5:14-15

²³Lazaiko aminareo marina tokoa: Na zovy na zovy no hila-za amin'ity tendrombohitra ity hoe: Mifindrà, ka mianjerà any an-dranomasina, ka tsy hiahanahana ao am-pony, fa hino fa ho tonga ny zavatra lazainy, dia ho azony izany. ²⁴Koa lazaiko aminareo: Na inona na inona tononinareo amin'ny fivavahana sy angatahinareo, dia minoa fa efa nandray hianareo, dia ho azonareo izany. ²⁵Ary raha mitsangana mivavaka hianareo, ka misy olona anananareo alahelo, dia mamelà ny helony, mba havelan'ny Rainareo Izay any an-danitra kosa ny helokareo.

—Marka 11:23-25

Ary lazaiko aminareo koa: Raha misy roa aminareo mifanaiky etỳ ambonin'ny tany na amin'inona na amin'inona ka hangataka izany, dia ho azony avy amin'ny Raiko Izay any an-danitra izany.

—Matio 18:19

²Tsy manana hianareo, satria tsy mangataka. ³Mangataka hianareo, nefa tsy mahazo ihany, satria diso fangataka, mba holaninareo amin'ny filanareo.

—Jakoba 4:2b-3

Mivavaha isan'andro hoamin'ny fahendrena sy ny fitarihan'Andriamanitra

¹Ny mitoetra ao amin'ny fierena izay an'ny Avo Indrindra dia monina eo ambanin'ny aloky ny Tsitoha. ¹⁵Hiantso Ahy izy, dia hamaly azy Aho.

—Salamo 91:1, 15a

Antsoy Aho, dia hovaliako hianao ka hampisehoako zavatra lehibe sy saro-pantarina izay tsy fantatrao.

—Jeremia 33:3

¹⁶Ary Izaho hangataka amin'ny Ray, ary Izy hanome anareo Mpananatra hafa mba ho eo aminareo mandrakizay, ¹⁷dia ny Fanahin'ny fahamarinana, Izay tsy azon'izao tontolo izao horaisina, satria tsy hitany na fantany; fa hianareo no mahafantatra Azy, satria mitoetra eo aminareo Izy, ary ho ao anatinareo.

—Jaona 14:16-17

⁹Fa araka ny voasoratra hoe: “Izay tsy mbola hitan’ny maso ary tsy mbola ren’ny sofina, na niditra tao am-pon’ny olona, na inona na inona no efa namboarin’Andriamanitra ho an’izay tia Azy”,
¹⁰dia isika no nanambaran’Andriamanitra izany tamin’ny Fanahy; fa ny Fanahy mamantatra ny zavatra rehetra, na dia ny saina lalina izay an’Andriamanitra aza. ¹²Fa isika tsy nandray ny fana-hin’izao tontolo izao, fa ny Fanahy izay avy amin’Andriamanitra, mba ho fantatsika izay zavatra nomen’Andriamanitra antsika.

—1 Korintiana 2:9-10, 12

⁵Ary raha misy hianareo tsy manam-pahendrena, aoka izy hangataka amin’Andriamanitra, Izay manome malalaka ho an’ny olona rehetra sady tsy mandatsa; ary dia homena azy izany. ⁶Nefa aoka hangataka amin’ny finoana izy ka tsy hiahanahana akory; fa izay miahahanahana dia toy ny alon-dranomasina entin’ny rivotra ka atopatopany. ⁷Fa aoka tsy hanampo handray zavatra amin’ny Tompo izany olona izany: ⁸olona miroa saina izy, miovaova amin’ny alehany rehetra.

—Jakoba 1:5-8

¹⁸Anaka, aoka tsy ho tia amin’ny teny na amin’ny lela isika, fa amin’ny asa sy amin’ny marina. ¹⁹Izany no hahafantarantsika fa avy amin’ny marina isika sy hampahatokiantsika ny fontsika eo anatrehan’ny, ²⁰na amin’inona na amin’inona no anamelohan’ny fontsika antsika, satria Andriamanitra lehibe noho ny fontsika ka mahalala ny zavatra rehetra. ²¹Ry malala, raha tsy mba manameloka antsika ny fontsika, dia manana fahasahiana eo anatrehan’Andriamanitra isika. ²²Ary na inona na inona no angatahintsika dia raisintsika aminy, satria mitandrina ny didiny sy manao izay ankasitrahana eo imasony isika. —1 Jaona 3:18-22

Miareta tory sy mivavaha hianareo, mba tsy hidiranareo amin’ny fakam-panahy; mety ihany ny fanahy, fa ny nofo no tsy manan-kery.

—Matio 26:41

Jesosy no ohatra ho antsika—mihaino sy mankato

Jehovah Tompo nanome Ahy ny lelan’ny efa mahay, mba hahazako manao teny hampahatanjaka izay reraka; ampandre-

nesiny isa-maraina isa-maraina, eny, ampandrenesiny ny sofiko hihaino tahaka ny efa mahay. —Isaia 50:4

¹⁰Ny teny izay lazaiko aminareo, dia tsy avy amiko izany lazaiko izany; fa ny Ray mitoetra ato amiko no manao ny asa.

¹²Lazaiko aminareo marina dia marina tokoa: Izay mino Ahy, ny asa ataoko no hataony koa; ary hanao asa lehibe noho izany aza izy, satria Izaho mankany amin'ny Ray. —Jaona 14:10b, 12

Satria Izaho tsy niteny ho Ahy, fa ny Ray Izay naniraka Ahy, Izy no nandidy Ahy izay holazaiko sy izay hotoriko. —Jaona 12:49

¹²Ary tamin'izany andro izany dia lasy nankany an-tendrombohitra Jesosy mba hivavaka; ary naharitra nivavaka tamin'Andriamanitra nandritra ny alina Izy. ¹³Ary nony maraina ny andro, dia nantsoiny hanatona Azy ny mpianany, ka nifidianany roa ambin'ny folo lahy, izay nataony hoe Apostoly. —Lioka 6:12-13

³⁵Ary nifoha maraina alina koa Izy, dia nivoaka nankany an-tany foana ka nivavaka tany. ³⁶Ary dia nandeha nitady Azy Simona sy ny namany. ³⁷Ary nahita Azy izy, dia nanao taminy hoe: Ny olona rehetra mitady Anao. ³⁸Fa hoy kosa Izy taminy: Andeha isika hiala hankany amin'ny tanàna akaiky, mba hitoriako teny any koa; fa izay no nahatongavako. ³⁹Dia nandeha Izy ka nitori-teny tao amin'ny synagogan'ny olona eran'i Galilia sady namoaka ny demonia. —Marka 1:35-39

¹⁵Fa mainka niely bebe kokoa ny lazany, dia niangona ny vahoaka betsaka hihaino Azy sy hositrana tamin'ny aretiny. ¹⁶Ary niala teo Izy, dia nitoetra tany an-efitra ka nivavaka. —Lioka 5:15-16

Mifady hanina mba hahita ny sitrapon'Andriamanitra tanteraka

⁵Moa fifadiana toy izany va no ankasitrahako? Dia andro hampahorian'ny olona tena? Ny hampiondrika ny lohany tahaka ny zozoro sy ny hamelatra lamba fisaonana rarahan-davenona ho fandriany,— moa izany va no ataonao hoe fifadiana sy andro ankasitranan'i Jehovah? ⁶Tsy izao va no fifadiana izay ankasitra-

hako: Dia ny hamaha ny famatoran'ny faharatsiana, sy hanabobaka ny fehin'ny zioga, sy handefa ny ampahorina ho afaka, ary hanapatapaka ny zioga rehetra? ⁷Moa tsy ny hizara ny mofonao ho an'ny noana va, sy ny hampiantrano ny ory manjenjena, ary mba hanafianao izay hitanao mitanjaka, ka tsy hihirimbelona amin'ny namanao hianao? ⁸Fa raha izany, dia hiposaka tahaka ny fahazavan'ny maraina ny fahazavanao, ary ho tonga faingana ny fahasitrananao; ny fahamarinanao ho loha-làlanao, ary ny voninahitr'i Jehovah ho vodi-làlanao. ⁹Ary amin'izany dia hiantso hianao, ary Jehovah hamaly; Eny, hanandratra ny feonao hianao, ary lzy hanao hoe: Inty Aho. —Isaia 58:5-9a

¹⁶Ary raha mifady hanina hianareo, aza mety ho tahaka ny mpihatsaravelatsihy, izay malahelo tarehy; fa mampisotisitoty ny tavany izy mba ho hitan'ny olona fa mifady. Lazaiko aminareo marina tokoa fa efa azony ny valim-pitiany. ¹⁷Fa hianao kosa, raha mifady hanina, dia hosory ny lohanao, ary sasao ny tavanao, ¹⁸mba tsy ho hitan'ny olona fa mifady, fa ho hitan'ny Rainao, Izay ao amin'ny mangingina; ary ny Rainao, Izay mahita ao amin'ny mangingina, no hamaly anao. —Matio 6:16-18

²Ary raha nanao fanompoam-pivavahana ho an'ny Tompo sy nifady hanina ireo, dia hoy ny Fanahy Masina: Atokàny ho Ahy Barnabasy sy Saoly hanao ny asa izay efa niantsoako azy. ³Ary rehefa nifady hanina sy nivavaka ary nametra-tànana taminy izy, dia nandefa azy. —Asan'ny Apostoly 13:2-3

²⁵Ary nony hitan'i Jesosy fa nihazakazaka nanatona azy ny vahoaka, dia niteny mafy ny fanahy maloto lzy ka nanao taminy hoe: Ry fanahy moana sy marenina! Izaho mandidy anao: Mivoaha aminy, ka aza miditra ao anatin'ny intsony. ²⁶Ary rehefa ninananana izy sady nampifanintontsintona mafy ilay zazalahy, dia nivoaka taminy; ary efa toy ny maty, ka dia nataon'ny maro hoe: Maty. ²⁷Fa Jesosy nandray ny tànany ka nanarina azy; dia nitsangana izy. ²⁸Ary rehefa tonga tao an-trano Jesosy, dia nanontany Azy mangingina ny mpianany hoe: Izahay tsy nahavoaka azy. ²⁹Ary hoy lzy taminy: Iny karazana iny tsy mba azo

avoaka na amin'inona na amin'inona, afa-tsy amin'ny fivavahana ihany. —Marka 9:25-29

Ary rehefa [Paoly sy Barnabasy] nanendry loholona teo amin'ny isam-piangonana izy, dia nivavaka sady nifady hanina ka dia nanolotra azy ho an'ny Tompo Izay efa ninoany.

—Asan'ny Apostoly 14:23

11. MIAINA AO AMIN'NY FIFANDRAISANA MIARAKA AMIN'NY RAY SY JESOSY KRISTY ARY NY FIANGONANY

Raha mandeha ao amin'ny mazava isika dia manana fifandraisana amin'ny hafa

Ary Jesosy niteny tamin'ny olona indray ka nanao hoe: Izaho no fahazavan'izao tontolo izao; izay manaraka Ahy tsy mba handeha amin'ny maizina, fa hanana ny fahazavan'aina.

—Jaona 8:12

³Izay efa hitanay sy renay no ambaranay aminareo, mba hazoanareo firaisana aminay koa; ary ny firaisanay dia amin'ny Ray sy amin'i Jesosy Kristy Zanany. ⁴Ary izao zavatra izao no soratanay, mba ho tanteraka ny fifaliantika. —1 Jaona 1:3-4

⁵Ary izao no teny renay taminy ka ambaranay aminareo: Andriamanitra dia mazava, ary tsy misy maizina akory ao aminy. ⁶Raha hoy isika: Manana firaisana aminy isika, kanefa mandeha amin'ny maizina, dia mandainga isika ka tsy manao ny marina. ⁷Fa raha mandeha eo amin'ny mazava isika, tahaka Azy eo amin'ny mazava, dia manana firaisana isika, ary ny ran'i Jesosy Zanany no manadio antsika ho afaka amin'ny ota rehetra. —1 Jaona 1:5-7

³Ary izao no ahafantarantsika fa mahalala Azy isika, dia ny fitandremana ny didiny. ⁴Izay manao hoe: Fantatro lzy, nefa tsy mitandrina ny didiny, dia mpandainga, ary ny marina tsy ao anatiny. ⁵Fa na iza na iza mitandrina ny teniny, dia tanteraka ao aminy marina tokoa ny fitiavana an'Andriamanitra; izany no aha-

fantarantsika fa ao aminy isika. ⁶Izay milaza fa mitoetra ao aminy izy, dia tsy maintsy mandeha toy izay nandehanany koa. ⁹Izay milaza fa ao amin'ny mazava izy, kanefa mankahala ny rahalahiny, dia mbola ao amin'ny maizina ihany. ¹⁰Izay tia ny rahalahiny no mitoetra ao amin'ny mazava, ka tsy misy fahatafintohinana ao aminy. ¹¹Fa izay mankahala ny rahalahiny dia ao amin'ny maizina ary mandeha ao amin'ny maizina ka tsy mahalala izay alehany, satria ny maizina no efa nahajamba ny masonry. —1 Jaona 2:3-6, 9-11

¹Koa raha misy famporisihana ao amin'i Kristy, raha misy fampiononana avy amin'ny fitiavana, raha misy firaisana amin'ny Fanahy, raha misy famindrampo sy fiantrana, ²dia tanteraho ny fifaliako, mba hirainganareo saina, miray fitiavana, miray fo, miray hevitra, ³tsy manao na inona na inona amin'ny fifampindanianana, na mandrani-tena foana fa amin'ny fanetren-tena dia aoka samy hanao ny namany ho mihoatra noho ny tenany. ⁴Aza samy mihevitra ny azy ihany, fa samy ny an'ny namany koa. —Filipiana 2:1-4

¹⁴Aza mety hasiana zioga tsy antonona anareo hikambanana amin'ny tsy mino. Fa inona no iraisan'ny fahamarinana sy ny fahotana? Ary inona no iombonan'ny mazava sy ny maizina? ¹⁶Fa isika no tempolin'Andriamanitra velona, araka ny nataon'Andriamanitra hoe: “Honina eo aminy Aho sy handeha eo aminy; ary ho Andriamaniny Aho, ary izy ho oloko. ¹⁷Koa mivoaha eo aminy hianareo, ka misaraha aminy, hoy Jehovah, ary aza manendry izay zavatra tsy madio; ary Izaho dia handray anareo. ¹⁸Ary ho Rainareo Aho, ary hianareo ho zanako-lahy sy ho zanako-vavy, hoy Jehovah Tsitoha.” —2 Korintiana 6:14, 16b-18

Tempolin'ny Fanahy Masina isika

¹⁸Fa Izy no ananantsika roa tonta fanatonana amin'ny Fanahy iray ho any amin'ny Ray. ¹⁹Koa dia tsy mba vahiny sy mpivahiny intsony hianareo, fa tompo-tany, mpiray fanjakana amin'ny olona masina sady ankohonan'Andriamanitra, ²⁰natsangana teo ambonin'ny fanorenan'ny Apostoly sy ny mpaminany, ary Kristy

Jesosy no fehizoro indrindra; ²¹ao aminy no irafetan'ny rafitra rehetra, mitombo tsara ho tempoly masina ao amin'ny Tompo. ²²Ary ao aminy no miaraka aorina koa hianareo ho fonenan'Andriamanitra amin'ny Fanahy. —Efesiana 2:18-22

¹¹Fa tsy misy mahay manao fanorenana hafa afa-tsy izay natao, dia Jesosy Kristy. ¹²Ary raha misy mandrafitra volamena, na volafotsy, na vato tsara, na hazo, na bozaka, na mololo, eo ambonin'ny fanorenana, ¹³dia haseho avokoa ny asan'ny olona rehetra; fa ny andro no hampiseho azy, satria haseho amin'afo izany andro izany, ka dia hozahan-toetra, amin'ny afo ny asan'ny olona rehetra. ¹⁴Raha maharitra ny asan'ny olona, izay narafiny teo amboniny, dia handray valim-pitia izy. ¹⁵Raha ho levon'ny afo ny asan'ny olona, dia ho fatiantoka izy; fa ny tenany kosa dia hovanjena, nefa toy ny avy ao amin'ny afo ihany izy. ¹⁶Tsy fantatrareo va fa tempolin'Andriamanitra hianareo, ary ny Fanahin'Andriamanitra mitoetra ao anatinareo? ¹⁷Raha misy manimba ny tempolin'Andriamanitra, dia mba hosimban'Andriamanitra kosa izy; fa masina ny tempolin'Andriamanitra, dia hianareo izany. —1 Korintiana 3:11-17

¹⁹Ahoana ary? Moa tsy fantatrareo fa ny tenanareo dia tempolin'ny Fanahy Masina, Izay ao anatinareo sady efa azonareo tamin'Andriamanitra? ka tsy tompon'ny tenanareo hianareo. ²⁰Fa olom-boavidy hianareo, koa dia mankalazà an'Andriamanitra amin'ny tenanareo. —1 Korintiana 6:19-20

⁴Izay hatoninareo toy ny vato velona, “nolavin'ny olona, fa voafidin'Andriamanitra sady soa,” ⁵ka dia atsangana koa hianareo tahaka ny vato velona ho trano fanahy, ho fisoronana masina, hanatitra fanati-panahy sitrak'Andriamanitra amin'ny alalan'i Jesosy Kristy. ⁹Fa hianareo kosa dia taranaka voafidy, “fanjakà-mpisorona, firenena masina”, olona nalain'Andriamanitra ho an'ny tenany, mba hilazanareo ny hatsaran'ilay niantso anareo hiala tamin'ny maizina ho amin'ny fahazavany mahaga; ¹⁰dia hianareo izay tsy firenena akory fahiny, fa ankehitriny

efa olon'Andriamanitra; izay tsy namindrana fo, fa ankehitriny efa namindrana fo. —1 Petera 2:4-5, 9-10

Isika no tenan'i Kristy sy ny fiangonany

²²Dia nampanaiky ny zavatra rehetra ho eo ambanin'ny tongony Izy ka nanao Azy ho Lohany manapaka ny zavatra rehetra ho an'ny fiangonana, ²³izay tenany, dia ny fahafenoan'Izay mameno izao zavatra rehetra izao amin'ny rehetra. —Efesiana 1:22-23

¹⁵Ary hoy Jesosy taminy: Fa hianareo kosa manao Ahy ho iza? ¹⁶Ary namaly Simona Petera ka nanao hoe: Hianao no Kristy, Zanak'Andriamanitra velona. ¹⁷Dia namaly Jesosy ka nanao taminy hoe: Sambatra hianao, ry Simona Bar-jona; fa tsy nofo aman-dra no naneho anao izany, fa ny Raiko Izay any andanitra. ¹⁸Ary Izaho milaza aminao koa: Hianao no Petera, ary ambonin'ity vatolampy ity no haoriko ny fiangonako; ary ny vava-hadin'ny fiainan-tsi-hita tsy haharesy azy. —Matio 16:15-18

Fa na aiza na aiza no iangonan'ny roa na telo amin'ny anarako, dia ao afovoany Aho. —Matio 18:20

¹⁵Ary aoka hanapaka ao am-ponareo ny fiadanan'i Kristy, fa ho amin'izany no niantsoana anareo ho tena iray; ary aoka ho feno fisaorana hianareo. ¹⁶Aoka ny tenin'i Kristy hitoetra betsaka ao aminareo amin'ny fahendrena rehetra, dia mifampianara ka mifananara amin'ny salamo sy ny fihirana ary ny tonon-kirampahy, mihira amin'ny fahasoavana ao am-ponareo ho an'Andriamanitra. ¹⁷Ary na inona na inona ataonareo, na amin'ny teny, na amin'ny asa, dia ataovy amin'ny anaran'i Jesosy Tompo izany rehetra izany, ka misaora an'Andriamanitra Ray amin'ny alalany. —Kolosiana 3:15-17

¹Ary noho izany izaho, mpifatotra noho ny amin'ny Tompo, dia mangataka aminareo mba handeha mendrika ny fiantsoana izay niantsoana anareo, ²amin'ny fanetren-tena rehetra sy ny fahalemam-panahy, amin'ny fahari-po mifandefitra amin'ny fitiavana,

³mazoto mitana ny firaisana avy amin'ny Fanahy amin'ny fehim-pihavanana. ⁴Iray ny tena, ary iray ny Fanahy, dia toy ny niantsoana anareo ho amin'ny fanantenana iray momba ny fiantsoana anareo; ⁵iray ny Tompo, iray ny finoana, iray ny batisa, ⁶iray Andriamanitra sady Rain'izy rehetra, izay ambonin'izy rehetra sy manerana azy rehetra ary ao amin'izy rehetra. —Efesiana 4:1-6

¹²Fa tahaka ny tena iray ihany, anefa maro no momba ny tena, ary ireo rehetra momba ny tena ireo, na dia maro aza, dia tena iray ihany, dia tahaka izany koa Kristy. ¹³Fa Fanahy iray ihany no nanaovam-batista antsika rehetra ho tena iray, na Jiosy na jentilisa, na andevo na tsy andevo; ary isika rehetra dia efa nampisotroina ny Fanahy iray. ¹⁴Nefa ny momba ny tena tsy iray, fa maro.
—1 Korintiana 12:12-14

²¹Ary ny maso tsy mahazo manao amin'ny tãnana hoe: Tsy mila anao aho; ary indray, ny loha tsy mahazo manao amin'ny tongotra hoe: Tsy mila anareo aho. ²²Fa mainka ilaintsika aza ny momba ny tena izay atao ho malemilemy kokoa noho ny sasany. ²³Ary ny momba ny tena izay ataontsika ho kely voninahitra kokoa dia tafiantsika voninahitra bebe kokoa; ary izay tsy misy haja amin'ny momba ny tenantsika no hajaintsika kokoa; ²⁴fa tsy mila izany ny efa misy haja rahateo amin'ny momba ny tenantsika. Fa tamin'ny nanamboaran'Andriamanitra ny tena, dia izay kely voninahitra no nomeny voninahitra bebe kokoa, ²⁵mba tsy hisy fisarahana eo amin'ny tena, fa mba hifampiahny ny momba ny tena rehetra. ²⁶Ary raha mijaly ny anankiray amin'ny momba ny tena, dia miara-mijaly avokoa izay rehetra momba ny tena; fa raha omem-boninahitra kosa ny anankiray amin'ny momba ny tena, dia miara-mifaly avokoa izay rehetra momba ny tena. ²⁷Ary hianareo no tenan'i Kristy, ka samy momba ny tenany avokoa araka ny anjaranareo avy.
—1 Korintiana 12:21-27

⁴Zarazaraina ho samy hafa ny fanomezam-pahasoavana, nefa ny Fanahy dia iray ihany. ⁵Ary zarazaraina ho samy hafa ny fanompoana, nefa ny Tompo dia iray ihany. ⁶Ary zarazaraina

ho samy hafa ny asa, nefa Andriamanitra dia iray ihany, Izay miasa ny zavatra rehetra amin'ny olona rehetra. ⁷Ary izy rehetra dia samy nomena ny fampisehoana ny Fanahy hahasoa. ⁸Fa ny anankiray nomen'ny Fanahy teny fahendrena, ary ny anankiray teny fahalalana, araka izany Fanahy izany ihany, ⁹ary ny anankiray finoana, amin'izany Fanahy izany ihany, ary ny anankiray fanomezam-pahasoavana ho enti-mahasitrana, amin'izany Fanahy iray izany ihany, ¹⁰ary ny anankiray ny manao fahagagana, ary ny anankiray ny maminany, ary ny anankiray ny mahafantatra fanahy samy hafa, ary ny anankiray ny miteny amin'ny fiteny samy hafa tsy fantatra, ary ny anankiray ny mandika fiteny tsy fantatra. ¹¹Ireo rehetra ireo dia asan'ny Fanahy iray ihany, zarazarainy ho azy rehetra avy araka ny sitrapony. —1 Korintiana 12:4-11

¹¹Ary izy no nanome ny sasany ho Apostoly, ary ny sasany ho mpaminany, ary ny sasany ho evanjelista, ary ny sasany ho mpiandry sy mpampianatra, ¹²ho fanatanterahana ny olona masina, ho amin'ny asan'ny fanompoana amin'ny fiangonana, ho amin'ny fampandrosoana ny tenan'i Kristy, ¹³mandrapahatongantsika rehetra ho amin'ny firaisan'ny finoana sy ny fahalalana tsara ny Zanak'Andriamanitra, ka ho lehilahy lehibe, mahatratra ny ohatry ny halehiben'ny fahafenoan'i Kristy; ¹⁴mba tsy ho zaza intsony isika, ka ahilangilana sy ampitambo-imbolenin'ny rivotry ny fampianarana samy hafa rehetra amin'ny saim-petsy ataon'ny olona sy ny fihendreny hahatanteraka ny hevitra ny famitahana; ¹⁵fa mba hanaraka ny marina amin'ny fitiavana ka hitombo amin'ny ny zavatra rehetra ho amin'Izay Loha, dia Kristy; ¹⁶Izy no itomboan'ny tena rehetra (izay akambana sy ampiraisina tsara) noho ny fifanomboan'ny isan-tonony, araka ny fiàsan'izay rehetra momba azy amin'izay mety ho anjara-asany avy ka hampandrosoany ny tenany amin'ny fitiavana.

—Efesiana 4:11-16

⁹Dia ilay voàfina hatramin'ny nanaovana izao tontolo izao tao amin'Andriamanitra, Izay nanao ny zavatra rehetra; ¹⁰mba

hampahafantarina ireo fanapahana sy fahefana any an-danitra amin'izao ankehitriny izao ny mahamaro samy hafa ny fahendren' Andriamanitra amin'ny fitondrany ny fiangonana, ¹¹araka ny fikasana hatrizay hatrizay izay nataony tao amin'i Kristy Jesosy Tompontsika. —Efesiana 3:9b-11

Ho Azy anie ny voninahitra ao amin'ny fiangonana sy ao amin'i Kristy Jesosy hatramin'ny taranaka farany indrindra mandrakizay mandrakizay. Amena. —Efesiana 3:21

Fiombonana—mpiombona amin'ny vatana sy ny ran'i Kristy isika

⁵³Fa hoy Jesosy taminy: Lazaiko aminareo marina dia marina tokoa: Raha tsy mihinana ny nofon'ny Zanak'olona sy misotro ny rany hianareo, dia tsy manana fiainana ao aminareo. ⁵⁶Izay mihinana ny nofoko sy misotro ny rako no mitoetra ao amiko, ary izaho kosa ao aminy. ⁵⁷Ary tahaka ny nanirahan'ny Ray velona Ahy, ary izaho koa velona amin'ny Ray, dia tahaka izany koa izay mihinana Ahy no ho velona amiko. ⁶¹Ary fantatr'i Jesosy tao am-pony fa nimonomonona tamin'izany ny mpianany, ka dia hoy lzy taminy: Mahatafintohina anareo va izay? ⁶²Mainka raha mahita ny Zanak'olona miakatra ho any amin'izay nitoerany taloha hianareo. ⁶³Ny fanahy no mahavelona; ny nofo tsy mahasoana inona na inona; ny teny izay nolazaiko taminareo dia fanahy sy fiainana. —Jaona 6:53, 56-57, 61-63

¹⁶Ny kapoaky ny fisaorana izay isaorantsika, tsy firaisana amin'ny ran'i Kristy va izany? Ny mofo izay vakintsika, tsy firaisina amin'ny tenan'i Kristy va izany? ¹⁷Satria iray ihany ny mofo, dia tena iray ihany isika na dia maro aza; fa isika rehetra dia samy mandray amin'izany mofo iray izany avokoa. —1 Korintiana 10:16-17

²⁶Ary raha mbola nihinana izy, dia nandray mofo Jesosy, ka nony efa nisaotra lzy, dia novakiny ka natolony ny mpianatra, ary hoy lzy: Raiso, hano, ity no tenako. ²⁷Ary nandray kapoaka lzy, ka nony efa nisaotra, dia natolony azy ka nataony hoe: Sotroinareo

rehetra ity; ²⁸fa ity no rako, dia ny amin'ny fanekena, izay alatsaka ho an'ny maro ho famelan-keloka. ²⁹Ary lazaiko aminareo fa hatramin'izao dia tsy mba hisotro itony vokatry ny voaloboka, itony intsony Aho mandra-pihavin'ny andro hiarahako misotro izay vaovao aminareo any amin'ny fanjakan'ny Raiko.

—Matio 26:26-29

²³Jesosy Tompo tamin'iny alina iny izay namadihana Azy, dia nandray mofo, ²⁴ary rehefa nisaotra lzy, dia novakiny, ka hoy lzy: Ity no tenako ho anareo; izao no ataovy ho fahatsiarovana Ahy. ²⁵Dia araka izany koa ny kapoaka, rehefa nihinana, dia hoy lzy: Ity kapoaka ity no ilay fanekena vaovao amin'ny rako; izao no ataovy ho fahatsiarovana Ahy, na oviana na oviana no misotro hianareo. ²⁶Fa na oviana na oviana hianareo no mihinana itony mofo itony sy misotro amin'ny kapoaka, dia manambara ny fahafatesan'ny Tompo hianareo mandra-pihaviny.

²⁷Koa na zovy na zovy no mihinana ny mofo sy misotro amin'ny kapoaky ny Tompo amin'ny fanahy tsy mendrika, dia ho meloka ny amin'ny tena sy ny ran'ny Tompo izy. ²⁸Fa aoka ny olona hamantatra ny tenany, dia aoka izy hihinana ny mofo sy hisotro amin'ny kapoaka. ²⁹Fa izay rehetra mihinana sy misotro dia mihinana sy misotro fanamelohana ho an'ny tenany, raha tsy mamantatra ny tena izy. ³⁰Noho izany dia betsaka no marary sy marofy eo aminareo, ary maro ihany no efa nodi-mandry. ³¹Fa raha mba mamantatra ny tenantsika isika, dia tsy mba hotsarina. ³²Fa raha tsaraina isika, dia faizan'ny Tompo mba tsy hohelohina miaraka amin'izao tontolo izao. —1 Korintiana 11:23b-32

12. RAHA MITOETRA AO AMIN'I KRISTY ISIKA DIA HAMOA BETSAKA

Mitoetra ao amin'i Kristy

¹Izaho no tena voaloboka, ary ny Raiko no mpamboatra. ²Ny sampany rehetra eo amiko izay tsy mamoa dia esoriny; fa ny

sampany rehetra izay mamoa kosa dia amboariny, mba hamoa bebe kokoa. ³Efa madio rahateo hianareo noho ny teniko, izay nolazaiko taminareo. ⁴Tomoera amiko ary Izaho aminareo. Tahaka ny sampany tsy mahay mamoa ho azy, raha tsy miray amin'ny voaloboka izy, dia toy izany koa hianareo, raha tsy miray amiko. ⁵Izaho no voaloboka, hianareo no sampany. Izay miray amiko, ary Izaho aminy, dia mamoa be izy; fa raha misaraka amiko kosa hianareo, dia tsy mahay manao na inona na inona.

⁶Raha misy tsy miray amiko, dia ariana eny ivelany tahaka ny sampany izy ka malazo; ary angonina izy ka atsipy ao anaty afo, dia ho may. ⁷Raha miray amiko hianareo, ka mitoetra ao anatinareo ny teniko, dia angataho izay tianareo na inona na inona, fa ho tonga aminareo izany. ⁸Izany no ankalazana ny Raiko, mba hamoazanareo be ka ho tonga mpianatro hianareo.

—Jaona 15:1-8

¹⁵Tsy hataoko hoe mpanompo intsony hianareo, fa ny mpanompo tsy mahalala izay ataon'ny tompony; fa efa nataoko hoe sakaiza hianareo, satria izay rehetra reko tamin'ny Raiko no nambarako taminareo. ¹⁶Tsy hianareo no nifidy Ahy, fa Izaho no nifidy anareo ka nanendry anareo mba handeha sy hamoa, ary mba haharetan'ny vokatrareo, mba homen'ny Ray anareo izay rehetra hangatahinareo amin'ny anarako na inona na inona.

—Jaona 15:15-16

Ary ny aminareo, dia ilay hosotra noraisinareo taminy no mitoetra ao aminareo, ka tsy mila hampianarin'olona hianareo; fa satria ny hosotra avy aminy no mampianatra anareo ny zavatra rehetra, sady marina, fa tsy lainga izany, dia tomoera ao aminy hianareo, araka ny nampianarany anareo. —1 Jaona 2:27

Ny vokatry ny Fanahy

²²Fa ny vokatry ny Fanahy kosa dia fitiavana, fifaliana, fiadanana, fahari-po fahamoram-panahy, fanaovan-tsoa, fahamarinana, ²³fahalemam-panahy, fahononam-po; tsy misy lalàna

manohitra izany. ²⁴Fa izay an'i Kristy Jesosy dia efa nanombo ny nofony mbamin'ny faniriany sy ny filàny tamin'ny hazo fijaliana. ²⁵Raha velon'ny Fanahy isika, dia aoka handeha araka ny Fanahy. ²⁶Aoka isika tsy handrani-tena foana ka hifampihaika sy hifampialona. —Galatiana 5:22-26

¹⁷Fa ny fahendrena izay avy any ambony dia madio aloha, ary tia fihavanana, mandefitra, mora alahatra, be famindrampo sy be voka-tsoa, tsy miahahanana na mihatsaravelatsihy. ¹⁸Ary ny vokatry ny fahamarinana dia afafy amin'ny fihavanana ho an'izay mampandroso ny fihavanana. —Jakoba 3:17-18

Ny fitiavana no lehibe indrindra amin'ireo

A. Nomen'Andriamanitra an'i Mosesy ny Didy Folo

¹Dia nilaza izao teny rehetra izao Andriamanitra ka nanao hoe: ²Izaho no Jehovah Andriamanitrao, Izay nitondra anao nivoaka avy tany amin'ny tany Egipta, tamin'ny trano nahandevozana.

³Aza manana andriamani-kafa, fa Izaho ihany.

⁴Aza manao sarin-javatra voasokitra ho anao, na ny mety ho endriky ny zavatra izay eny amin'ny lanitra ambony, na izay etỳ amin'ny tany ambany, na izay any amin'ny rano ambanin'ny tany. ⁵Aza miankohoka eo anatrehany, ary aza manompo azy; fa Izaho, Jehovah Andriamanitrao, dia Andriamanitra saro-piaro ka mamaly ny heloky ny ray amin'ny zanaka hatramin'ny zafiafy sy ny zafindohalika, dia amin'izay mankahala Ahy; ⁶nefa kosa mamindra fo amin'ny olona arivo mandimby izay tia Ahy ka mitandrina ny didiko.

⁷Aza manonona foana ny anaran'i Jehovah Andriamanitrao; fa tsy hataon'i Jehovah ho tsy manan-tsiny izay manonona foana ny anarany.

⁸Mahatsiarova ny andro Sabata hanamasina azy. ⁹Henemana no hiasanao sy hanaovanao ny raharahanao rehetra. ¹⁰Fa Sabatan'i Jehovah Andriamanitrao ny andro fahafito; koa aza

manao raharaha akory hianao amin'izany, na ny zanakao-lahy, na ny zanakao-vavy, na ny ankizilahinao, na ny ankizivavinao na ny biby fiompinao, na ny vahininao izay tafiditra eo am-bavahadinao. ¹¹Fa henemana no nanaovan'i Jehovah ny lanitra sy ny tany sy ny ranomasina mbamin'izay rehetra ao aminy, dia nitsahatra lzy tamin'ny andro fahafito; izany no nitahian'i Jehovah ny andro Sabata sy nanamasinany azy.

¹²Manajà ny rainao sy ny reninao mba ho maro andro hianao ao amin'ny tany izay omen'i Jehovah Andriamanitrao ho anao.

¹³Aza mamono olona.

¹⁴Aza mijangajanga.

¹⁵Aza mangalatra.

¹⁶Aza mety ho vavolombelona mandaiga hanameloka ny namananao.

¹⁷Aza mitsiriritra ny tranon'ny namananao; aza mitsiriritra ny vadin'ny namananao, na ny ankizilahiny, na ny ankizivaviny, na ny ombiny, na ny borikiny, na izay mety ho an'ny namananao akory aza. —Eksodosy 20:1-17

B. Ny fitiavana no fahatanterahan'ny lalàna

³⁷Dia hoy Jesosy taminy: “Tiava an'i Jehovah Andriamanitrao amin'ny fonao rehetra sy ny fanahinao rehetra ary ny sainao rehetra”. ³⁸Izany no didy lehibe sady voalohany. ³⁹Ary ny faharoa, izay tahaka azy ihany, dia izao: “Tiava ny namananao tahaka ny tenanao”. ⁴⁰Izany didy roa izany no ihantonan'ny lalàna rehetra sy ny mpaminany. —Matio 22:37-40

Ny fitiavana tsy manisy ratsy ny namana; koa dia ny fitiavana no fahatanterahana ny lalàna. —Romana 13:10

⁴³Efa renareo fa voalaza hoe: “Tiava ny namananao”, ary mankahalà ny fahavalonao. ⁴⁴Fa izaho kosa milaza aminareo hoe: Tiava ny fahavalonareo, ary mivavaha ho an'izay manenjika

anareo,— ⁴⁵mba ho tonga zanaky ny Rainareo izay any an-danitra hianareo; fa lzy mampiposaka ny masoandrony amin'ny ratsy fanahy sy ny tsara fanahy ary mampilatsaka ny ranonora-na amin'ny marina sy ny tsy marina. ⁴⁶Fa raha izay tia anareo ihany no tianareo, inona no valim-pitia azonareo? Moa na dia ny mpamory hetra aza tsy mba manao izany koa va? ⁴⁷Ary raha ny rahalahinareo ihany no arahabainareo, inona no ataonareo mihoatra noho ny sasany? Moa na dia ny jentilisa aza tsy mba manao toy izany ihany va? ⁴⁸Koa amin'izany aoka ho tanteraka hianareo toy ny fahatanterahan'ny Rainareo izay any an-danitra.
—Matio 5:43-48

C. Ny zavatra rehetra ataontsika dia tsy maintsy atao amim-pitiavana

¹Na dia miteny amin'ny fitenin'ny olona sy ny anjely aza aho, kanefa tsy manana fitiavana, dia tonga varahina maneno sy kipantsona mikarantsana aho. ²Ary na dia manana faminaniana aza aho ka mahalala ny zava-miafina rehetra sady manana ny fahalalana rehetra, ary na dia manana ny finoana rehetra aza aho ka mahafindra tendrombohitra, kanefa tsy manana fitiavana, dia tsinontsinona aho. ³Ary na dia omeko ho an'ny malahelo aza ny fananako rehetra, ary na dia atolotro hodorana aza ny tenako, kanefa tsy manana fitiavana aho, dia tsy mahaso ahy akory izany. ⁴Ny fitiavana mahari-po sady mora fanahy; ny fitiavana tsy mialona, tsy mirehareha, tsy mieboebo, ⁵tsy manao izay tsy mahamendrika, tsy mitady ny azy, tsy mora sosotra, tsy manao otripo, ⁶tsy mifaly amin'ny tsi-fahamarinana, fa miara-mifaly amin'ny fahamarinana kosa, ⁷mandefitra ny zavatra rehetra, mino ny zavatra rehetra, manantena ny zavatra rehetra, maharitra ny zavatra rehetra. ⁸Ny fitiavana tsy ho levona mandrakizay; fa raha ny faminaniana, dia ho levona; na ny fiteny tsy fantatra, dia hitsahatra; na ny fahalalana, dia ho foana. ⁹Fa sombintsombiny ny fahalalantsika, ary sombintsombiny ny faminaniantsika; ¹⁰fa rehefa tonga ny tanteraka, dia tsy hisy sombintsombiny intsony.

¹¹Fony mbola zaza aho, dia niteny toy ny zaza, nihevitra toy ny zaza, nisaina toy ny zaza; fa nony efa lehibe aho, dia nariako ny fahazazana. ¹²Fa ankehitriny isika mizaha ao amin'ny fitaratra ka tsy mahita marina; fa rahatrizay dia mifanatrika; ankehitriny sombintsombiny no fantatro; fa rahatrizay dia ho fantatro tsara toy izay nahafantarana ahy. ¹³Ary ankehitriny dia ireto telo ireto no mitoetra: ny finoana, ny fanantenana, ny fitiavana; fa ny fitiavana no lehibe amin'ireo. —1 Korintiana 13:1-13

Izao no ahafantarantsika ny fitiavana, satria lzy no nanolotra ny ainy hamonjy antsika; ary isika kosa mba tokony hanolotra ny aintsika hamonjy ny rahalahy. —1 Jaona 3:16

⁹Ary izao no angatahiko, dia ny mbola hitomboan'ny fitiavanareo bebe kokoa amin'ny fahalalana tsara sy ny fahafantarana rehetra, ¹⁰mba hamantaranareo izay zavatra tsara indrindra, mba ho madio am-po ary tsy hanan-tsiny ho amin'ny andron'i Kristy hianareo, ¹¹sady feno ny vokatry ny fahamarinana, izay avy amin'ny alalan'i Jesosy Kristy, ho voninahitra sy fiderana an'Andriamanitra. —Filipiana 1:9-11

Ary ny fanantenana dia tsy mampahamenatra, satria ny Fanahy Masina, izay nomena antsika, no nentiny nampidina ny fitiavan'Andriamanitra ho ao am-pontsika. —Romana 5:5

⁵Koa noho izany dia manaova izay zotom-po rehetra kosa hianareo, ka amin'ny finoanareo dia manehoa fahatanjahan-tsaina, ary amin'ny fahatanjahan-tsainareo dia fahalalana, ⁶ary amin'ny fahalalanareo dia fahononam-po, ary amin'ny fahononamponareo dia faharetana, ary amin'ny faharetanareo dia toe-panahy araka an'Andriamanitra, ⁷ary amin' ny toe-panahinareo araka an'Andriamanitra dia fitiavana ny rahalahy, ary amin'ny fitiavanareo ny rahalahy dia fitiavana ny olona rehetra. ⁸Fa raha anananareo izany zavatra izany, sady anananareo betsaka, dia tsy avelan'izany ho malaina na tsy hahavokatra hianareo amin'ny fahalalana tsara an'i Jesosy Kristy Tompontsika. —2 Petera 1:5-8

13. MIAINA FIAINANA ARAKAN'ANDRIAMANITRA AMIN'NY ALALAN'NY HERIN'NY FANAHY MASINA

Kristy ao anatintsika, ny fanantenana ny voninahitra

²Hampitomboina ho anareo anie ny fahasoavana sy ny fiadanana amin'ny fahalalana tsara an'Andriamanitra sy Jesosy Tompontsika. ³Efa nomen'ny herin'Andriamanitra ho antsika ny zavatra rehetra momba ny fiainana sy ny toe-panahy araka an'Andriamanitra amin'ny fahalalana llay niantso antsika tamin'ny voninahiny sy ny fahatsarany; ⁴ary izany no nahatanterahany amintsika ireo teny fikasana sady soa no lehibe indrindra, mba ho tonga mpiray amin'ny fomban'Andriamanitra amin'izany hianareo, rehefa afa-nandositra ny fahalotoana izay eo amin'izao tontolo izao noho ny filana. —2 Petera 1:2-4

Fa isika tsy nandray ny fanahin'izao tontolo izao, fa ny Fanahy Izay avy amin'Andriamanitra, mba ho fantatsika izay zavatra nomen'Andriamanitra antsika. —1 Korintiana 2:12

¹²Miasa amin'ny tahotra sy ny hovitra hahatanteraka ny famonjena anareo. ¹³Fa Andriamanitra no miasa ao anatinareo na ny fikasana na ny fanaovana hahatanteraka ny sitrapony.

—Filipiana 2:12b-13

Ary matoky indrindra aho fa Izay nanomboka asa tsara tao anatinareo no hahatanteraka izany mandra-pihavin'ny andron'i Jesosy Kristy. —Filipiana 1:6

Tokony ho tarihin'ny Fanahy Masina isika

¹⁴Fa izay tarihin'ny Fanahin'Andriamanitra no zanak'Andriamanitra. ¹⁵Fa tsy nandray ny fanahim-pahandevozana ho amin'ny tahotra indray hianareo, fa nandray ny fanahin'ny zanaka natsangana, izay iantsoantsika hoe: Aba, Ray ô. —Romana 8:14-15

¹³Fa raha tonga ny Fanahin'ny fahamarinana, dia Izy no hitari-dalana anareo ho amin'ny marina rehetra; fa tsy hiteny ho Azy Izy, fa izay ho reny dia holazainy avokoa; ary ny zavatra ho avy aza

dia hambarany aminareo. ¹⁴Izy hankalaza Ahy; fa handray avy amin'ny Ahy Izy ka hanambara izany aminareo. ¹⁵Izay rehetra ananan'ny Ray dia Ahy avokoa, koa izany no nilazako fa mandray avy amin'ny Ahy Izy ka hanambara izany aminareo.

—Jaona 16:13-15

Fa ny Mpananatra, dia ny Fanahy Masina, Izay hirahin'ny Ray amin'ny anarako. Izy no hampianatra anareo ny zavatra rehetra sy hampahatsiaro anareo ny zavatra rehetra izay nolazaiko taminareo.

—Jaona 14:26

¹⁶Izay soratra rehetra nomen'ny tsindrimandrin'Andriamanitra dia mahaso koa ho fampianarana, ho fandresen-dahatra, ho fanitsiana izay diso, ho fitaizana amin'ny fahamarinana, ¹⁷mba ho tanteraka ny olon'Andriamanitra, ho vonona tsara ho amin'ny asa tsara rehetra.

—2 Timoty 3:16-17

Tokony handeha ao amin'ny Fanahy isika

¹Ary amin'izany dia tsy misy fanamelohana ho an'izay ao amin'i Kristy Jesosy. ²Fa ao amin'i Kristy Jesosy ny lalàn'ny Fanahin'aina no nahafaka ahy tamin'ny lalàn'ny fahotana sy ny fahafatesana. ³Fa izay tsy hain'ny lalàna, satria ny nofo no nahalemy azy, dia vitan'Andriamanitra tamin'Izy naniraka ny Zanany, naka ny endriky ny nofo ota sy ny amin'ny ota, ka nanameloka ny ota tao amin'ny nofo, ⁴mba hahatanteraka ny fahamarinana ilain'ny lalàna amintsika, izay tsy mandeha araka ny nofo, fa araka ny Fanahy.

⁵Fa izay araka ny nofo dia mihevitra izay zavatra ny nofo; fa izay araka ny Fanahy kosa mihevitra izay zavatra ny Fanahy. ⁶Fa ny fihevitra ny nofo dia fahafatesana; fa ny fihevitra ny Fanahy kosa fiainana, (sy fiadanana) ⁷satria fandrafiana an'Andriamanitra ny fihevitra ny nofo; fa tsy manaiky ny lalàn'Andriamanitra izy, sady tsy hainy akory izany. ⁸Ary izay ao amin'ny nofo dia tsy mahay manao ny sitrapon'Andriamanitra. ⁹Fa hianareo tsy ao amin'ny nofo, fa ao amin'ny Fanahy, raha ny Fanahin'Andriamanitra no mitoetra ao anatinareo. Fa raha misy kosa tsy manana ny Fana-

hin'i Kristy dia tsy Azy izy. ¹⁰Fa raha Kristy no mitoetra ao anatinareo, na dia maty ihany aza ny tena noho ny ota, dia fiainana kosa ny fanahy noho ny fahamarinana. —Romana 8:1-10

Tokony ho feno ny Fanahy mandrakariva isika

¹⁴Ary noho izany no andohalehako amin'ny Ray, ¹⁵izay aha-zoan'ny fianakaviana rehetra any an-danitra sy etỳ an-tany anarana, ¹⁶mba homeny anareo, araka ny haren'ny voninahiny, ny mba hohatanjahina fatratra amin'ny Fanahiny ny toe-panahinareo; ¹⁷mba hitoeran'i Kristy ao am-ponareo amin'ny finoana, ka hamaka sy hiorina mafy amin'ny fitiavana hianareo, ¹⁸mba hahazanareo mbamin'ny olona masina rehetra ny hahafantatra tsara izay sakany sy lavany ary hahavony sy halaliny, ¹⁹ary hahalala ny fitiavan'i Kristy, izay mihoatra noho ny fahalalana, mba hamenoana anareo ho amin'ny fahafenoan'Andriamanitra rehe-tra. ²⁰Ary ho an'izay mahay manao mihoatra noho ny zavatra rehetra, eny, mihoatra lavitra noho izay rehetra angatahintsika na heverintsika aza, araka ny hery izay miasa ato amintsika, ²¹ho Azy anie ny voninahitra ao amin'ny fiangonana sy ao amin'i Kristy Jesosy hatramin'ny taranaka farany indrindra mandrakizay mandrakizay. Amena. —Efesiana 3:14-21

¹⁰Fa izay rehetra mangataka no mahazo; ary izay mitady no mahita; ary izay mandòndòna no hovohana. ¹¹Fa iza moa aminareo izay ray, raha angatahan'ny zanany mofo, no hanome azy vato? ary raha angatahany hazandrano, no hanome azy menarana ho solon'ny hazandrano? ¹²ary raha angatahany atody, no hanome azy maingoka? ¹³Koa raha hianareo, na dia ratsy aza, mahalala hanome zava-tsoa ho an'ny zanakareo, tsy mainka va ny Ray, izay any an-danitra, no hanome ny Fanahy Masina ho an'izay mangataka aminy? —Lioka 11:10-13

¹⁵Koa tandremo tsara izay fandehanareo, mba tsy hitondranareo tena tahaka ny adala, fa tahaka ny hendry, ¹⁶ka hararaoty ny andro azo anaovan-tsoa, fa ratsy izao fiainana izao. ¹⁷Ary noho izany dia aza manao adaladala, fa aoka ho fantatrareo izay sitrapon'ny

Tompo. ¹⁸Ary aza ho mamon-divay hianareo, fa amin'izany dia misy fanaranam-po amin'ny ratsy, fa aoka hofenoina ny Fanahy, ¹⁹ka mifampilazà amin'ny salamo sy ny fihirana ary ny tonon-kiram-panahy, dia mihira sy mikalo ao am-ponareo ho an'ny Tompo, ²⁰misaotra an'Andriamanitra Ray mandrakariva noho ny zava-tra rehetra, amin'ny anaran'i Jesosy Kristy Tompontosika, ²¹sady mifanaiky amin'ny fahatahorana an'i Kristy. —Efesiana 5:15-21

Aza mampalahelo ny Fanahy Masina

²⁵Koa esory ny lainga, ka samia milaza ny marina amin'ny namany avy hianareo rehetra; fa samy isan'ny momba ny tenan'ny namantsika avokoa isika. ²⁶Tezera, fa aza manota; ary aoka tsy ho tratry ny masoandro milentika ny fahatezera-nareo. ²⁷Aza manome fitoerana ho an'ny devoly. ²⁸Aoka izay nangalatra tsy hangalatra intsony; fa aleo hikely aina ka hiasa izay tsara amin'ny tànany, mba hisy homeny izay tsy manana. ²⁹Aoka tsy haloaky ny vavanareo izay teny maloto, fa izay tsara ho fampandrosoana, araka izay tokony hanaovana, mba hahazoan'ny mihaino fahasoavana. ³⁰Ary aza mampalahelo ny Fanahy Masin'Andriamanitra, izay nanisiana tombo-kase anareo ho amin'ny andro fanavotana. ³¹Esory aminareo ny fo-lentika rehetra sy ny fahavinirana sy ny fahatezerana sy ny fitabatabana sy ny fitenenan-dratsy ary ny lolompo rehetra; ³²ary aoka samy halem-y fanahy amin'ny namany avy hianareo, ka hifampiantra sy hifamela heloka, tahaka ny namelan'Andriamanitra ny helokareo ao amin'i Kristy. —Efesiana 4:25-32

Farany, ry rahalahy, na inona na inona marina, na inona na inona manan-kaja, na inona na inona mahitsy, na inona na inona madio, na inona na inona mahate-ho-tia, na inona na inona tsara laza, raha misy hatsaram-panahy, ary raha misy dera, dia hevero izany. —Filipiana 4:8

Hazonin'ny herin'Andriamanitra isika amin'ny alalan'ny fizahan-toetra sy ny fitsapana ary ny fakam-panahy

Tsy misy fakam-panahy nahazo anareo afa-tsy izay zakan'ny

olombelona; nefa mahatoky Andriamanitra ka tsy hamela anareo halaim-panahy mihoatra noho izay zakanareo; fa momba ny fakam-panahy dia hasiany lalana hahafahanareo koa mba hahazakanareo izany.

—1 Korintiana 10:13

²Ry rahalahiko, ataovy ho fifaliana avokoa, raha iharan'ny fakam-panahy samy hafa hianareo, ³satria fantatrarao fa ny fizahan-toetra ny finoanareo dia mahatonga faharetana. ⁴Ary aoka ny faharetana hisy asa tanteraka, mba ho tanteraka sy tonga ohatra hianareo, ka tsy hisy tsy ampy na inona na inona.

—Jakoba 1:2-4

⁵Izay arovan'ny herin'Andriamanitra amin'ny finoana ho amin'ny famonjena efa vonona haseho any am-parany. ⁶Izany no iravoravoanareo, na dia ampalahelovina vetivety ankehitriny amin'ny fakam-panahy maro samy hafa aza hianareo, raha tsy maintsy hisy izany, ⁷mba ho hita ho fiderana sy voninahitra ary fankalazana ny fizahan-toetra ny finoanareo (izay tsara lavitra noho ny volamena mety ho simba, na dia voazaha toetra tamin'ny afo aza), dia amin'ny hisehoan'i Jesosy Kristy, ⁸Izay, na dia tsy mbola hitanareo aza, dia tianareo, ary na dia tsy hitanareo ankehitriny aza, nefa, satria inoanareo, dia iravoravoanareo amin'ny fifaliana tsy azo tononina sady be voninahitra, ⁹mandray ny anton'ny finoanareo, dia ny famonjena ny fanahy. —1 Petera 1:5-9

¹²Sambatra izay olona maharitra fakam-panahy; fa rehefa voazaha toetra izy, dia handray ny satroboninahitra fiainana, izay nolazain'ny Tompo homena izay tia Azy. ¹³Raha misy alaim-panahy, aoka izy tsy hanao hoe: Andriamanitra no maka fanahy ahy; fa Andriamanitra tsy azon'ny ratsy alaim-panahy, sady tsy mba maka fanahy olona lzy; ¹⁴fa samy alaim-panahy ny olona, raha tarihin'ny filany sy fitahiny izy. ¹⁵Ary ny filana, rehefa torontonina, dia miteraka ota; ary ny ota, rehefa tanteraka, dia miteraka fahafatesana.

—Jakoba 1:12-15

⁸Mahonona tena, miambena: fa ny devoly fahavalonareo mandehandeha tahaka ny liona mieronana mitady izay harapany; ⁹tohero izy, ka miorena tsara amin'ny finoana hianareo, satria

fantatrereo fa izany fahoriana izany dia manjo ny rahalahinareo rehetra eran'izao tontolo izao. ¹⁰Ary Andriamanitry ny fahasoavana rehetra, izay efa niantso anareo ho any amin'ny voninahiny mandrakizay ao amin'i Kristy, rehefa niaritra fahoriana vetivety hianareo, dia lzy no hahatanteraka sy hampiorina ary hampitoetra anareo. ¹¹Ho Azy anie ny fanjakana mandrakizay mandrakizay. Amena. —1 Petera 5:8-11

¹⁶Ary Jesosy Kristy Tompontosika sy Andriamanitra Raintsika, izay efa tia antsika ka nanome antsika fampiononana mandrakizay sy fanantenana tsara amin'ny fahasoavana, ¹⁷no hampionona ny fonareo anie sy hampahery anareo amin'ny asa sy ny teny tsara rehetra. —2 Tesaloniana 2:16-17

Mitarika ho amin'ny fahamasinana ny famaizan'ny Tompo

⁴Hianareo tsy mbola nanohitra niady tamin'ny ota hatramin'ny fahalatsahan-dra. ⁵Ary hadinonareo ny fananarana izay milaza aminareo toy ny amin'ny zanaka hoe: “Anaka, aza atao ho zavatra kely ny famaizana ataon'i Jehovah, ary aza reraka, raha resi-lahatry ny anatra ataony hianao; ⁶Fa izay tian'i Jehovah no faizany, ary izay zanaka rehetra raisiny no kapohiny”. ⁷Famaizana no anton'ny iaretanareo; Andriamanitra mitondra anareo tahaka ny zanaka; fa aiza moa izay zanaka tsy faizan-drainy? ⁸Fa raha tsy faizana tahaka ny itondrana azy rehetra hianareo, dia zazasary, fa tsy zanaka. ⁹Ary koa, isika dia nanana ny rain'ny nofonsika ho mpanafay antsika ka efa nanaja azy; tsy mainka va ny hanekentsika ny Rain'ny fanahy, ka ho velona isika? ¹⁰Fa ireny dia nanao izay hahafay antsika tamin'ny andro vitsy araka izay sitrapony, fa lzy kosa dia ny hahasoana, mba handraisantsika ny fahamasinany. —Hebreo 12:4-10

¹¹Fa ny famaizana rehetra dia tsy mba atao ho mahafaly andro anaovana, fa mampahory; fa rehefa afaka izany, dia vao mitondra ny vokatry ny fahamarinana hiadanana ho an'izay nanaovana azy izy. ¹²Koa hatanjaho ny tana miraviravy sy ny

lohalika malemy; ¹³ary manaova làla-mahitsy halehan'ny tongotreo, mba tsy hampipitsoka ny tongotry ny mandringa, fa ny mba hahasitrana azy kosa. —Hebreo 12:11-13

Miaina ho amin'ny voninahitr'Andriamanitra

⁴Fa Andriamanitra, Izay manan-karena amin'ny famindrampo, noho ny halehiben'ny fitiavany izay nitiavany antsika, ⁵na dia fony mbola matin'ny fahadisoana aza isika, dia nahavelona antsika niaraka tamin'i Kristy (fahasoavana no namonjena anareo); ⁶ary niara-natsangany isika ka niara-napetrany any an-danitra ao amin'i Kristy Jesosy, ⁷mba hasehony amin'ny andro ho avy ny haben'ny haren'ny fahasoavany amin'ny fahamoram-panahiny amintsika ao amin'i Kristy Jesosy. ¹⁰Fa asany isika, voaforona tao amin'i Kristy Jesosy mba hanao asa tsara, izay namboarin'Andriamanitra rahateo mba handehanantsika eo aminy.

—Efesiana 2:4-7, 10

Fa olom-boavidy hianareo, koa dia mankalazà an'Andriamanitra amin'ny tenanareo.

—1 Korintiana 6:20

¹³Hianareo no fanasin'ny tany; fa raha ny fanasina no tonga matsatso, inona indray no hahasira azy? Tsy misy heriny hanaovana na inona na inona intsony izy, fa hariana any ivelany ka hohitsahin'ny olona. ¹⁴Hianareo no fahazavan'izao tontolo izao. Tsy azo afenina izay tanàna miorina eo an-tampon-tendrombohitra. ¹⁵Ary koa, tsy misy olona mandrehitra jiro ka mametraka azy ao ambanin'ny vata famarana, fa apetrany eo amin'ny fanaovan-jiro, ka dia mazava amin'izay rehetra ao an-trano izany. ¹⁶Aoka hazava eo imason'ny olona toy izany koa ny fahazavanareo, mba hahitany ny asa soa ataonareo ka hankalazany ny Rainareo Izay any an-danitra.

—Matio 5:13-16

Fa maizina hianareo fahiny, fa efa mazava ao amin'ny Tompo kosa ankehitriny; mandehana tahaka ny zanaky ny mazava.

—Efesiana 5:8

⁹Fa hianareo kosa dia taranaka voafidy, “fanjakà-mpisorona,

firenena masina”, olona nalain’Andriamanitra ho an’ny tenany, mba hilazanareo ny hatsaran’lly niantso anareo hiala tamin’ny maizina ho amin’ny fahazavany mahagaga; ¹⁰dia hianareo izay tsy firenena akory fahiny, fa ankehitriny efa olon’Andriamanitra; izay tsy namindrana fo, fa ankehitriny efa namindrana fo.

—1 Petera 2:9-10

¹⁴Ataovy ny zavatra rehetra amin’ny tsi-fimonomononana sy ny tsi-fisalasalana, ¹⁵mba ho tsy manan-tsiny sady tsy misy fitaka hianareo, dia zanak’Andriamanitra tsy manana adidy eo amin’ny firenena meloka sy maditra, izay isehoanareo tahaka ny fanazavana eo amin’izao tontolo izao, ¹⁶mitana ny tenin’ny fiainana.

—Filipiana 2:14-16a

Koa amin’izany, na mihinana na misotro hianareo, na inona na inona ataonareo, dia ataovy ho voninahitr’Andriamanitra izany rehetra izany.

—1 Korintiana 10:31

14. OMEN’NY FAHAHY MASINA HERY ISIKA MBA HO VAVOLOMBELONY

Tokony hitory ny vaovao tsaran’ny Fanjakan’Andriamanitra isika

¹¹Milaza ny voninahitry ny fanjakanao izy sady miresaka ny herinao, ¹²mba hampahafantarina ny zanak’olombelona ny herinao sy ny haben’ny voninahitry ny fanjakanao. ¹³Fanjakana mandrakizay ny fanjakanao, ary hihatra amin’ny taranaka fara mandimby ny fanapahanao.

—Salamo 145:11-13

Ary hotorina amin’izao tontolo izao ity filazantsaran’ny fanjakana ity ho vavolombelona amin’ny firenena rehetra, dia vao ho tonga ny farany.

—Matio 24:14

Jesosy no ohatra ho antsika

¹⁶Ary raha vao natao batisa Jesosy, dia niakatra avy teo amin’ny rano niaraka tamin’izay lzy; ary, indro, nisokatra taminy ny lanitra,

ary hitany ny Fanahin'Andriamanitra nidina tahaka ny voromailala ka nankeo amboniny. ¹⁷Ary, injao! nisy feo avy tany an-danitra nanao hoe: Ity no Zanakao malalako izay sitrako. —Matio 3:16-17

¹⁴Ary Jesosy niverina tamin'ny herin'ny Fanahy nankany Galilia; dia niely tamin'ny tany rehetra manodidina ny lazany. ¹⁵Ary lzy nampianatra teny amin'ny synagoga'ny olona ka nankalazain'izy rehetra. ¹⁶Dia tonga tao Nazareta, izay nahabe Azy, lzy; ary araka ny fanaony dia niditra tao amin'ny synagoga tamin'ny andro Sabata lzy ka nitsangana hamaky teny. ¹⁷Dia natolotra Azy ny bokin'Isaia mpaminany; ary nony namelatra ny boky lzy, dia nahita ny teny voasoratra hoe:

¹⁸“Ny Fanahin'i Jehovah no ato amiko, satria nanosotra Ahy hitory teny soa mahafaly amin'ny malahelo lzy; naniraka Ahy hitory fandefasana amin'ny mpifatotra lzy, sy fampahiratana amin'ny jamba, hanafaka izay nampahorina, ¹⁹hitory ny taona ankasitrahan'i Jehovah.”

²⁰Ary rehefa nahorony ny boky ka naveriny tamin'ny mpanao raharaha, dia nipetraka lzy. Ary nandinika Azy ny mason'izay rehetra teo amin'ny synagoga. ²¹Ary Jesosy niteny taminy hoe: Androany no efa tanteraka eto anatrehanareo izany soratra izany. —Lioka 4:14-21

³⁵Ary Jesosy nandeha nitety ny tanàna rehetra sy ny vohitra, nampianatra tao amin'ny synagoga sy nitory ny filazantsaran'ny fanjakana ary nahasitrana ny aretina rehetra mbamin'ny rofy rehetra. ³⁶Ary nony nahita ny vahoaka Jesosy, dia nahone-na Azy ny fijeriny ireo, satria nampahantraina ireo ka nafoy toy ny ondry tsy misy mpiandry. ³⁷Dia hoy lzy tamin'ny mpianany: ³⁸Be ny vokatra, fa ny mpiasa no vitsy; koa amin'izany mangataha amin'ny Tompon'ny vokatra mba hampandehanany mpiasa hamory ny vokatra. —Matio 9:35-38

Manome ilay iraka lehibe Jesosy

¹⁵Mandehana any amin'izao tontolo izao hianareo, ka mitoria ny filazantsara amin'ny olombelona rehetra. ¹⁶Izay mino sy atao

batisa no hovonjena; fa izay tsy mety mino no hohelohina.

—Marka 16:15b-16

¹⁸Efa nomena Ahy ny fahefana rehetra any an-danitra sy etỳ an-tany; ¹⁹koa mandehana hianareo, dia ataovy mpianatra ny firenena rehetra, manao batisa azy ho amin'ny anaran'ny Ray sy ny Zanaka ary ny Fanahy Masina ²⁰sady mampianatra azy hitandrina izay rehetra nandidikao anareo; ary, indro, Izaho momba anareo mandrakariva ambara-pahatongan'ny fahata-peran'izao tontolo izao.

—Matio 28:18b-20

⁴⁹Ary, indro, Izaho mampitondra ny teny fikasan'ny Raiko ho anareo; fa mitoera eto an-tanàna mandra-panafiana anareo amin'ny hery avy any amin'ny avo. ⁵⁰Ary Jesosy nitondra azy hatrany Betania, dia nanandratra ny tànany ka nitso-drano azy. ⁵¹Ary raha mbola nitso-drano azy Izy, dia nisaraka taminy ka nakarina ho any an-danitra. ⁵²Ary izy ireo nitsaoka Azy, dia niverina ho any Jerosalema sady faly indrindra.

—Lioka 24:49-52

⁵Fa Jaona nanao batisa tamin'ny rano; fa hianareo kosa hatao batisa amin'ny Fanahy Masina, rehefa afaka andro vitsivitsy. ⁸Fa hahazo hery hianareo amin'ny hilatsahan'ny Fanahy Masina aminareo, ary ho vavolombeloko any Jerosalema sy eran'i Jodia sy Samaria ary hatramin'ny faran'ny tany. —Asan'ny Apostoly 1:5, 8

Manome hery ny fiangonana ny Fanahy Masina mba hampiely ny Filazantsara

¹Ary nony tonga ny Andro Pentekosta, dia teo amin'ny fitoerana iray izy rehetra. ²Ary nisy feo tonga tampoka avy tany an-danitra, toy ny rivotra mahery mifofofoto, ka nanenika ilay trano niangonany. ³Ary nisy lela maro mitarehin'afo niseho taminy, izay nizazazara; ary nipetraka tamin'izy rehetra isan-olona izany. ⁴Ary samy feno ny Fanahy Masina izy rehetra, ka dia niteny tamin'ny fiteny maro samy hafa, araka ny nampitenenan'ny Fanahy Masina azy.

⁵Ary nisy Jiosy, mpivavaka tsara, nitoetra tany Jerosalema, avy tany amin'ny firenena samy hafa rehetra ambanin'ny lanitra.

⁶Ary nony re izany feo izany, dia niangona ny olona maro ka very hevitra, fa samy nahare azy ireo miteny tamin'ny fitenin'ny avy izy rehetra. ⁷Dia talanjona sady gaga izy rehetra ka nanao hoe: In-dreo, tsy Galiliana va ireo rehetra miteny ireo? ¹¹...koa ahoana no andrenesantsika ireo miteny amin'ny fitenintsika avy ny asa lehibe ataon'Andriamanitra? ¹²Dia talanjona izy rehetra ka niahana-hana sady niresaka hoe: Ahoana no tokony ho hevitr'izany? ¹³Fa ny sasany nihomehy ka nanao hoe: Leon-divay mamy ireo.

¹⁴Fa nitsangana Petera sy ny iraiika ambin'ny folo lahy, dia nandra-peo izy ka nanao taminy hoe: Ry lehilahy Jiosy sy izay rehetra monina eto Jerosalema aoka, ho fantatrarao izao, ka henoy ny teniko: ¹⁵Tsy mamo araka ny hevitrareo tsy akory ireo, fa vao ora faha-telo ihany izao ny andro. ¹⁶Fa izao ilay nampilazaina an'i Joela mpaminany hoe: ¹⁷"Ary amin'ny andro farany, hoy Andriamanitra, no handatsahako ny Fanahiko amin'ny nofo rehetra; ary ny zanakalahinareo sy ny zanakavavinareo haminany, ary ny zatovonareo hahita fahitana, ary ny lahi-antitrareo hanonofy; ¹⁸ary ny mpanompoko, na lahy na vavy, dia handatsahako ny Fanahiko amin'izany andro izany, ka dia haminany izy; ¹⁹ary hanisy fahagagana eny amin'ny lanitra ambony Aho sy famantarana amin'ny tany ambany, dia ra sy afo ary zavon'ny setroka; ²⁰ny masoandro hampodina ho aizina, ary ny volana ho ra, alohan'ny hahatongavan'ny andron'i Jehovah, dia ilay sady lehibe no malaza; ²¹ary na zovy na zovy no hiantso ny anaran'i Jehovah dia hovanjena".

³⁸Ary hoy Petera taminy: Mibebaha, ary aoka samy hatao batisa amin'ny anaran'i Jesosy Kristy hianareo rehetra mba hahazo famelana ny helokareo; ary hianareo handray ny fanomezana, dia ny Fanahy Masina; ³⁹fa ny teny fikasana dia ho anareo sy ny zanakareo ary ho an'izay rehetra lavitra, na iza na iza hantsoin'i Jehovah Andriamanitsika hanatona Azy. ⁴⁰Ary nanambara sy nananatra azy tamin'ny teny maro hafa koa izy ka nanao hoe: Aoka hovanjena ho afaka amin'ity taranaka maditra ity hianareo. ⁴¹Ary izay nandray tsara ny teniny dia natao batisa: ary tokony ho telo arivo no olona vao nanampy ho isany tamin'izany andro

izany. ⁴²Ary izy ireo naharitra tamin'ny fampianaran'ny Apostoly sy ny fiombonana sy ny famakiana ny mofo ary ny fivavahana. ⁴³Dia raiki-tahotra ny olona rehetra teo, ary fahagagana sy famantarana maro no nataon'ny Apostoly.

—Asan'ny Apostoly 2:1-7, 11b-21, 38-43

¹⁸Fa izany rehetra izany dia avy amin'Andriamanitra, Izay nampihavana antsika taminy amin'ny alalan'i Kristy sady nanome anay ny fanompoana fampihavanana, ¹⁹dia izao: Andriamanitra ao amin'i Kristy no nampihavana izao tontolo izao taminy ka tsy nanisa ny fahadisoany; ary efa napetrany aminay ny teny fampihavanana. ²⁰Koa dia iraka solon'i Kristy izahay, toa an'Andriamanitra mampangataka anay aminareo, solon'i Kristy izahay ka mangataka indrindra aminareo hoe: mihavàna amin'Andriamanitra anie hianareo. —2 Korintiana 5:18-20

15. MANDRESY NY FAHAVALO AMIN'NY ALALAN'I JESOSY KRISTY TOMPONTSIKA

Efa nahazo ny fandresena Jesosy

¹⁴Fa isaorana anie Andriamanitra, Izay mitondra anay mandrakariva ao amin'i Kristy toy ny fanaon'izay avy nandresy, ka dia ampisehoany ny hanitry ny fahalalana Azy eny tontolo eny izahay. ¹⁵Fa hanitr'i Kristy ho an'Andriamanitra izahay amin'izay hovanjena sy izay ho very: ¹⁶amin'ny sasany dia hanitra avy amin'ny fahafatesana ho amin'ny fahafatesana; fa amin'ny sasany kosa dia hanitra avy amin'ny fiainana ho amin'ny fiainana. Koa iza moa no antonona ho amin'izany zavatra izany?

—2 Korintiana 2:14-16

Fa isaorana anie Andriamanitra, Izay manome antsika ny fandresena amin'ny alalan'i Jesosy Kristy Tompontosika.

—1 Korintiana 15:57

Ary nesoriny tsy ho eo amin'ny tenany ny fanapahana sy ny fahefana, ary noho ny hazo fijaliana dia nasehony miharihary ny

fitòndrany ireo toy ny fanaon'izay avy nandresy. —Kolosiana 2:15

¹⁸Fa hoy Jesosy taminy: Izaho nahita an'i Satana latsaka avy tany an-danitra tahaka ny varatra. ¹⁹Indro, efa nomeko fahefana hanitsaka menarana sy maingoka sy handresy ny hery rehetra ananan'ny fahavalo hianareo, ka tsy hisy hampaninona anareo akory. ²⁰Kanefa aza mifaly hianareo, satria manaiky anareo ny fanahy; fa mifalia, satria voasoratra any an-danitra ny anaranareo. —Lioka 10:18-20

¹⁵Ary hoy Jesosy taminy: Fa hianareo kosa manao Ahy ho iza? ¹⁶Ary namaly Simona Petera ka nanao hoe: Hianao no Kristy, Zanak'Andriamanitra velona. ¹⁷Dia namaly Jesosy ka nanao taminy hoe: Sambatra hianao, ry Simona Bar-jona; fa tsy nofo aman-dra no naneho anao izany, fa ny Raiko Izay any an-danitra. ¹⁸Ary Izaho milaza aminao koa: Hianao no Petera, ary ambonin'ity vatolampy ity no haoriko ny fiangonako; ary ny vava-hadin'ny fiainan-tsi-hita tsy haharesy azy. —Matio 16:15-18

¹⁶Izay mino sy atao batisa no hovonjena; fa izay tsy mety mino no hohelohina. ¹⁷Ary izao famantarana izao no hanaraka izay mino: hamoaka demonia amin'ny anarako izy; hiteny amin'ny fiteny izay tsy mbola hainy izy; ¹⁸handray menarana izy; ary na dia misotro zava-mahafaty aza izy, dia tsy hampaninona azy izany; hametra-tànana amin'ny marary izy, dia ho sitrana ireny.

—Marka 16:16-18

³¹Inona ary no holazaintsika ny amin'izany zavatra izany? Raha Andriamanitra no momba antsika, iza no hahatohitra antsika? ³²Izay tsy niaro ny Zanani-lahy, fa natolony hamonjy antsika rehetra Izy, tsy homeny antsika miaraka aminy maimaimpoana koa va ny zavatra rehetra? ³³Iza no hiampanga ny olom-boafidin'Andriamanitra? Andriamanitra no manamarina azy. ³⁴Iza no manameloka? Kristy Jesosy no efa maty, eny, sady nitsangana tamin'ny maty koa ka mitoetra eo amin'ny tànana ankavanan'Andriamanitra ary mifona ho antsika. ³⁵Iza no hasarakana antsika amin'ny fitiavan'i Kristy? Fahoriana va, sa fahantrana, sa fanenjehana, sa mosary, sa fitanjahana, sa loza,

sa sabatra? ³⁶Araka ny voasoratra hoe: “Fa noho ny aminao no namonoana anay mandrakariva; Toy ny ondry hovanoina no fijery anay”. ³⁷Kanefa amin’izany rehetra izany dia manaoatra noho ny mpandresy isika amin’ny alalan’lly tia antsika. ³⁸Fa matoky aho fa na fahafatesana, na fiainana, na anjely, na ireo fanapahana, na zavatra ankehitriny, na zavatra ho avy, na hery, ³⁹na ny ambony, na ny ambany, na inona na inona amin’izao zavatra ary rehetra izao, dia tsy hahasarakana antsika amin’ny fitiavan’Andriamanitra izay ao amin’i Kristy Jesosy Tompontosika. —Romana 8:31-39

Ny fitaovam-piadiantsika dia mahery ao amin’Andriamanitra

³Fa na dia velona amin’ny nofo aza izahay, dia tsy mba miady araka ny nofo (⁴fa tsy avy amin’ny nofo ny fiadian’ny tafikay, fa mahery amin’Andriamanitra handrava fiarovana mafy); ⁵fa mandrava ny fisainana sy ny zavatra avo rehetra izay atsangana hanohitra ny fahalalana an’Andriamanitra izahay ka mamabo ny hevitra rehetra hanaiky an’i Kristy. —2 Korintiana 10:3-5

¹⁰Farany, mahereza ao amin’ny Tompo sy amin’ny herin’ny faherezany. ¹¹Tafio avokoa ny fiadian’Andriamanitra, mba hahazoanareo hifahatra amin’ny fanangolen’ny devoly. ¹²Fa isika tsy mitolona amin’ny nofo aman-dra, fa amin’ny fanapahana sy amin’ny fanjakana sy amin’ny mpanjakan’izao fahamaizinana izao, dia amin’ny fanahy ratsy eny amin’ny rivotra. ¹³Ary noho izany, dia raiso avokoa ny fiadian’Andriamanitra, mba hahazoanareo hanohitra amin’ny andro mahory; ary rehefa vitanareo avokoa, dia hahafahatra hianareo. ¹⁴Mifahara ary, ka sikino fahamari-nana ny valahanareo, ary mitafia ny rariny ho fiarovan-tratra, ¹⁵ary kiraroy ny fahavononam-panahy avy amin’ny filazantsaran’ny fihavanana ny tongotrareo; ¹⁶ary ho fanampin’izany rehetra izany dia tano ny finoana ho ampinga, izay hahazoanareo hamono ny zana-tsipika mirehitra rehetra izay alefan’lly ratsy. ¹⁷Ary raiso ny famonjena ho fiarovan-doha sy ny tenin’Andriamanitra ho sabatry ny Fanahy; ¹⁸ary mivavaha mandrakariva ao amin’ny Fanahy

amin'ny fivavahana rehetra sy ny fangatahana, ka miambena amin'izany amin'ny faharetana sy ny fangatahana rehetra ho an'ny olona masina rehetra. —Efesiana 6:10-18

⁷Ka dia maneke an'Andriamanitra hianareo; ary manohera ny devoly, dia handositra anareo izy. ⁸Manatòna an'Andriamanitra, dia hanatona anareo izy. —Jakoba 4:7-8a

Fa mahatoky ny Tompo, izay hampahery sy hiaro anareo tsy ho azon'ny ratsy. —2 Tesaloniana 3:3

Aza matahotra

¹Andriamanitra no aro sy hery ho antsika; Mpamonjy mora azo indrindra amin'ny fahoriana izy. ²Koa izany no tsy hatahoro-ntsika. —Salamo 46:1-2a

Aza matahotra hianao, fa momba anao Aho; ary aza miherikerika foana, fa izaho no Andriamanitrao; mampahery anao Aho sady mamonjy anao; eny, mitantana anao amin'ny tànana ankavanan'ny fahamarinako Aho. —Isaia 41:10

Fa tsy nomen'Andriamanitra fanahy osa isika, fa fanahy mahery sy fitiavana ary fahononan-tena. —2 Timoty 1:7

Misy hery ao amin'ny anaran'i Jesosy hoan'izay mino

⁵Aoka ho ao aminareo izao saina izao, izay tao amin'i Kristy Jesosy koa, ⁶Izay, na dia nanana ny endrik'Andriamanitra aza, dia tsy nataony ho zavatra hofikiriny mafy ny fitoviana amin'Andriamanitra, ⁷fa nofoanany ny tenany tamin'ny nakany ny endriky ny mpanompo sy ny nahatongavany ho manam-pitoviana amin'ny olona; ⁸ary rehefa hita fa nanan-tarehy ho olona izy, dia nanetry tena ka nanaiky hatramin'ny fahafatesana, dia ilay fahafatesana tamin'ny hazo fijaliana. ⁹Koa izany no nanandratan'Andriamanitra Azy indrindra sy nanomezany Azy ny anarana izay ambony noho ny anarana rehetra, ¹⁰mba ho amin'ny anaran'i Jesosy no handohalehan'ny lohalika rehetra, na ny any an-danitra, na ny ety an-tany, na ny any ambanin'ny tany, ¹¹sy haneken'ny lela rehetra fa Jesosy Kristy no Tompo ho voninahitr'Andriamanitra Ray.

—Filipiana 2:5-11

¹⁷Mba homen'Andriamanitr'i Jesosy Kristy Tompontosika, Rain'ny voninahitra, ho anareo ny fanahin'ny fahendrena sy ny fanambarana amin'ny fahalalana Azy tsara, ¹⁸ary mba hampahiratina ny mason'ny sainareo, mba ho fantatrareo izay fanantenana avy amin'ny fiantsoany sy izay haren'ny voninahitry ny lovary eo amin'ny olona masina, ¹⁹ary ny fihoaran'ny halehiben'ny heriny ho antsika izay mino, araka ny fiàsan'ny herin'ny faherezany, ²⁰izay nataony tao amin'i Kristy tamin'ny nananganany Azy tamin'ny maty sy ny nampitoerany Azy eo amin'ny tànany ankavanana any an-danitra, ²¹ambony lavitra noho ny fanapahana rehetra sy ny fahefana sy ny hery sy ny fanjakana ary ny anarana rehetra izay tononina, tsy amin'izao fiainana izao ihany, fa amin'ny ho avy koa.

—Efesiana 1:17-21

²Ary nisy nitondra lehilahy nalemy tongotra hatrany an-kibondreniny, izay napetrany isan-andro teo anoloan'ny vavahadin'ny tempoly, ilay atao hoe Itsaraendrika, mba hangataka fiantrana amin'izay niditra teo an-kianjan'ny tempoly; ³nony nahita an'i Petera sy Jaona efa hiditra eo an-kianjan'ny tempoly izy, dia nangataka mba homena fiantrana. ⁴Ary Petera sy Jaona nibanjina azy ka nanao hoe: Mijere anay. ⁵Dia nibanjina azy roa lahy tsara izy, fa nanantena hahazo zavatra taminy. ⁶Fa hoy Petera: Tsy manana volafotsy na volamena aho, fa izay ananako no omeko anao: Amin'ny anaran'i Jesosy Kristy avy any Nazareta, mitsangantsangàna. ⁷Ary noraisiny tamin'ny tànany ankavanana rahilalahy ka natsangany; dia natanjaka niaraka tamin'izay ny tongony sy ny kitrokelyny.

—Asan'ny Apostoly 3:2-7

[Ary rehefa norahonany tsy hiteny amin'ny anaran'i Jesosy izy ireo, dia nivavaka] ²⁹Koa ankehitriny, Tompo ô, jereo ny fandrahonany; ary omeo anay mpanomponao ny mba hitory ny teninao amin'ny fahasahiana rehetra, ³⁰omban'ny aninjiranao ny tànanao hahasitrana sy ny anaovana famantarana sy fahagagana amin'ny anaran'i Jesosy, Mpanomponao Masina. ³¹Ary rehefa nivavaka izy, dia nihovitrovitra ny trano izay niangonany; dia feno ny Fanahy

Masina izy rehetra ka nitory ny tenin'Andriamanitra tamin'ny fahasahiana. —Asan'ny Apostoly 4:29-31

Ary na inona na inona ataonareo, na amin'ny teny, na amin'ny asa, dia ataovy amin'ny anaran'i Jesosy Tompo izany rehetra izany, ka misaora an'Andriamanitra Ray amin'ny alalany.

—Kolosiana 3:17

¹¹Ary izany no angatahinay mandrakariva ny aminareo, mba hataon'Andriamanitsika ho miendrika ny fiantsoana hianareo, ary hotanterahiny amin'ny hery ny fankasitrahana tsara rehetra sy ny asan'ny finoana, ¹²mba hankalazaina ao aminareo ny anaran'i Jesosy Tompontosika, ary hianareo ao aminy kosa, araka ny fahasoavan'Andriamanitsika sy Jesosy Kristy Tompo.

—2 Tesaloniana 1:11-12

Mpiady Mivavaka

A. Mino sy midera an'Andriamanitra eo anivon'ny ady

Nahoana no mitanondrika hianao, ry fanahiko? ary nahoana no mitoloko ato anatiko hianao? Manantenà an'Andriamanitra, fa mbola hidera Azy ihany aho. Izy no famonjena ny tavako sady Andriamanitro. —Salamo 43:5

¹JEHOVAH ô, akory izato hamaroan'ny mampahory ahy! Maro no mitsangana hanohitra ahy. ²Maro no milaza ny fanahiko hoe: Tsy manam-pamonjena amin'Andriamanitra izy. ³Kanjo Hianao, Jehovah ô, no ampinga manodidina ahy, Voninahitro sy mpanandratra ny lohako. ⁴Amin'ny feoko no iantsoako an'i Jehovah, ary any antendrombohiny masina no mamaly ahy Izy. ⁵Izaho nandry ka natory; Nifoha aho, satria Jehovah no manohana ahy. ⁶Tsy hatahotra olona alinalina aho, Izay milahatra manodidina hamely ahy. ⁷Mitsangàna, Jehovah ô; vonjeo aho, Andriamanitro ô! ⁸An'i Jehovah ny famonjena; ho amin'ny olonao anie ny fitahiana. —Salamo 3:1-7a, 8

¹Mamiko indrindra Hianao, Jehovah Heriko ô. ²Jehovah no harambatoko sy batery fiarovana ho ahy ary Mpamonjy ahy; Andriamanitro, vatolampy ialofako, sy ampingako ary tandroka famonjena ahy sy fiarovana avo ho ahy. ³Miantso an'i Jehovah

Izay mendrika hoderaina aho, ka dia vonjena ho afaka amin'ny fahavaloko. —Salamo 18:1-3

Ny anaran'i Jehovah dia tilikambo mafy; ny marina miezaka ho ao aminy ka voavonjy. —Ohabolana 18:10

Fa ny olona izay mahalala an'Andriamaniny kosa dia hifikitra amin'izany ka hankatò azy. —Daniela 11:32b

B. Paoly sy Silasy tao an-trano-maizina

²³Ary nony efa nokapohiny mafy dia mafy izy, dia nataony tao an-trano-maizina, ka nasainy niambina azy tsara ny mpiandry trano-maizina. ²⁴Ary rehefa nahazo teny toy izany ralehilahy, dia nataony tao amin'ny trano-maizina anatiny indrindra izy, ary ny tongony nobelokiny mafy tamin'ny boloky hazo. ²⁵Ary nony namatonalina, dia nivavaka sy nihira fiderana an'Andriamanitra Paoly sy Silasy; ary nihaino azy ny mpifatotra. ²⁶Ary nisy horohorontany mafy dia mafy avy tampoka, ka nihozongozona ny fanorenen'ny trano-maizina; dia nivoha niaraka tamin'izay ny varavarana rehetra, ary nivaha avokoa ny fatoran'izy rehetra. ²⁷Dia nahatsiaro ny mpiandry trano-maizina ka nahita ny varavaran'ny trano-maizina nivoha, dia nanatsoaka ny sabany izy ka saiky hamono tena, satria nataony fa efa nandositra ny mpifatotra. ²⁸Fa Paoly niantso tamin'ny feo mahery ka nanao hoe: Aza mamono tena, fa ato ihany izahay rehetra. ²⁹Ary izy niantso jiro, dia nikaretsaka niditra sady toran-kovitra ka niankohoka teo anatrehan'i Paoly sy Silasy. ³⁰Ary rehefa nentiny nivoaka izy roa lahy, dia hoy izy: Tompoko, inona no mety hataoko, mba hovanjena aho? ³¹Dia hoy izy roa lahy: Minoa an'i Jesosy Tompo, dia hovanjena hianao sy ny ankohonanao. ³²Ary izy roa lahy nitory ny tenin'ny Tompo taminy sy tamin'izay rehetra tao an-tranony. ³³Ary nandray azy roa lahy izy tamin'izany ora amin'ny alina izany ka nanasa ny dian-kapoka; ary natao batisa tamin'izay izy mbamin'izay azy rehetra. ³⁴Ary rehefa nentiny niakatra ho ao an-trano izy roa lahy, dia norosoany hanina teo anoloany, dia nifaly indrindra izy mbamin'izay rehetra

tao an-tranony, satria efa nino an'Andriamanitra.

—Asan'ny Apostoly 16:23-34

C. Ohatra ny amin'ny fandresena azon'ny Tompo hoan'ny Israely fahiny

Josafata sy ny fahavalon'i Joda—Tsy anareo ny ady fa an'Andriamanitra. (*Jereo 2 Tantara Toko faha 20.*)

Davidy sy Goliata—Tsy misy maharesy an'Andriamanintsika. (*Jereo 1 Samoela Toko faha 17.*)

Josoa sy ny ady tao Jeriko—Ny fankatoavana didin'Andriamanitra no fanalahidin'ny fandresena. (*Jereo Josoa Toko faha 6.*)

Gideona sy ny Midianita—Ny lalan'Andriamanitra tsy mba lalantsika. (*Jereo Mpitsara Toko faha 7.*)

D. Ny fifalian'ny Tompo no herinao

¹⁴Rariny sy fitsarana no fanorenan'ny seza fiandriananao; Famindrampo sy fahamarinana no mialoha ny tavanao.

¹⁵Sambatra izay olona mahalala ny feo mahafaly; Jehovah ô, amin'ny fahazavan'ny tavanao no handehanany. ¹⁶Ny anaranao no hifaliany mandrakariva; ary ny fahamarinanao no hisandratany. ¹⁷Fa voninahitry ny heriny Hianao; ary amin'ny fankasitrahanao no hisandratan'ny tandrokay. —Salamo 89:14-17

Koa aza malahelo hianareo, fa ny fifaliana avy amin'i Jehovah no fiarovana mafy ho anareo. —Nehemia 8:10c

¹¹Dia hifaly izay rehetra mialoka aminao; Hihoby mandrakariva izy, koa miarova azy Hianao; Ka dia ho ravoravo aminao izay tia ny anaranao, ¹²a Hianao, Jehovah ô, mitahy ny marina; Fankasitrahana no ataonao manodidina azy toy ny ampinga lehibe.

—Salamo 5:11-12

Aoka hihoby sy hifaly izay mankasitraka ny fahamarinako; ary aoka izy hanao mandrakariva hoe: Hankalazaina anie Jehovah, Izay mankasitraka ny fiadanan'ny mpanompony. —Salamo 35:27

¹⁷Fa na dia tsy mamontsina aza ny aviavy, ary tsy misy voany ny voaloboka, na dia mahadiso fanantenana aza ny oliva, ary

tsy mahavokatra hohanina ny saha, na dia vonoina aza ny ondry ao amin'ny vala, ary tsy misy omby ao am-pahitra,—¹⁸nefa izaho dia mbola hifaly amin'i Jehovah ihany sy hiravoravo amin'Andriamanitry ny famonjena ahy. ¹⁹Jehovah Tompo no tanjako.

—Habakoka 3:17-19a

⁵Fa hanafina ahy ao an-trano fialofany amin'ny andro fahoriana lzy; Hampiery ahy amin'ny fierena ao an-dainy lzy; Hanan-dratra ahy ho eny ambony vatolampy lzy. ⁶Koa dia hisandratra ambonin'ny fahavaloko manodidina ahy ny lohako, ka hanatitra fanatitra hihobiana ao an-dainy aho; Hihira sy hankalaza an'i Jehovah aho.

—Salamo 27:5-6

16. RAHA MIARA-MIJALY AMINY ISIKA DIA HIARA-HANAM-BONINAHITRA AMINY

Miantso antsika hanaraka Azy Jesosy na inona na inona vidiny ary izy no hiaro antsika

²³Ary hoy koa Jesosy tamin'izy rehetra: Raha misy ta-hanaraka Ahy, aoka izy handa ny tenany, dia hitondra ny hazo fijaliany isan-andro ka hanaraka Ahy. ²⁴Fa na iza na iza no ta-hamonjy ny ainy dia hahavery izany; ary na iza na iza no hahavery ny ainy noho ny amiko, dia izy no hamonjy izany. ²⁵Fa inona no soa azon'ny olona, raha mahazo izao tontolo izao aza, kanefa very ny ainy, na mati-antoka, izany izy? ²⁶Fa na iza na iza no ho menatra Ahy sy ny teniko, dia ho menatra azy kosa ny Zanak'olona, raha avy amin'ny voninahiny sy ny an'ny Rainy ary ny an'ny anjely masina.

—Lioka 9:23-26

¹⁸Raha halan'izao tontolo izao hianareo, dia aoka ho fantatra-reo fa izaho efa halany talohanareo. ¹⁹Raha naman' izao tontolo izao hianareo, dia ho tia ny azy izao tontolo izao; fa satria tsy naman' izao tontolo izao hianareo, fa izaho efa nifidy anareo tamin'izao tontolo izao, dia halan'izao tontolo izao hianareo. ²⁰Tsarovy ny teny izay nolazaiko taminareo hoe: Ny mpanompo tsy lehibe noho ny tompony. Raha nanenjika Ahy izy, dia hanenjika anareo koa; ary raha nitandrina ny teniko izy, dia hitandrina ny

anareo koa. ²¹Fa izany rehetra izany no hataony aminareo noho ny anarako, satria tsy mahalala izay naniraka Ahy izy.

—Jaona 15:18-21

Eny, izay rehetra te-ho velona amin'ny toe-panahy araka an'Andriamanitra, izay ao amin'i Kristy Jesosy, dia henjehina.

—2 Timoty 3:12

²²Sambatra hianareo, raha halan'ny olona ka ariany sy haratsiny, ary laviny toy ny zava-dratsy ny anaranareo, noho ny amin'ny Zanak'olona. ²³Mifalia hianareo amin'izany andro izany, ka mibitaha; fa, indro, lehibe ny valim-pitianareo any an-danitra; fa izany no nataon'ny razany tamin'ny mpaminany. —Lioka 6:22-23

Ary aza matahotra izay mamono ny tena, nefa tsy mahay mamono ny fanahy; fa aleo matahotra izay mahay mahavery ny fanahy sy ny tena ao amin'ny helo.

—Matio 10:28

³⁷Kanefa amin'izany rehetra izany dia manaoatra noho ny mpandresy isika amin'ny alalan'Ilay tia antsika. ³⁸Fa matoky aho fa na fahafatesana, na fiainana, na anjely, na ireo fanapahana, na zavatra ankehitriny, na zavatra ho avy, na hery, ³⁹na ny ambony, na ny ambany, na inona na inona amin'izao zavatra ary rehetra izao, dia tsy hahasarakana antsika amin'ny fitiavan'Andriamanitra izay ao amin'i Kristy Jesosy Tompontsika. —Romana 8:37-39

Izany teny izany efa nolazaiko taminareo mba hananana-reo fiadanana amiko. Atỳ amin'izao tontolo izao no ahitanareo fahoriana; nefa matokia; Izaho efa naharesy izao tontolo izao.

—Jaona 16:33

Kristy dia aseho amin'izao tontolo izao amin'ny alalan'ny fijalantsika

⁷Fa tsy nomen'Andriamanitra fanahy osa isika, fa fanahy mahery sy fitiavana ary fahononan-tena. ⁸Koa aza menatra ny ho vavolombelon'ny Tompontsika, na ahy mpifatony hianao; fa aoka hianao ho mpiombona ny fahoriana noho ny filazantsara araka ny herin'Andriamanitra, ⁹Izay namonjy antsika sy niantso antsika tamin'ny fiantsoana masina, tsy araka ny asantsika, fa araka ny

fikasany sy ny fahasoavany izay nomena antsika tao amin'i Kristy Jesosy hatry ny fony fahagola. —2 Timoty 1:7-9

[Nanoratra momba ny fijaliany i Paoly] ¹²Ary tiako ho fantat-
trareo, ry rahalahy, fa izay zavatra nanjo ahy dia efa tonga
fampandrosoana ny filazantsara kosa; ¹³ka ao amin'i Kristy ny
fifatorako dia fantatry ny mpiambina andriana rehetra mbamin'ny
olona hafa rehetra; ¹⁴ary ny ankabiazan'ny rahalahy dia efa
matoky ao amin'ny Tompo noho ny fifatorako ka mihahasahisy
kokoa hitory ny tenin'Andriamanitra tsy amin'ny tahotra.

—Filipiana 1:12-14

¹³Ary iza no hanisy ratsy anareo, raha mazoto amin'izay tsara
hianareo? ¹⁴Fa raha tàhiny mitondra fahoriana noho ny fahamari-
nana hianareo, dia sambatra; ary aza matahotra tahaka azy, ary
aza mangorohoro hianareo; ¹⁵fa manamasina an i' Kristy ho Tompo
ao am-ponareo; ary aoka ho vonona mandrakariva hianareo
hamaly izay manontany anareo ny amin'ny anton'ny fanantenana
ao anatinareo, nefa amin'ny fahalemam-panahy sy ny fanajana,
¹⁶ka manàna fieritreretana tsara, mba ho menatra izay manaratsy
ny fitondrantenanareo tsara ao amin'i Kristy, dia izay anendrike-
ndrehana anareo. ¹⁷Fa raha sitrapon'Andriamanitra, dia tsaratsara
kokoa ny hitondra fahoriana amin'ny fanaovan-tsoa noho ny
amin'ny fanaovan-dratsy.

—1 Petera 3:13-17

⁴³Efa renareo fa voalaza hoe: “Tiava ny namanao”, ary manka-
halà ny fahavalonao. ⁴⁴Fa Izaho kosa milaza aminareo hoe:
Tiava ny fahavalonareo, ary mivavaha ho an'izay manenjika
anareo,— ⁴⁵mba ho tonga zanaky ny Rainareo Izay any an-danitra
hianareo.

—Matio 5:43-45a

³Aoka isika hifaly amin'ny fahoriana aza, satria fantatsika fa ny
fahoriana mahatonga faharetana; ⁴ary ny faharetana mahatonga
fahatsaram-panahy voazaha toetra; ary ny fahatsaram-panahy
voazaha toetra mahatonga fanantenana; ⁵ary ny fanantenana
dia tsy mampahamenatra, satria ny Fanahy Masina, Izay nome-
na antsika, no nentiny nampidina ny fitiavan'Andriamanitra ho ao
am-pontsika.

—Romana 5:3b-5

Koa raha mitondra anareo hatolotra izy, dia aza manahy rahateo izay holazainareo; fa izay teny homena anareo amin'izany ora izany no holazainareo; fa tsy hianareo no hiteny, fa ny Fanahy Masina. —Marka 13:11

⁶Fa Andriamanitra, Izay nandidy hoe: Aoka ny mazava hahazava ao amin'ny maizina, no nampahazava ny fonay ho amin'ny fahazavan'ny fahalalana ny voninahitr'Andriamanitra eo amin'ny tavan'i Jesosy Kristy. ⁷Fa manana izao rakitra izao amin'ny vilany tany izahay, mba ho an'Andriamanitra ny halehiben'ny hery, fa tsy ho avy aminay. ⁸Voageja manodidina izahay, nefa tsy tery; very hevitra, nefa tsy mamoy fo; ⁹enjehina, nefa tsy nafoy; potraka, nefa tsy maty; ¹⁰mitondra ny fahafatesan' i Jesosy mandrakariva ao amin'ny tena izahay, mba haseho ao amin'ny tenanay koa ny fiainan'i Jesosy. ¹¹Fa izahay izay velona dia atolotra ho amin'ny fahafatesana mandrakariva noho ny amin'i Jesosy, mba haseho ao amin'ny nofonay mety maty koa ny fiainan'i Jesosy.

—2 Korintiana 4:6-11

¹⁴Fa ny fitiavan'i Kristy no manery anay, satria izao no hevitra: maty ny Anankiray hamonjy ny olona rehetra, ka dia maty koa izy rehetra; ¹⁵ary maty hamonjy ny olona rehetra izy, mba tsy ho velona ho an'ny tenany intsony izay velona, fa ho an'izay efa maty sy nitsangana hamonjy azy. —2 Korintiana 5:14-15

Raha miara-mijaly Aminy isika dia hiara-hanam-boninahitra Aminy

¹²Ry malala, aza gaga noho ny fizahan-toetra mahamay izay mahazo anareo ho fitsapan-toetra, ary aza atao ho zavatra mahagaga manjo anareo izany; ¹³fa araka ny iombonanareo fijaliana amin'i Kristy dia mifalia, mba hiravoravoanareo indrindra amin'ny fisehoan'ny voninahiny koa. ¹⁴Sambatra hianareo, raha haratsina noho ny anaran'i Kristy; fa ny Fanahin'ny voninahitra, dia ny Fanahin'Andriamanitra, mipetraka ao aminareo.

—1 Petera 4:12-14

¹⁶Ny Fanahy dia miara-milaza amin'ny fanahintsika fa zanak'Andriamanitra isika. ¹⁷Ary raha zanaka, dia mpandova; eny, sady

mpandova an'Andriamanitra no mpiray lova amin'i Kristy koa, raha miara-miaritra aminy isika mba hiara-manam-boninahitra aminy koa. ¹⁸Fa ataoko fa ny fahoriana amin' izao andro ankehitriny izao dia tsy tokony hoharina amin'ny voninahitra izay haseho amintsika. —Romana 8:16-18

¹Koa satria niaritra tamin'ny nofo Kristy, dia alao mba ho fiadianareo koa izany saina izany; fa izay niaritra tamin'ny nofo dia efa afaka amin'ny ota; ²mba tsy handanianareo ny andro sisa iainanareo amin'ny nofo araka ny filan'ny olona intsony, fa araka ny sitrapon'Andriamanitra. —1 Petera 4:1-2

Koa izay mitondra fahoriana araka ny sitrapon'Andriamanitra, dia aoka ny fanaovan-tsoa no hanolorany ny fanahiny ho an'Ilay mahatoky, dia ny Mpanao azy. —1 Petera 4:19

⁸Eny tokoa, fa ataoko ho fatiantoka avokoa ny zavatra rehetra noho ny fihoaran'ny hatsaran'ny fahalalana an'i Kristy Jesosy Tompoko, izay niaretako ny fatiantoka ny zavatra rehetra, ka ataoko ho taimboraka ireny mba hahazoako an'i Kristy; ⁹ary mba ho hita ao aminy aho tsy manana ny fahamarinako, izay avy amin'ny lalàna, fa izay avy amin'ny finoana an'i Kristy, dia ny fahamarinan'Andriamanitra amin'ny finoana; ¹⁰eny, mba ho fantatro lzy sy ny herin'ny fitsanganany tamin'ny maty ary ny fiombonana amin'ny fijaliany ka hampitovina amin'ny endriky ny fahafatesany, ¹¹raha mba misy hahatratrarako ny fitsanganana amin'ny maty. —Filipiana 3:8-11

Ary noho izany koa no iaretako izao zavatra izao, ka tsy menatra aho, satria fantatro izay inoako, ary matoky aho fa lzy dia mahatahiry ilay zavatra natolotro Azy mandra-pihavin'izay andro izay. —2 Timoty 1:12

¹⁶Ary tsy ketraka izahay; fa na dia mihalevona aza ny toetray ivelany, dia havaozina isan-andro isan-andro kosa ny toetray anatin'ny. ¹⁷Fa ny fahorianay maivana, izay vetivety foana, dia mainka miasa fatratra indrindra ka mahatanteraka voninahitra mavesatra maharitra mandrakizay ho anay, ¹⁸raha tsy mijery ny

hita izahay, fa ny tsy hita; fa ny hita dia ho vetivety foana, fa ny tsy hita no haharitra mandrakizay. —2 Korintiana 4:16-18

²⁵Izay tia ny ainy no mahavery izany; fa izay mankahala ny ainy amin'izao fiainana izao no hiaro izany ho amin'ny fiainana mandrakizay. ²⁶Raha misy olona manompo Ahy, dia aoka izy hanaraka Ahy, ary izay itoerako, dia ao koa no hitoeran'ny mpamompoko; raha misy olona manompo Ahy, dia hankalaza azy ny Ray. —Jaona 12:25-26

17. MIAINA AO AMIN'NY FAHAZAVAN'NY MANDRAKIZAY

Ny fiainana ao amin'i Kristy dia fiainana feno fiaretana sy faharetana

⁵⁷Ary nony nandroso teny an-dàlana izy, dia nisy anankiray nanao tamin'i Jesosy hoe: Hanaraka Anao aho na aiza na aiza halehanao. ⁵⁸Fa hoy Jesosy taminy: Ny amboahaolo manan-davaka, ary ny voromanidina manana fialofana; fa ny Zanak'olona tsy mba manana izay hipetrahan'ny lohany. ⁵⁹Ary hoy Izy tamin'ny anankiray koa: Manaraha Ahy. Fa hoy kosa izy: Tompoko, aoka aho aloha handeha handevina ny raiko. ⁶⁰Fa hoy Jesosy taminy: Aoka ny maty handevina ny maty ao aminy; fa hianao kosa mandehana, ka mitoria ny fanjakan'Andriamanitra. ⁶¹Ary hoy ny anankiray koa: Tompoko, hanaraka Anao ihany aho; fa aoka aho aloha handeha hanao veloma ny ao an-tranoko. ⁶²Fa hoy Jesosy taminy: Tsy misy olona mitana fangady tarihina ary miherika ka mendrika ho ao amin'ny fanjakan'Andriamanitra. —Lioka 9:57-62

²⁷Na zovy na zovy no tsy mitondra ny hazo fijaliana ka tsy manaraka Ahy, dia tsy azo ekena ho mpianatro izy. ²⁸Fa iza moa aminareo, raha ta-hanao tilikambo, no tsy mipetraka aloha mihevitra izay ho lany hanaovany izany, na misy hahavitany azy, na tsia? ²⁹fandrao, rehefa nanao ny fanorenana izy ka tsy mahavita, dia handatsa azy izay rehetra mahita ³⁰ka hanao hoe: Io olona io dia nanomboka nanao trano, fa tsy nahavita. ³¹Ary iza moa no mpanjaka, raha handeha hiady amin'ny mpanjaka hafa, no tsy

mipetraka aloha mba haka hevitra tsara, na mahay mandresy ilay mitondra roa alina amin'ny iray alina izy, na tsia? ³²Fa raha tsy izany, raha mbola lavitra ny mpanjaka anankiray, dia hampitondra teny izy ka hangataka fihavanana. ³³Ary toy izany koa hianareo rehetra, izay tsy mahafofy izay rehetra anananareo, dia tsy azo ekena ho mpianatro. —Lioka 14:27-33

²⁷Dia namaly Petera ka nanao taminy hoe: Indro, izahay efa nahafofy ny zavatra rehetra ka nanaraka Anao; koa inona ary no ho azonay? ²⁸Fa hoy Jesosy taminy: Lazaiko aminareo marina tokoa fa rehefa mby amin'ny fanavaozana, ka hipetraka amin'ny seza fiandrianan'ny voninahiny ny Zanak'olona, hianareo koa, izay nanaraka Ahy, dia hipetraka amin'ny seza fiandrianana roa ambin'ny folo ka hitsara ny firenen'Isiraely roa ambin'ny folo. ²⁹Ary izay rehetra efa nahafofy trano, na rahalahy, na anabavy, na ray, na renny, na zanaka, na tany, noho ny anarako, dia handray zato heny ka handova fiainana mandrakizay. —Matio 19:27-29

Mihazakazaha mba hahazo ny loka

²⁴Tsy fantatrarao va fa izay mihazakazaka eo amin'ny tany fihazakazahana dia samy mihazakazaka avokoa, nefa ny iray ihany no mahazo ny loka? Mihazakazaha toy izany mba hahazoanareo. ²⁵Ary ny mpihazakazaka rehetra dia mahonon-tena amin'ny zavatra rehetra. Kanefa ireny dia mitady satroboninahitra mety ho lo ihany, fa isika kosa ny tsy mety ho lo.

—1 Korintiana 9:24-25

⁵Ary raha misy manezaka amin'ny filalaovana, dia tsy satrohana satroboninahitra izy, raha tsy manezaka araka ny lalàna. ¹¹Mahatoky izao teny izao: Fa raha miara-maty aminy isika, dia hiara-belona aminy koa; ¹²raha miaritra isika, dia hiara-manjaka aminy; raha mandà Azy isika, Izy kosa handa antsika; ¹³fa na dia tsy matoky Azy aza isika, dia mbola mahatoky ihany Izy, fa tsy mahazo mandà ny tenany. —2 Timoty 2:5, 11-13

¹²Tsy toy ny efa nahazo sahady aho, na efa tanteraka sahady; fa miezaka aho hihazona izay nihazonan'i Kristy Jesosy ahy. ¹³Ry

rahalahy, tsy mbola ataoko fa efa nahazo ny tenako; fa zavatra iray loha no ataoko; manadino izay zavatra ao aoriana ka miezaka hanatratra izay zavatra eo aloha, ¹⁴eny, miezaka hanatratra ny marika aho hahazoako ny lokan'ny fiantsoan'Andriamanitra any ambony ao amin'i Kristy Jesosy. —Filipiana 3:12-14

⁵Fa hianao kosa mahonona tena amin'ny zavatra rehetra, miareta fahoriana, ataovy ny asan'ny evanjelista, tanteraho ny fanompoanao. ⁶Fa izaho dia efa hatolotra sahady, ary efa mba akaiky ny andro fialako. ⁷Efa niady ny ady tsara aho; nahatanteraka ny fihazakazahako aho; nitahiry ny finoana aho; ⁸hatrizao dia tehirizina ho ahy ny satroboninahitry ny fahamarinana, izay homen'ny Tompo, Mpitsara marina, ho ahy amin'izay andro izay; ary tsy ho ahy ihany, fa ho an'izay rehetra tia ny fisehoany koa.

—2 Timoty 4:5-8

¹Koa amin'izany, satria misy vavolombelona maro be toy izany manodidina antsika toy ny rahona, dia aoka isika koa hanaisotra izay rehetra mitambesatra amintsika mbamin'ny ota izay malaky mahazo antsika, ary aoka isika hihazakazaka amin'ny faharetana amin'izao fihazakazahana filokana napetraka eo anoloantsika izao, ²mijery an'i Jesosy, Tompon'ny finoantsika sy Mpanefa azy, izay naharitra ny hazo fijaliana, fa tsy nitandro henatra, mba hahazoany ny fifaliana napetraka teo anoloany, ka dia efa mipetraka eo amin'ny ankavanan'ny seza fiandrianan'Andriamanitra Izy. ³Fa hevero tsara ilay naharitra ny fanoherana nataon'ny mpanota taminy, fandrao ho ketraka hianareo, ka ho reraka ny fanahianreo.

—Hebreo 12:1-3

Miaina ao amin'ny fahamarinana mandra-piverin'i Jesosy

¹Fa aoka ho fantatrao izao: fa any am-parany any dia hisy andro mahory. ²Fa ny olona ho tia tena, ho tia vola, ho mpandoka tena, mpiavonavona, miteny ratsy, tsy manoa ray sy reny, tsy misaotra, tsy manaja izay masina, ³tsy manam-pitiavana, mpanontolo fo, mpanendrikendrika, tsy mahonom-po, lozabe, tsy tia ny tsara, ⁴mpamadika, kirina, mpieboebo, tia ny fahafinaretana

mihoatra noho ny fitiavany an'Andriamanitra, ⁵manana ny endriky ny toe-panahy araka an'Andriamanitra, nefa nandà ny heriny; ireny koa dia halaviro. —2 Timoty 3:1-5

¹Fa ny amin'ny andro sy ny fotoana, ry rahalahy, dia tsy misy tokony hosoratako aminareo, ²satria hianareo mahalala mari-marina fa ho avy toy ny mpangalatra amin'ny alina ny andron'ny Tompo. ³Raha misy olona manao hoe: Miadana sy mandry fahizay, dia hanjo azy tampoka ny fandranganana, toy ny faharian'ny vehivavy raha miteraka, ka tsy ho afa-mandositra mihitsy izy. ⁴Fa hianareo, ry rahalahy, tsy ao amin'ny maizina, mba hahatratra anareo toy ny mpangalatra izany andro izany. ⁵Fa hianareo rehetra dia zanaky ny mazava sy zanaky ny andro; tsy an'ny alina na an'ny maizina isika. ⁶Koa dia aza mba matory toy ny sasany isika, fa aoka hiambina ka hahonon-tena. ⁷Fa izay matory dia matory amin'ny alina; ary izay mamo dia mamo amin'ny alina. ⁸Fa satria an'ny andro isika, dia aoka hahonon-tena ka hitafy ny finoana sy ny fitiavana ho fiarovan-tratra, ary ny fanantenana ny famonjena ho fiarovan-doha. ⁹Fa Andriamanitra tsy nanendry antsika ho amin'ny fahatezerana, fa mba hahazo famonjena amin'ny alalan'i Jesosy Kristy Tompontosika, ¹⁰Izay maty hamonjy antsika, mba hiara-belona aminy isika, na mahatsiaro na matory. ¹¹Koa mifananara sy mifampahatanjaha, tahaka ny ataonareo ihany.

—1 Tesaloniana 5:1-11

¹Ary mangataka aminareo izahay, ry rahalahy, ny amin'ny fihavian'i Jesosy Kristy Tompontosika sy ny hanangonana antsika ho eo aminy, ²mba tsy halaky hohetsiketsehina amin'ny saina na hampitahorina hianareo, na amin'ny fanahy, na amin'ny teny, na amin'ny epistily izay toa avy aminay, milaza fa efa miandoha ny andron'ny Tompo. ³Aza mety hofitahin'olona akory hianareo; fa tsy ho avy izany, raha tsy efa tonga aloha ny fihemorana, ka hiseho ilay lehilahin'ota, dia ilay zanaky ny fahaverezana, ⁴ilay manohitra ka manandra-tena ho ambony noho izay rehetra atao hoe Andriamanitra, na izay ivavahana, ka dia mipetraka eo amin'ny tempolin'Andriamanitra izy ka manao ny tenany ho Andriamanitra. ⁵Tsy tsaroanareo va fa fony mbola teo aminareo ihany aho, dia

efa nilaza izany zavatra izany taminareo? ⁶Ary ankehitriny fantatreo ny zavatra misakana, mba hampisehoana azy amin'ny fotoan'androny. ⁷Fa miasa sahady ny zava-miafina, dia ny tsi-fankatoavan-dalàna, kanefa mandra-panaisotra ilay misakana ankehitriny ihany. ⁸Ary dia haseho ilay tena mpandika lalàna, izay holevonin'i Jesosy Tompo amin'ny fofonain'ny vavany ary hofonanany amin'ny fisehoan'ny fihaviany; ⁹ny fihavin'ilehiny dia araka ny fiàsan'i Satana amin'ny hery sy ny famantarana sy ny fahagagana mandainga rehetra ¹⁰ary ny famitahana momba ny tsi-fahamarinana amin'izay ho very, satria tsy nandray ny fitiavana ny fahamarinana izay hamonjena azy izy. —2 Tesaloniana 2:1-10

⁵Fa maro no ho avy amin'ny anarako hanao hoe: Izaho no Kristy, ka maro no ho voafitany. ¹¹Ary hisy mpaminany sandoka maro hitsangana ka hamitaka ny maro. ¹²Ary noho ny haben'ny tsi-fankatoavan-dalàna dia hihamangatsiaka ny fitiavan'ny maro. ¹³Fa izay maharitra hatramin'ny farany no hovonjena. —Matio 24:5, 11-13

³Fa fantatreo voalohany indrindra fa amin'ny andro farany dia hisy mpaniratsira avy haniratsira, mandeha araka ny filany ⁴ka manao hoe: Aiza ny teny fikasana ny amin'ny fihaviany? Fa hatrizay nodian'ny razana mandry dia maharitra tsy miova ny zavatra rehetra; eny, hatramin'ny nanaovana izao tontolo izao aza. ⁸Nefa, ry malala, izao zavatra iray loha izao no aoka tsy hohadinoinareo: ny indray andro amin'ny Tompo dia toy ny arivo taona, ary ny arivo taona toy ny indray andro. ⁹Ny Tompo tsy mahela ny teny fikasany, araka izay ataon'ny sasany ho fahelany; fa mahari-po aminareo lzy, ka tsy tiany hisy ho very, fa mba ho tonga amin'ny fibebahana izy rehetra. —2 Petera 3:3-4, 8-9

²Mitoria ny teny, mazotoa, na amin'ny fotoana, na tsy amin'ny fotoana, mandrese lahatra, mamporisiha, mananara mafy amin'ny fahari-po sy ny fampianarana rehetra. ³Fa ho avy ny andro izay tsy hahazakan'ny olona ny fampianarana tsy misy kilema; fa hangidihidy sofina izy, dia hamory mpampianatra ho azy araka ny filany; ⁴ary hampiala ny sofiny amin'ny teny marina tokoa izy ka hivily ho amin'ny anganongano. —2 Timoty 4:2-4

²⁰Fa hianareo kosa, ry malala, dia ataovy izay handrosoanareo amin'ny finoanareo masina indrindra, ka mivavaha ao amin'ny Fanahy Masina; ²¹ary tehirizo ny tenanareo ao amin'ny fitiavan' Andriamanitra, miandry ny famindrampon'i Jesosy Kristy Tompon-tsika ho fiainana mandrakizay. ²²Ary amindrao fo ny sasany izay miahanahana; ²³ary ny sasany kosa sariho avy amin'ny afo no famonjy azy; ary ny sasany indray amindrao fo amin-tahotra, ka mankahalà na dia ny akanjo voapentimpentin'ny nofo aza.

—Joda 1:20-23

³²Fa ny amin'izany andro na ora izany dia tsy misy mahalala, na dia ny anjely any an-danitra, ary na dia ny Zanaka aza, afa-tsy ny Ray ihany. ³³Mitandrema, miambena, ka mivavaha; fa tsy fantatrarao izay hihavian'ny fotoana. ³⁴Izany dia tahaka ny olona nandeha hivahiny, izay nandao ny tranony ka nanome fahefana ny mpanompony, ka samy notolorany ny raharahany avy, ary ny mpiandry varavarana dia nasainy niambina tsara. ³⁵Koa miam-bena hianareo, fa tsy fantatrarao izay andro hihavian'ny tompon-trano, na ho hariva, na ho mamatonalina, na ho maneno akoho, na ho maraina,— ³⁶fandrao avy tampoka izy ka mahita anareo matory. ³⁷Ary izay lazaiko aminareo dia lazaiko amin'ny olona rehetra koa: Miambena.

—Marka 13:32-37

⁹Koa dia ataontsika ho voninahitsika ny mba hankasitrahany antsika, na mitoetra, na tsy mitoetra. ¹⁰Fa isika rehetra dia samy tsy maintsy ho hita toetra miharihary eo amin'ny fitsaran'i Kristy, mba handraisan'ny olona rehetra izay zavatra nataon'ny tenany, dia araka izay nataony, na tsara na ratsy. —2 Korintiana 5:9-10

¹⁹Koa mandehana hianareo, dia ataovy mpianatra ny firenena rehetra, manao batisa azy ho amin'ny anaran'ny Ray sy ny Zana-ka ary ny Fanahy Masina ²⁰sady mampianatra azy hitandrina izay rehetra nandidikao anareo; ary, indro, izaho momba anareo mandrakariva ambara-pahatongan'ny fahataperan'izao tontolo izao.

—Matio 28:19-20

Rehefa miverina Jesosy dia ho tahaka Azy isika

⁵¹Indro, zava-miafina no ambarako aminareo: tsy hodi-mandry avokoa isika rehetra, ⁵²fa vetivety, toy ny indray mipi-maso, rehefa maneno ny trompetra farany, dia hovana isika rehetra; fa hotsofina ny trompetra, ary ny maty hatsangana tsy ho lo intsony, ary isika hovana. ⁵³Fa ity mety lo ity tsy maintsy hitafy ny tsi-fahalòvana, ary ity mety maty ity tsy maintsy hitafy ny tsi-fahafatesana.

—1 Korintiana 15:51-53

¹³Fa tsy tianay tsy ho fantatrarao, ry rahalahy, ny amin'izay modimandry, mba tsy hahalalahelovanareo tahaka ny sasany izay tsy manana fanantenana. ¹⁴Fa raha inoantsika fa efa maty Jesosy sady efa nitsangana indray, dia toy izany koa no hitondran'Andriamanitra izay efa nodimandry tao amin'i Jesosy hiaraka aminy. ¹⁵Fa izao no lazainay aminareo amin'ny tenin'ny Tompo: isika, izay velona ka mbola mitoetra mandra-pihavin'ny Tompo, dia tsy mba hialoha izay efa nodi-mandry tsy akory. ¹⁶Fa ny tenan'ny Tompo no hidina avy any an-danitra amin'ny fian-tsoana sy ny feon'ny arikanjely ary ny trompetran'Andriamanitra, ka izay maty ao amin'i Kristy no hitsangana aloha; ¹⁷ary rehefa afaka izany, dia isika izay velona ka mbola mitoetra no hakarina hiaraka aminy ho eny amin'ny rahona hitsena ny Tompo any amin'ny habakabaka; dia ho any amin'ny Tompo mandrakariva isika. ¹⁸Koa dia mifampionòna hianareo amin'izany teny izany.

—1 Tesaloniana 4:13-18

Ary raha ny Fanahin'Izay nanangana an'i Jesosy tamin'ny maty no mitoetra ao anatinareo, dia Izay nanangana an'i Kristy Jesosy tamin'ny maty no hamelona ny tenanareo mety maty amin'ny Fanahiny, Izay mitoetra ao anatinareo. —Romana 8:11

Ry malala, ankehitriny aza dia zanak'Andriamanitra isika, nefa tsy mbola naseho izay ho toetsika rahatrizay. Fantatsika fa raha hiseho Izy, dia ho tahaka Azy isika, fa ho hitantsika Izy, dia izay tena endriny tokoa.

—1 Jaona 3:2

Ho any amin'ny Tompo mandrakizay isika

⁹Ary nihira fihiram-baovao izy ka nanao hoe: Hianao no mendrika haka ny boky sy hamaha ny tombo-kaseny; fa voavono Hianao, ary ny ranao no nanavotanao ho an'Andriamanitra olona avy tamin'ny fokom-pirenena rehetra sy ny samy hafa fiteny sy ny olona ary ny firenena rehetra; ¹⁰Ary efa nataonao fanjakana sy mpisorona ho an'Andriamanitsika ireo; ary manjaka ambonin'ny tany izy.
—Apokalypsy 5:9-10

²Ary nahita aho fa, indro, ny tanàna masina, dia Jerosalema vaovao, nidina avy any an-danitra tamin'Andriamanitra, voaomana tahaka ny ampakarina efa mihaingo hihaona amin'ny vadiny. ³Ary nahare feo mahery avy teo amin'ny seza fiandrianana aho nanao hoe: Indro, ny tabernakelin'Andriamanitra dia eo amin'ny olona, ary lzy hitoetra eo aminy, ary ireo ho olony, ary Andriamanitra no hitoetra eo aminy, dia ho Andriamaniny. ⁴Ary hofafany ny ranomaso rehetra amin'ny masony; ary tsy hisy fahafatesana intsony, sady tsy hisy alahelo, na fitarainana, na fanaintainana; fa efa lasa ny zavatra taloha. ⁵Ary hoy llay mipetraka eo ambonin'ny seza fiandrianana: Indro, havaoziko ny zavatra rehetra. Ary hoy koa lzy: Soraty; fa mahatoky sy marina ireo teny ireo. ⁶Ary hoy koa lzy tamiko: Tanteraka ireo. Izaho no Alfa sy Omega, ny fiandohana sy ny fiasarana. Izaho hanome maimaimpoana amin'ny loharanon'ny ranon'aina ho an'izay mangetaheta. ⁷Izay maharesy no handova izany zavatra izany; ary ho Andriamaniny Aho,
—Apokalypsy 21:2-7

²Fa handeha hamboatra fitoerana ho anareo Aho. ³Ary raha handeha hamboatra fitoerana ho anareo Aho, dia ho avy indray ka handray anareo ho any amiko, ka izay itoerako no hitoerana-reo koa.
—Jaona 14:2b-3

Izay manan-tsofina, aoka izy hihaino izay lazain'ny Fanahy amin'ny fiangonana. Izay maharesy dia havelako hihinana ny avy amin'ny hazon'aina, izay eo amin'ny Paradisan'Andriamanitra.
—Apokalypsy 2:7

NY FANASANA ANAO HAHAZO NY FIAINANA VAOVAO AO AMIN'I KRISTY

Raha te hahazo fiainam-baovao amin'ny alalan'ny finoana an'i Jesosy Kristy ianao dia afaka manatona tsotra fotsiny ianao ary mangataka Aminy mba hahatonga anao ho Azy. Tsy hiodina aminao Izy. Andriamanitra dia hamela sy hanadio anao amin'ny fahotanao rehetra, na inona na inona nataonao, ary hataony ho zanany ianao. Jesosy dia nilaza fa tsy handao anao na hahafoy anao mihitsy Izy. Nilaza Izy fa ho avy sy hitoetra ao anatinao amin'ny alalan'ny Fanahiny Masina, hitarika sy hikorakara anao amin'izao fiainana izao, ary hanome anao fonenana mandrakizay miaraka Aminy amin'ny voninahitra rehefa tapitra ny fotoananao eto an-tany.

Fampanantenana avy amin'ny Tenin'Andriamanitra

Fa toy izao no nitiavan'Andriamanitra izao tontolo izao: nomeny ny Zanani-lahy Tokana, mba tsy ho very izay rehetra mino Azy, fa hanana fiainana mandrakizay. —Jaona 3:16

Fa samy efa nanota izy rehetra ka tsy manana ny voninahitra avy amin'Andriamanitra, nefa hamarinina maimaimpoana amin'ny fahasoavany izy noho ny fanavotana izay ao amin'i Kristy Jesosy. —Romana 3:23-24

Fa fahafatesana no tambin'ny ota; ary fiainana mandrakizay no fanomezam-pahasoavana avy amin'Andriamanitra ao amin'i Kristy Jesosy Tompontosika. —Romana 6:23

Satria raha manaiky an'i Jesosy ho Tompo amin'ny vavanao hianao ary mino amin'ny fonao fa Andriamanitra efa nanangana Azy tamin'ny maty, dia hovanjena hianao. Fa amin'ny fo no inoana hahazoana fahamarinana, ary amin'ny vava no anekena hahazoana famonjena. —Romana 10:9-10

Fiandohana Vaovao

Rehefa nangataka tamin'ny Ray ianao mba hamela ny helokao sy hanome anao fiainana vaovao amin'ny alalan'i Jesosy Kristy Zanany, dia anisan'ny fianakavian'Andriamanitra ianao ankehitriny. Mangataka amin'ny Tompo mba hitarika anao ho amin'ny firaisan'ny mpino Kristiana sy hamaky ny Tenin'Andriamanitra isan'andro mba hitombo sy hatanjaka ao Aminy. Katsaho ny itarihan'ny Tompo sy itondrany anao amin'ny alalan'ny vavaka. Afaka miresaka amin'Andriamanitra amin'ny fotoana rehetra sy amin'ny toerana rehetra ianao ary hihaino anao Izy.

Rehefa manomboka ny fiainanao vaovao ao amin'i Kristy ianao—Hitahy anao anie Jehovah ka hiaro anao; hampamirapiratra ny tavany aminao anie Jehovah ka hamindra fo aminao; hanandratra ny tavany aminao anie Jehovah ka hanome anao fiadanana. —Nomery 6:24-26

Published in numerous languages by World Missionary Press, Inc., as God supplies funds in answer to prayer. **For questions or more information by country, visit: www.wmp-contacts.org**

Ity bokikely ity *dia tsy ho zaraina amin'ny daholobe.*
Natao ho an'ny fianarana tsirairay sy ny fianarana
ao anaty vondrona ity.

Maimaim-poana — Tsy azo amidy

World Missionary Press, Inc.
PO Box 120
New Paris, IN 46553-0120 USA
www.wmpress.org

6-26



Read booklets online or by App
www.wmp-readonline.org

5006/2 Malagasy ACH